

Tawureta Munsa Isirayila xa Υετε Σοτωε Masenyi nde yi Kitaabui xa fe ra

Isirayila xa taruxui foloxi Tawureta Munsa xa kitaabui singe nan kui, e naxan ma «Fe Folo Fole.» Na sora donxoe a masenma Isirayila sabatixi Misira boxi ma ki naxe Annabi Yusufu xa waxati.

Yusufu nun a taarae to faxa, Isirayila nun Misira xa defanyi naxa xurun folo. A raponyi Isirayila naxa findi Misira xa konyie ra. Misira mange naxa e rawali a jaaxi ra, e xa taae ti a be.

Kono Alatala naxan mu neemuma a xa jama ma, a naxa Annabi Munsa xee Misira boxi ma alako Isirayila xa xoreya soto. Ala naxa kaabanako magaaxuxi fu raba Munsa saabui ra, han Firawuna naxa Isirayila bonsoe keru. Isirayila to jere folo, e naxa Xulunyumi baa li Misira boxi naaninyi ra. Firawuna nun a xa soorie naxa kata e sontode menni, kono Ala man naxa kaabanakoe raba, a kira rabi baa tagi Isirayilakae girima dennaxe. Firawuna xa soorie to bira e foxo ra, Ala naxa baa ragali e xun ma.

Naakiri ma Isirayila naxa jere folo gbengberenyi ma sigafe ra Kanaan boxi ma, Ala dennaxe laayidixi e be. Kira xon ma a naxa a xa seriye fi Annabi Munsa ma Turusinina geya fari jama ya xori. Kono a mu bu, jama naxa Ala xa seriye matandi, e kuye batu. Na nan a niya Ala

naxa nate tongo e xa e jere gbengberenyi ma je tongo naani bun ma, alako Ala matandi birin xa faxa kira xɔn beenu e xa die xa so Kanaan bɔxi ma.

Na jere kui Ala naxa lu e ya ma a xa hɔrɔmɔlingira saabui ra. A xa nɔre nu na na xun ma kɔɛ nun yanyi. E biyaasi temui, e hɔrɔmɔlingira ragoro, Ala xa nɔre nu tixi e ya ra han a yire li e yonkinma dennaxe. Na mooli raba ne na je tongo naani birin bun ma.

Yi kitaabui rapɔnma Annabi Munsa xa faxe nan ma. Beenun a xa laaxira, a naxa Isirayila jama taxu Yosuwe ra naxan fama e rasode Kanaan bɔxi ma.

Ala lufe a xa jama ya ma, a e xaran tinxinyi ra, a e makanta senbe ra, na birin findixi misaali nan na Ala xa jama be won ma waxati. Ala wama won xun tife kira fanyi ma sigafe ra ariyanna a won nasoma dennaxe. Ala xa won mali na biyaasi kui. Amina.

Tawureta Munsa Isirayila xa Yete Sotɔɛ

Isirayilakae xa konyiya Misira bɔxi ma

¹ Isirayila xa die xilie nan ya, naxee e baba Yaxuba mati Misira bɔxi ma, a nun e xa denbayae:

² Ruben, Simeyɔn, Lewi, Yuda,

³ Isakari, Sabulon, Bunyamin,

⁴ Dana, Nafatali, Gadi, nun Aseri.

⁵ Yaxuba xa die nun a xa mamadie nu lanxi mixi tongo solofere nan ma. A xa di Yusufu jan nu bara siga Misira.

⁶ Yusufu nun a ngaxakerenyie dangi xanbi,

7 Isirayilakae naxa yiriwa Misira boxi ma, e senbe nu luma xun masa ra.

8 Na waxati mange gbete nan nu na Misira xun ma, naxan mu Yusufu kolon.

9 A naxa a fala a xa pama be, «Wo a to, Isirayilakae yiriwaxi ki naxe, a bara findi kontofili ra won be. E bara dangi won na.

10 Won xa kɔɔta nde raba alako e naxa wuya sɔnɔn. Xa na mu, gere temui, e fama ne kafude won yaxuie ma, e keli won xun ma.»

11 Na kui, mange naxa e findi konyie ra, a wali xɔɔxɔe dɔxɔ e ma Pitomi nun Ramesesi taae tife ra. Misira mange Firawuna nu donse malanma na taae nan kui.

12 Kɔnɔ wali xɔɔxɔe nu dɔxɔma e ma ki naxe, e man nu sigama gbo ra na ki ne, han Misirakae bɔɔe naxa rapaaxu e ma Isirayilakae xa fe ra.

13 Misirakae naxa e rawali a jaaxi ra.

14 E naxa e tɔɔɔ wali xɔɔxɔe ra alo biriki bɔnbɔfe nun xee rawalife. E naxa konyiya jaaxi dɔxɔ e ma.

15 Misira mange naxa Isirayilakae xa dirasuxuie Sifira nun Puwa yamari,

16 «Wo na Isirayila gine xa di rasuxu, xa xeme nan a ra, wo a faxa keren na. Xa gine nan a ra, wo xa a lu a xa balo.»

17 Kɔnɔ dirasuxuie to nu gaaxuma Ala ya ra, e mu nu Misira mange xa yaamari rabatuma. E naxa di xememae lu e xa balo.

18 Mange naxa dirasuxuie xili, a naxa e maxɔrin, «Munfe ra wo di xemee luma, e xa balo?»

¹⁹ Dirasuxuie naxa Firawuna yaabi, «Isirayila ginεe senbe gbo Misira ginεe be. Beenu dirasuxui xa e yire li, e nan bara di bari.»

²⁰ Ala naxa hinne na dirasuxuie ra. Isirayila nama naxa wuya dangife a singe ra.

²¹ Dirasuxuie to gaaxu Ala ya ra, Ala naxa die fi e fan ma.

²² Na temui, Firawuna naxa a xa nama birin yamari, «Wo Isirayilakae xa diyore xemee woli Nili xure ma, konɔ wo e xa di ginεe tan lu, e xa balo.»

2

Munsa mofe Misira

¹ Xemε nun ginε nde naxa e boore futi, e birin fatan Lewi bonsoe nan na Isirayilakae ya ma.

² Na ginε naxa teege, a di xemε bari. A to a to di fanyi nan nu a ra, a naxa a noxun kike saxan.

³ A to mu nu noma a noxunde sonon, a naxa kolime debe maso dole ra, a diyore sa a kui, a fa debe doxo Nili xure ma yoforoe tagi.

⁴ Na diyore taara ginema nu tixi yire nde, a ya tixi a xunya ra, alako a xa a kolon fe naxan fama na lide.

⁵ Firawuna xa di ginε naxa goro Nili xure ma a maxade. A to debe to yoforoe tagi, a naxa a xa konyi ginε nde xee a tongode.

⁶ A to a rabi, a naxa di xemε to a kui, a wafe. A naxa kinikini a ma, a fa a fala, «Isirayilaka nde xa di na a ra!»

⁷ Na temui, diyore taara naxa Firawuna xa di ginε maxarin, «N xa siga Isirayila dingε nde xili i be, a xa fa xijε fi a ma?»

⁸ Firawuna xa di gine naxa a yaabi, «Iyo.»
Diyore taara naxa siga, a sa diyore nga xili.

⁹ Firawuna xa di gine naxa a fala diyore nga be, «Yi diyore xanin, i xa xipe fi a ma n be. N i sare fima ne.»
Diyore nga naxa diyore tongo, a xipe fi a ma.

¹⁰ Diyore to mo, a nga naxa a xanin Firawuna xa di gine xon ma, a findi na xa di ra. A to a raminixi ye nan xora, a naxa a xili sa Munsa, naxan falaxi «minife» Eburu xui ra.

Munsa sigafe Madiyan

¹¹ Munsa to fonikaya rakamali, a naxa siga a ngaxakerenyie yire, a xa e xun mato a ra e xa wali xoroxoe kui. A to a ngaxakerenyie yire li, a naxa Misiraka nde to Isirayilaka nde bonbo ra.

¹² A to mu mixi yo to na longori, a naxa na Misiraka faxesa, a fa a fure noxun meyenye kui.

¹³ Na kuye iba, Munsa man naxa mini, a Isirayilaka firin to sonxo ra. A naxa mixi maxorin nondi mu na naxan be, «I bariboore bonbofe munfe ra?»

¹⁴ A naxa a yaabi, «Nde i findixi mange nun kiitisa ra muxu xun ma? I wama n fan faxafe ne, alo i na Misiraka faxesa ki naxe?» Munsa naxa gaaxu. A naxa a fala a boje ma, «N naxan nabaxi a bara kolon.»

¹⁵ Firawuna to a kolon Munsa naxan nabaxi, a naxa kata Munsa faxade. Kono Munsa naxa a gi Firawuna ma, a sa sabati Madiyan boxi ma. Munsa to siga naa, a naxa kolonyi nde li, a fa doxo a xa a malabu.

¹⁶ Madiyan serexedube xa di gine solofere naxa fa ye bade na kolonyi yire e baba xa xurusee be.

¹⁷ Kono xuruse demadonyi ndee fan naxa fa, e naxa wa na ginεe kerife. Munsa to na to, a naxa keli, a na ginεe xun magere so, a fa ye fi e xa xurusee ma.

¹⁸ Na ginεe to gbilen e baba Reyuweli yire, a naxa e maxorin, «Munse a niyaxi wo gbilenxi sinnanyi ma to?»

¹⁹ E naxa a yaabi, «Misiraka nde bara muxu ratanga xuruse demadonyi kobie ma, a man fa ye ba won ma xurusee be.»

²⁰ Reyuweli naxa a xa di ginεe maxorin, «A na minden? Wo a luxi naa munfe ra? Wo sa a xili, wo donse so a yi ra.»

²¹ Munsa naxa tin sabatide Reyuweli xonyi. Reyuweli naxa a xa di ginεe Sipora fi Munsa ma, a xa a doxo.

²² Sipora naxa di xeme bari a be. Xone nan to lanxi Munsa ma na boxi ma, a naxa a xa di xili sa Gerisomi, naxan wama a falafe, «Xone nan n na yi boxi ma.»

²³ Ne wuyaxi dangi xanbi, Misira mange naxa faxes. Isirayilakae nu e mawafe Ala be e xa konyiya xoxoxe xa fe ra. Na maxandi naxa Ala li.

²⁴ Ala naxa e wa xui me. A naxa ratu a xa saate ma naxan xirixi a tan nun Iburahima, Isiyaga, nun Yaxuba tagi.

²⁵ Na kui Ala naxa a ya rafindi Isirayilakae ma, a xa a pengi sa e xon ma.

3

Munsa xa xeraya

¹ Munsa bitanyi Yetiro nan nu na Madiyan serεxεdube ra. Munsa naxa Yetiro xa xurusee xanin wula i yire makuye, han a sa Ala xa geya Xorebe li.

² Menni Alatala xa maleke naxa mini a ma wuri bili lanmadi ma, naxan radεxεxi. Munsa naxa a mato, tε nu na na wuri bili ma, kɔnɔ wuri bili mu ganxi.

³ Munsa naxa a fala a yetε ma, «N xa n makɔrε yi kaabanako ra, n xa a kolon munfe ra wuri bili lanma mu ganxi.»

⁴ Alatala to Munsa to a makɔrɔxi wuri bili ra alako a xa a igbε, a naxa a xili kelifε na wuri bili ma, «Munsa, Munsa!» Munsa naxa a ratin, «N tan nan ya.»

⁵ Ala naxa a masen a bε, «I naxa i makɔrε be ra. Sankirie ba, barima i tixi yire seniyenxi nan ma.»

⁶ A man naxa a masen, «I baba Marigi Ala na n tan na, Iburahima, Isiyaga, nun Yaxuba Marigi Ala.» Munsa to na mε, a naxa a yatagi makoto, barima a nu gaaxuxi Ala matofe ra.

⁷ Alatala man naxa yi masenyi ti Munsa bε, «N bara n ma jama xa tɔɔrε to Misira bɔxi ma. N bara e wa xui mε e xa konyiya kui. N jεngi saxi e xa tɔɔrε xɔn ma.

⁸ N goroxi na nan ma, n xa fa e bade Misirakae yi ra, n xa e raso bɔxi fanyi ma, lude gbegbe na dennaxε. Xiηε nun kumi gbo naa, Kanaankae, Xitikae, Amorikae, Perisikae, Hiwikae nun Yebusukae xɔnyi.

⁹ Yakɔsi Isirayilakae wa xui bara n li. N man bara jaxankate to Misirakae naxan dɔxofe e ma.

¹⁰ Siga, n bara i xee Firawuna xon, i xa n ma pama Isirayila ramini Misira.»

¹¹ Munsa naxa a fala Ala be, «Mixi mooli mundun na n tan na, n xa siga Firawuna ma Isirayilakae ramini ra Misira?»

¹² Ala naxa a yaabi, «Won birin na a ra. I na ge pama ramini Misira boxi ma, wo fama n batude yi geya nan fari. Na findima tonxuma ra, fa a fala, n tan yati nan i xeexi.»

¹³ Munsa naxa a fala Ala be, «N na sa a fala Isirayilakae be, <Wo benbae Marigi Ala nan n xeexi wo ma,> e fa sa n maxarin i xili ma, n yaabi mundun fima e ma?»

¹⁴ Ala naxa a masen Munsa be, «N na <naxan na> na. I xa Isirayilakae yaabi, <Ala naxan na, a bara n xee wo ma.>»

¹⁵ Ala man naxa a masen Munsa be, «I fama woyende yi ki ne Isirayilakae be, <Wo benba Iburahima, Isiyaga, nun Yaxuba Marigi Alatala, Ala naxan na, na nan n xeexi wo ma.> N xili nan na ki abadan, n wama mixi birin xa n xili na ki ne temui birin.

¹⁶ Sa Isirayila kungie malan, i a fala e be, <Wo benba Iburahima, Isiyaga, nun Yaxuba Marigi Alatala bara mini n ma. A bara a masen n be, «N bara fe to e naxan doxofo wo ma Misira.

¹⁷ N bara nate tongo wo ramini ra Misira wo xa toore kui. N xa wo xanin Kanaankae, Xitikae, Amoriakae, Perisiakae, Hiwikae, nun Yebusukae xonyi, xipe nun kumi xelema dennaxe.»»

¹⁸ «Isirayila kungie na ge i xui ramede, wo sigama ne Misira mange yire a falafe ra, <Isirayilakae Marigi Alatala bara fa muxu foxo ra. I xa muxu sago sa muxu xa feepen saxan jere

raba gbengberenyi ma, alako muxu xa serexee ba muxu Marigi Alatala be.»

¹⁹ N a kolon Misira mange mu tinma wo lude wo xa siga, xa n mu n senbe masen a be.

²⁰ Na kui n fe magaaxuxie rabama ne Misirakae ra, n e tɔɔɔ kaabanakoe ra. Na dangi xanbi, e xa mange tinma ne wo xa siga.

²¹ N man a ragirima ne Misirakae xa wo ki, alako wo naxa siga wo belexe igeli ra.

²² Isirayila gine birin xa e doxoore Misirakae makula yirabase gbeti nun xema daaxie ra, a nun sosee, wo naxee soma wo xa die ma. Na kui wo harige bama ne Misirakae yi ra.»

4

Alatala a senbe masenfe Munsa be

¹ Munsa naxa Alatala maxɔrin, «Xa Isirayilakae mu sa la n ma masenyi ra, e fa a fala, <Alatala mu minixi i ma feo,> n munse rabama fa?»

² Alatala naxa a maxɔrin, «Munse na i belexe na ki?» A naxa a yaabi, «N ma yisuxuwuri.»

³ Alatala naxa a yamari, «A woli boxi.» A to a woli boxi, na naxa mafindi boximase ra, Munsa fa a gi a ya ra.

⁴ Alatala naxa a masen a be, «I belexe itala i xa a suxu a xuli ma.» Munsa naxa a belexe itala. A to a suxu a belexe ra, na naxa findi yisuxuwuri ra.

⁵ Alatala naxa a masen a be, «Na findima tonxuma ra e be, fa a fala, e benba Ibrahima, Isiyaga, nun Yaxuba Marigi Alatala bara mini i ma.»

⁶ Na dangi xanbi, Alatala man naxa a masen a be, «I belexe sa i kanke ma i xa donma bun ma.» A to na raba, a fa a ramini, kune a belexe rafixexi.

⁷ A man naxa a yamari, «I man xa i belexe sa i kanke ma i xa donma bun ma.» A to na raba, a belexe naxa yalan keren na.

⁸ Alatala naxa a masen a be, «Xa Isirayilakae mu la i xui ra, xa na mu a ra na tonxuma singe ra, temunde e fama ne lade i ra na tonxuma firin nde xa fe ra.

⁹ Xa e mu la i xui ra na tonxuma firinyie xa fe ra, i xa ye tongo Nili xure, i a rafili boxi ma. A findima ne wuli ra keren na.»

¹⁰ Munsa naxa Alatala yaabi, «N Marigi, i a kolon i xa konyi mu fata woyende. N nenyi binya n de i kabi n dimedi temui. To masenyi mu na fe masaraxi.»

¹¹ Alatala naxa a masen a be, «Nde mixi nenyi rakelima? Nde mixi findima boboe ra, xa na mu tulixori? Nde mixi findima ya kanyi ra, xa na mu donxui? N tan Alatala xa mu a ra?

¹² Siga. N i malima masenyi tide. N masenyi yati rasoma ne i de i, i naxan tima.»

¹³ Munsa naxa a yaabi, «N Marigi, yandi, mixi gbete xee.»

¹⁴ Na kui Alatala naxa xono Munsa ma. A naxa a masen a be, «I taara Haruna go? Lewi bonsoe mu a ra? N a kolon, na tan fata woyende. A jan na fafe i ralande. A ssewama ne i tofe ra.

¹⁵ I masenyie tima ne a be, a naxan falama nama be. N wo firin malima na kui. N a masenma wo be wo lan wo xa naxan fala.

16 Haruna i xui madangima n̄ama bɛ, alo namijɔnmɛ Ala xui madangima ki naxɛ.

17 I xa i xa yisuxuwuri tongo. I kaabanako birin nabama a tan na.»

Munsa gbilenfe Misira

18 Na tɛmui Munsa naxa gbilen a bitanyi xonyi, a a fala a bɛ, «N wama sigafe ngaxakerenyie yire Misira bɔxi ma, n xa a kolon e xa fe na ki naxɛ.» Yetiro naxa a yaabi, «Siga bɔnɛsa kui.»

19 Alatala nu bara a masen Munsa bɛ Madiyan bɔxi ma, «I xa gbilen Misira. Naxee nu wama i faxafe, nee birin bara faxa.»

20 Na kui Munsa naxa a xa ginɛ nun a xa die baki sofalee fari, e gbilen Misira. Munsa naxa a xa yisuxuwuri fan xanin, Ala naxan ma fe fala a bɛ.

21 Alatala naxa yi masenyi ti Munsa bɛ, «I na gbilen Misira, i xa kaabanako birin naba Firawuna ya i, n naxee saxi i sagoe. Na tɛmui n tan nan a xaxili raxɔrɔxɔma, alako a naxa tin n ma n̄ama bɛpinde.

22 I xa a fala Firawuna bɛ, «Alatala xui nan ya, Isirayila, n ma di singe nan a ra.

23 N bara i yamari i xa a bɛpin alako a xa siga n batude. I to bara tondi na ra, n i xa di singe faxama nɛ.»

24 Munsa to nu na biyaasi kui sigafe ra Misira, Alatala naxa mini a ma kɔɛ ra, a xa a faxa,

25 kɔnɔ Munsa xa ginɛ Sipora naxa a xa di xɛmɛ sunna gɛmɛ xɛpɛnxi ra, a na soli sa a sanyi ma. A naxa a fala, «N ma mɔri nan i ra, muxu nun naxan wuli keren.»

²⁶ Na kui Alatala naxa Munsa lu na. Sipora xa masenyi, «N ma mōri nan i ra, muxu nun naxan wuli keren,» a nu wama sunne wuli nan xa fe falafe.

²⁷ Alatala naxa a masen Haruna be, «I xa siga Munsa ralande gbengberenyi ma.» A to naralan Munsa ra Ala xa geya ma, a naxa a sunbu.

²⁸ Munsa naxa Alatala xa xεεraya birin ya ba a be. A naxa na kaabanako fee fan fala a be, Ala naxan fixi a ma a rabafe ra.

²⁹ Munsa nun Haruna to Isirayilakae li, e naxa Isirayila fori birin malan.

³⁰ Haruna naxa dentεge sa e be Alatala naxan masenxi Munsa be. A naxa kaabanakoe fan naba nama ya xōri.

³¹ Nama naxa la na birin na. E to a kolon a Alatala jengi saxi Isirayilakae xōn ma e xa tōore kui, e naxa e igoro bōxi, e suyidi Ala be.

5

Munsa nun Haruna sigafe Firawuna yire

¹ Na dangi xanbi, Munsa nun Haruna naxa siga Firawuna yire. E naxa a fala a be, «Isirayila Marigi Alatala xa masenyi nan ya, <N ma nama bejin, alako e xa siga n ma sali rabade gbengberenyi ma.>»

² Firawuna naxa yi maxōrinyi ti, «Nde tan na na Alatala ra, n lan n xa naxan xa yaamari rabatu Isirayila bejinfe ra? N mu Alatala kolon! Na kui, n mu nōma a lude Isirayila xa siga fefe ma!»

³ E naxa a fala a be, «Isirayila Marigi Ala bara fa muxu fōxō ra. A lu muxu xa biyaasi xi saxan gbengberenyi yire, alako muxu xa sεrexeε

ba muxu Marigi Alatala bɛ, xa muxu mu na raba muxu sɔntoma nɛ wuganyi ra, xa na mu santidɛgɛma ra.»

⁴ Misira mangɛ naxa e yaabi, «Munsa nun Haruna, munfe ra wo wama pama bafe wali dɛ i? Wo siga wo xa wali ra.

⁵ Yi pama to bara gbo yɛ yi bɔxi ma, wo wama e xa wali nan xun nakanafe fa.»

⁶ Na lɔxɔɛ Firawuna naxa konyie xa mangɛɛ nun wali xunyie yamari,

⁷ «Wo naxa sɛxɛ so Isirayila pama yi ra sɔnɔn, e naxan malanma boora ra e biriki bɔnbɔma tɛmui naxɛ. Yakɔsi e xa na sɛxɛ fen e yetɛ ra.

⁸ E dari biriki xasabi naxan bɔnbɔ ra, wo naxa sese ba na ra. Fuyante nan e ra. Na nan a ra, e a falama, «Muxu xa siga sɛrɛxɛ bade muxu Marigi Ala bɛ.»

⁹ Wo xa nde sa e xa wali xun ma, alako e naxa yanfa wali ma madaxui wɔyenyi xa fe ra.»

¹⁰ Konyi xa mangɛɛ nun wali xunyie naxa a fala Isirayila pama bɛ, «Firawuna naxɛ a a mu sɛxɛ soma wo yi ra sɔnɔn.

¹¹ Wo xa siga na fende wo yetɛ ra. Wo xa a kolon sese mu bama wo xa wali kote ra.»

¹² Na kui pama naxa yensen Misira bɔxi sɛxɛ xabade.

¹³ Mangɛɛ nu e ragbatama nɛ, e nu fa a fala, «Wo xa wo xa wali rapɔn lɔxɔ yo lɔxɔ alɔ a singe, sɛxɛ nu soma wo yi ra tɛmui naxɛ.»

¹⁴ Firawuna xa mixie nu fa Isirayilakae bɔnbɔ naxee nu tixi wali xunyie ra. E nu fa e maxɔrin, «Munfe ra xoro nun to, wo mu biriki xasabi bɔnbɔxi alɔ wo darixi a ra ki naxɛ?»

¹⁵ Isirayila wali xunyie naxa siga e mawade Firawuna xɔn a falafe ra, «I na yi mooli rabafe muxu tan i xa konyie ra munfe ra?

¹⁶ E mu sɛxɛ yo soma muxu yi ra, kɔnɔ e a falama a muxu xa biriki bɔnbɔ! I xa mixie na muxu tan i xa konyi bɔnbɔfe, kɔnɔ e tan nan wali kanaxi.»

¹⁷ Firawuna naxa e yaabi, «Fuyantee nan wo ra. Na nan a toxi wo a falama, a wo xa siga sɛrɛxɛ bade Alatala bɛ.

¹⁸ Wo siga walide! Sɛxɛ yo mu soma wo yi ra, sese man mu bama wo xa biriki konti ra.»

¹⁹ Isirayila wali xunyie naxa kontɔfili na wɔyɛnyi ra, a falafe ra, «Sese mu bama birikie konti ra wo naxan bɔnbɔma lɔxɔ yo lɔxɔ.»

²⁰ E to mini Firawuna xɔnyi, e naxa Munsa nun Haruna li naa. E nu na e mɛmɛfe.

²¹ Na wali xunyie naxa a fala e bɛ, «Alatala xa wo naxankata, barima wo bara muxu mapaaxu Firawuna nun a xa mixie xɔn ma. Wo bara santidegema sa e bɛlɛxɛ, e xa muxu faxa.»

²² Munsa naxa gbilen Alatala ma a falafe ra, «Marigi, i bara yi tɔɔrɛ dɔxɔ yi pama ma munfe ra? I n xɛɛxi be munfe ma?

²³ Kabi n naxa siga Firawuna yire wɔyɛnfe ra i xili ra, a fa fe paaxi nan tun nabafe yi pama ra. I mu i xa pama xɔrɛyaxi feo.»

6

Ala xa laayidi Munsa bɛ

¹ Alatala naxa a masen Munsa bɛ, «I fama a tode yakɔsi, n naxan nabama Firawuna ra. N

senbe nan fama a niyade a xa Isirayila nama bepin, a yete xa e keru a xa boxi ma.»

² Ala man naxa a masen Munsa be, «N tan nan Alatala ra.

³ N naxa n yete masen Iburahima, Isiyaga, nun Yaxuba be. Kono e mu n n xili kolonxi Alatala ra. E n kolonxi Ala Senbema xili nan na.

⁴ Muxu man naxa saata, n xa Kanaan boxi fi e ma, e xoreya rabaxi dennaxe.

⁵ N bara Isirayilakae wa xui me e xa konyiya kui Misirakae yi ra. N man bara ratu n ma saate ma.

⁶ Na kui, a fala Isirayilakae be, «N tan nan Alatala ra. N fama ne wo raminide Misirakae xa ne bun ma. N xoreya fima ne wo ma. N fama ne wo xun sarade n senbe ra. N jaxankate ragoroma ne Misirakae ma e xa wali kobie xa fe ra.

⁷ N wo findima ne n ma nama ra. N fan findima ne wo Marigi ra. Na temui wo a kolonma ne, n tan nan na wo Marigi Alatala ra, naxan wo baxi konyiya kui Misirakae yi ra.

⁸ N fama ne wo rasode boxi ma, n nakalixi naxan ma fe ra, n xa a fi Iburahima, Isiyaga, nun Yaxuba ma. N fama ne a fide wo ma, a lu wo sagoe.»

⁹ Munsa naxa na dentegε Isirayilakae be, kono e mu la a xui ra e xa konyiya xoxoxe xa fe ra. Limaniya birin nu bara ba e yi.

¹⁰ Alatala naxa a masen Munsa be,

¹¹ «Siga Misira mange yire. A fala Firawuna be a xa Isirayila nama bepin, e xa mini a xa boxi ra.»

¹² Kono Munsa naxa Alatala yaabi, «Xa Isirayilakae yati mu laxi n xui ra, Firawuna fan mu

n xui suxuma feo, n tan naxan jan mu fata woyende.»

¹³ Alatala masenyi ti Munsa nun Haruna be na ki ne, Isirayilakae nun Misira mange Firawuna xa fe ra. A e yamari ne e xa Isirayilakae ramini Misira boxi ra.

¹⁴ Isirayila bonsoe yareratie nan yi ki:

Ruben naxan singe bari Isirayila, a xa die nan ya: Xanoki, Palu, Xesiron, nun Karimi. Ruben bonsoe nan na ki.

¹⁵ Simeyon xa die nan ya: Yemuweli, Yamin, Ohadi, Yakin, Soxara, nun gine Kanaanka xa di Sawulu. Simeyon bonsoe nan na ki.

¹⁶ Lewi xa die xilie nan yi ki e xa taruxui ki ma: Gerison, Kehati, nun Merari. Lewi xa simaya naxa je keme je tongo saxan a nun solofere li.

¹⁷ Gerison xa die findixi Libini nun Simeyi nan na e xabile ki ma.

¹⁸ Kehati xa die findixi Amarama, Yisehari, Xebiron, nun Yusiyeli nan na e xabile ki ma. Kehati xa simaya naxa je keme je tongo saxan a nun saxan li.

¹⁹ Merari xa die findixi Maxali nun Musi nan na. Lewi xa die nan na ki e taruxui ki ma.

²⁰ Amarama naxa a baba barenyi Yebedi doxo, naxan Haruna nun Munsa bari a be. Amarama xa simaya naxa je keme je tongo saxan a nun solofere li.

²¹ Yisehari xa die nan ya: Kora, Nefegi, nun Sikiri.

²² Yusiyeli xa die nan ya: Misayeli, Elesafana, nun Sitiri.

²³ Haruna naxa Aminadabo xa di Eliseeba doxo, naxan findixi Naxason maagine ra. A

naxa Nadabo, Abihu, Eleyasari, nun Itamari bari Haruna bɛ.

²⁴ Kora xa die nan ya: Asiri, Elekana, nun Abiyasafi a xabilɛ ki ma.

²⁵ Haruna xa di Eleyasari naxa Putiyeli xa di gine dɔxɔ. A naxa Finexasi bari a bɛ. Lewi bɔnsɔɛ yareratie nan na ki e xabilɛ ki ma.

²⁶ Alatala Haruna nun Munsa yamari nɛ, «Wo Isirayilakae ramini Misira bɔxi ra e lanxunde ki ma.»

²⁷ Munsa nun Haruna nan wɔyɛn Misira mangɛ Firawuna bɛ Isirayilakae ramnife ra Misira kui.

²⁸ Alatala naxa yi masenyi ti Munsa bɛ Misira bɔxi ma,

²⁹ «N tan nan na Alatala ra. Siga, n xui birin nadangi Misira mangɛ Firawuna ma.»

³⁰ Munsa naxa Alatala yaabi, «N tan nan yi ki, n mu fata wɔyɛnde a fanyi ra. Firawuna nɔma tinde n ma masenyi ra di?»

7

Ala xa xɛɛɛɛɛɛ Munsa bɛ

¹ Alatala naxa a masen Munsa bɛ, «Haruna xa i xui madangi Firawuna bɛ alɔ namijɔnmɛ Ala xui madangima mixie bɛ ki naxɛ.

² N i yamarima naxan birin na, i xa na fala i taara Haruna bɛ naxan na madangima Firawuna ma, alako a xa a lu Isirayilakae xa mini Misira bɔxi ra.

³ N Firawuna xaxili raxɔrɔxɔma nɛ. N tɔnxuma nun kaabanako gbegbe rabama nɛ Misira bɔxi kui,

⁴ kɔnɔ Firawuna mu fama a tuli matide wo ra. N fama ne ɲaxankate xɔrɔxɔe dɔxɔde Misira ma, n fa n ma ɲama Isirayila ramini a lanxunde ki ma.

⁵ N na Misira halaki Isirayila ramifera e tagi, e n kolonma ne Alatala ra.»

⁶ Munsa nun Haruna naxa Alatala xa yaamari suxu alo a masenxi e be ki naxe.

⁷ E nu masenyi tima Firawuna be temui naxe, Munsa xa simaya nu bara ɲe tongo solomasaxan li. Haruna xa simaya nu bara ɲe tongo solomasaxan a nun saxan li.

⁸ Alatala naxa a masen Munsa nun Haruna be,

⁹ «Firawuna na a fala wo be, <Wo xa kaabanako nde raba,> i tan Munsa, i xa a fala Haruna be, a xa i xa yisuxuwuri tongo, a a woli Firawuna seeti ma. Na mafindima ne bɔximase ra.»

¹⁰ Na kui Munsa nun Haruna naxa siga Firawuna yire, e fa a raba, alo Alatala e yamarixi ki naxe. Haruna naxa Munsa xa yisuxuwuri woli bɔxi ma Firawuna nun a xa kuntigie ya i, na naxa findi bɔximase ra.

¹¹ Na temui Firawuna naxa a xa karamɔxɔe nun a xa mandurulae xili, e xa na kaabanako mɔli raba e xa duureya ra.

¹² E nun Haruna birin naxa e xa yisuxuwurie woli bɔxi ma. Nee birin naxa mafindi bɔximasee ra, kɔnɔ Haruna gbe naxa boore gbe gerun.

¹³ Na kui Firawuna xaxili naxa xɔrɔxɔ, a mu a tuli mati Munsa nun Haruna ra, alo Alatala nu bara a masen ki naxe.

Mankanɛ singe: ye findife wuli ra

¹⁴ Alatala naxa a masen Munsa bɛ, «Firawuna xaxili bara xɔɔxɔ. A bara tondi n ma jama bɛpinde.

¹⁵ Tina gɛɛsɛgɛ i xa naralan Firawuna ra Nili xure dɛ. I xa i xa yisuxuwuri xanin, naxan nu bara mafindi bɔximase ra.

¹⁶ Menni i xa a fala Firawuna bɛ, «Isirayilakae Marigi Alatala bara n xɛɛ i yire, n xa a fala i bɛ, «N ma jama bɛpin, alako e xa siga n batude gbengberenyi ma.» Han yakɔsi i tan mu tinxi na xui suxude.

¹⁷ Na kui Alatala xa masenyi nan ya, «Na nan a ra, i fama a kolonde, n tan nan Alatala ra. N ma yisuxuwuri na din Nili xure ra, ye mafindima nɛ wuli ra.

¹⁸ Yɛxɛ naxee na Nili xure ma, e fama sɔntɔde, e xiri jaaxi fa mini, Misirakae mu nɔma na ye minde.»»

¹⁹ Alatala naxa a masen Munsa bɛ, «Haruna yamari, «I xa i xa yisuxuwuri itala Misira baae, xuree, nun dabonyi birin ma.» Na a niyama nɛ ye birin xa mafindi wuli ra Misira bɔxi ma, hali naxee na fɛɛɛ kui, wuri nun gɛmɛ daaxi.»

²⁰ Munsa nun Haruna naxa a raba alɔ Alatala e yamarixi ki naxɛ. Haruna naxa a xa yisuxuwuri itala, a a din Nili xure ra. Xure naxa findi wuli ra Firawuna nun a xa kuntigie ya xɔri.

²¹ Yɛxɛ birin naxa faxa, e xiri jaaxi naxa mini Nili xure ma. Misirakae mu nu nɔma na ye minde, barima Misira ye birin findixi wuli nan na.

²² Mandurulae fan naxa na kaabanako mɔɔli raba. Firawuna xaxili naxa xɔɔxɔ, a mu tin

Munsa nun Haruna xui ra, alo Alatala nu bara a masen ki naxe.

²³ Firawuna naxa gbilen a xonyi, a naxa na fe bote ba.

²⁴ Misiraka birin naxa tiglie ge Nili xure setie ma, alako e xa ye min daaxi soto, barima e mu nu noma Nili xure ye minde.

Mankane firin nde: lanxansarimae

²⁵ Alatala to ge Nili xure garinde, xi solofere dangi xanbi,

²⁶ a naxa a masen Munsa be, «I xa siga Firawuna yire, a fala a be, «Alatala bara a yamari, i xa a xa nama bejin, e xa siga a batude.

²⁷ Xa i mu tin na ra, Alatala fama i xa boxi birin xun nakanade lanxansarimae ra.

²⁸ E fama yiriwade Nili xure ma, e fa te, e so i xa banxi kui han e i xa sade li. E soma i xa kuntigie nun Misira nama xa banxie kui, e man soma taami rafalama dennaxe.

²⁹ Lanxansarimae fama ne tede i tan, i xa nama, nun i xa kuntigie birin ma.»»

8

¹ Na temui Alatala naxa a masen Munsa be, «A fala Haruna be, a xa a xa yisuxuwuri itala baae, xuree, nun dabonyi birin xun ma alako lanxansarimae xa te Nili xure ma, e so Misira boxi ma.»

² Haruna to a xa yisuxuwuri itala Misira yee xun ma, lanxansarimae naxa te Misira boxi birin ma.

³ Mandurulae fan naxa na kaabanako mooli raba, e fan naxa lanxansarimae raso Misira boxi ma.

⁴ Na dangi xanbi Firawuna naxa Munsa nun Haruna xili, a a fala e be, «Wo sa Alatala maxandi, alako lanxansarimae xa keli n tan nun n ma pama xun ma. N fama i xa pama rabɛpinde, e xa siga sɛrɛxɛɛ bade Alatala be.»

⁵ Munsa naxa a fala Firawuna be, «Mange, i gbe binye. I xa nate tongo lɔxɔɛ safe ra lanxansarimae xa keli i tan, i xa kuntigie, nun i xa pama xun ma, e xa lu Nili xure gbansan ma.»

⁶ A naxa a yaabi, «Tina.» Munsa naxa a fala, «A fama rabade na ki ne, alako i xa a kolon, muxu Marigi Alatala maniye mu na.

⁷ Lanxansarimae fama kelide i tan, i xa kuntigie, nun i xa pama xun ma, e fa lu Nili xure ma.»

⁸ Munsa nun Haruna to mini Firawuna xɔnyi, Munsa naxa Alatala maxandi lanxansarimae xa fe ra naxee nu Firawuna tɔɔɔma.

⁹ Alatala naxa Munsa xa maxandi suxu. Lanxansarimae naxa faxa banxie, xandɛɛ, nun daaxae kui.

¹⁰ Mixie naxa e koto, e xiri paaxi fa din bɔxi birin na.

¹¹ Kɔnɔ Firawuna to a to na fe nu bara dangi, a man naxa a xaxili raxɔrɔxɔ, a mu tin Munsa nun Haruna xui ra, alɔ Alatala a masen ki naxɛ.

Mankanɛ saxan nde: saasie

¹² Na temui Alatala naxa a masen Munsa be, «A fala Haruna be a xa a xa yisuxuwuri itala, a xa din bɔxi xube ra alako a xa mafindi saasie ra Misira bɔxi birin kui.»

¹³ E naxa a raba na ki. Haruna to a xa yisuxuwuri itala, a fa bɔxi xube garin, na birin naxa findi saasie ra, mixie nun xurusee foxɔ ra.

Xube birin naxa findi saasie ra Misira boxi birin kui.

¹⁴ Mandurulae to kata na kaabanako mooli rabade, e mu no. Saasie nu dinxi mixi nun xuruse birin na.

¹⁵ Mandurulae naxa a fala Firawuna be, «Ala foxi yati nan na ki,» konon Firawuna xaxili man naxa xoxoxo, a mu tin Munsa nun Haruna xui ra, alo Alatala a masenxi ki naxe.

Mankane naani nde: xerie

¹⁶ Na temui Alatala naxa a masen Munsa be, «Tina geesege i xa kurun, i xa naralan Firawuna ra ye yire. I xa a fala a be Alatala xa masenyi nan ya, «N ma pama bepin, alako e xa siga n batude.

¹⁷ Xa i mu sa tin n ma pama bepinde, n fama xerie nan nadinde i tan, i xa kuntigie, nun i xa pama ma wo xonyi. Xerie fama lude Misirakae xa banxie nun e xa boxie birin ma.

¹⁸ Konon na loxo, Gosen boxi ratangama ne, n ma pama na dennaxe. Xerie mu luma naa, alako i xa a kolon a n tan Alatala na yi boxi yire birin ma.

¹⁹ N tagi rasa luma ne n ma pama nun i gbe ma. Wo na kaabanako toma ne tina.»»

²⁰ Alatala a raba na ki ne. Xerie naxa din Firawuna, nun a xa kuntigie ra. Misira boxi birin xun naxa rakana xerie ra.

²¹ Firawuna naxa Munsa nun Haruna xili, a a fala e be, «Wo xa siga serexe bade wo Marigi Ala be Misira.»

²² Munsa naxa a yaabi, «Na mu lanma, barima muxu xa serexee mu rafan Misirakae ma. Xa muxu na serexe mooli ba Misirakae ya xori e naxee xonxi, e mu muxu magonoma xe?

²³ A lanma muxu xa xi saxan biyaasi raba gbengberenyi ma, muxu fa serexee ba muxu Marigi Alatala be, alo a muxu yamarixi ki naxe.»

²⁴ Firawuna naxa a fala Munsa be, «N fama wo bepinde, alako wo xa siga gbengberenyi ma serexee bade wo Marigi Alatala be. Kono wo naxa wo makuya a gbe ra. Yakosi, wo Ala maxandi n be.»

²⁵ Munsa naxa a yaabi, «N bara tin. N na mini i xonyi, n Alatala maxandima ne. Tina, xerie makuyama ne Firawuna, a xa kuntigie, nun a xa jama ra. Kono i tan Firawuna, i naxa muxu madaxu. I naxa tondi Isirayila jama bepinde alako e xa serexee ba Alatala be.»

²⁶ Munsa to mini Firawuna xonyi, a naxa Alatala maxandi.

²⁷ Alatala naxa Munsa xa duba suxu. Xerie naxa makuya Firawuna, a xa kuntigie, nun a xa jama ra. Hali keren mu lu naa.

²⁸ Kono Firawuna man naxa a xaxili xoxoxo, a mu tin Isirayila jama bepinde.

9

Mankanɛ suuli nde: xurusee xa wuganyi

¹ Na temui Alatala naxa a masen Munsa be, «I xa siga Firawuna yire, i xa a fala a be, «Isirayilaka Marigi Alatala xa masenyi nan ya, «I xa n ma jama bepin, alako e xa siga n batude.»

² Xa i tondi e bepinde, i kankan e ma,

³ Alatala fama wuganyi jaaxi radinde i xa xurusee ma, alo soe, sofalee, joxomee, ningee, yexeee, nun si.

⁴ Alatala fama Isirayilakae xa gōore nun Misirakae xa gōore tagi rasade. Isirayilakae xa xurusee mu wuganyi sōtoma.

⁵ Alatala bara nate tongo na rabama temui naxe, a falafe ra, «Tina, n fama na nan nabade.»»

⁶ Na kuye iba, Alatala a raba na ki ne. Misira gōore birin naxa faxa, kōno hali xuruse keren mu faxa Isirayilakae xa gōore ya ma.

⁷ Firawuna naxa mixie xee na fe kolonde. E naxa a fala Firawuna be xuruse keren mu faxaxi Isirayilakae xa gōore kui, kōno a xaxili naxa xōrōxō, a man mu tin Isirayila jama bepinde.

Mankane senni nde: suurie

⁸ Na temui Alatala naxa a masen Munsa nun Haruna be, «Wo xa te xube rate Firawuna ya xōri.

⁹ A findima xube ra naxan dinma Misira bōxi birin na, a suuri ramini Misirakae nun e xa xurusee birin ma.»

¹⁰ E naxa te xube xanin Firawuna yire. Munsa naxa a woli koore ma, a fa suuri jaaxie ramini mixie nun xurusee ma.

¹¹ Mandurulae yati mu nō tide Munsa ya i suurie xa fe ra, naxee nu na Misirakae birin ma.

¹² Kōno Alatala naxa Firawuna xaxili raxōrōxō, alako a naxa tin Munsa nun Haruna xui suxude, alō Alatala nu bara a masen Munsa be ki naxe.

Mankane solofere nde: balabalanyi

¹³ Na temui Alatala naxa a masen Munsa be, «Tina i xa kurun sigafe ra Firawuna yire, a fala a be, «Isirayila Marigi Alatala xa masenyi nan ya, «N ma jama bepin, e xa siga n batude,

14 xa na mu a ra n gbaloe mɔoli birin naminima i tan, i xa kuntigie, nun i xa pama ma n senbe ra. Na kui i fama a kolonde n maniyɛ mu na dunija bende fuɲi fari.

15 N nu nɔma gbaloe jaaxi raminide wo ma n senbe ra, naxan nu nɔma wo sɔntɔde, wo lɔɛ dunija ma,

16 kɔnɔ n bara wo lu dunija alako n xa n senbe masen wo be, dunija xa n xili kolon.

17 Han ya i kira bolonma n ma pama ya ra, i tondi e xa siga.

18 Na nan a ra, tina n fama ne balabalanyi magaaxuxi ragorode Misira ma, wo mu naxan mɔoli to kabi dunija fɔle.

19 I xa i xa gɔɔre nun i xa se birin naso yire makantaxi kui, barima yi balabalanyi na bira, a mixi nun xuruse birin sɔntɔma ne.»»»

20 Firawuna xa kuntigi ndee naxa gaaxu Alatala xa masenyi ya ra, e xulun e xa konyie nun e xa xurusee rasode yire makantaxi kui.

21 Kɔnɔ naxee mu nu e pɔxɔ saxi Alatala xa masenyi xɔn ma, e naxa e xa konyie nun e xa xurusee lu tande.

22 Alatala naxa a masen Munsa be, «I belexe itala koore mabiri, balabalanyi xa bira mixi, xurusee, nun xee fari Misira bɔxi birin ma.»

23 Munsa to a xa yisuxuwuri itala koore ma, Alatala naxa seyamakonyi, galanyi, nun balabalanyi ragoro Misira bɔxi ma.

24 Balabalanyi masunbuxi te ra a naxa goro e ma. Misira bɔxi mu nu na gbaloe mɔoli to kabi a fɔle.

25 Na balabalanyi naxa mixie nun xurusee magoᅇ Misira boxi birin ma. A naxa xee nun wuri bilie fan kana.

26 Gosen boxi gbansan naxa ratanga na gbaloe ma, Isirayilakae nu na dennaxe.

27 Firawuna naxa Munsa nun Haruna xili, a fala e be, «Yi biyaasi, n bara yunubi raba. Nondi na Alatala nan be. N tan nun n ma jama bara tantan.

28 Wo xa Alatala madije, alako seyamakonyi nun balabalanyi xa jon. N bara tin wo bejinde, n mu kankanma wo ma sonon.»

29 Munsa naxa a fala a be, «N na mini taa kui, n Alatala maxandima wo be. Galanyi nun balabalanyi danma ne, alako i xa a kolon a Alatala nan gbe dunja ra.

30 Kono n bara a kolon, i tan nun i xa kungtie, wo mu gaaxuxi Marigi Alatala ya ra sinden.»

31 Na balabalanyi nu bara sansi funden maniyee nun gese futi kana, naxee mu nu mo sinden.

32 Mengi nun a maniyee tan mu kana, barima e tan temui mu nu a lixi.

33 Munsa naxa mini Firawuna xonyi, a siga taa fari ma. A to a belexe itala Alatala maxandide, galanyi, balabalanyi, nun tune naxa dan.

34 Firawuna to na to, a man naxa yunubi soto, barima a tan nun a xa kungtie naxa e xaxili raxorocho.

35 Na kui Firawuna mu tin Isirayilakae bejinde, alo Alatala a masenxi ki naxe Munsa saabui ra.

10

Mankanɛ solomasaxan nde: katoe

1 Alatala naxa a masen Munsa bɛ, «Siga Firawuna yire, barima n tan nan a xaxili nun a xa kuntigie xaxili raxɔrɔxɔ, alako n xa n ma tɔnxuma makaabaxie masen e bɛ.

2 N gbaloe naxan dɔxɔma Misirakae ma, wo xa na fala wo xa die nun wo xa mamadie bɛ, alako wo xa a kolon, n tan nan Alatala ra.»

3 Munsa nun Haruna naxa siga Firawuna xɔnyi, e a fala a bɛ, «Isirayila Marigi Alatala xa masenyi nan ya, <I tondima i yete magorode n bɛ han mun temui? I xa n ma jama bɛjin, e xa siga n batude.

4 Xa i mu e bɛjin, tina n katɔe radinma nɛ i xa bɔxi birin ma.

5 E bɔxi gbaata makotoma nɛ, e sansi nun wuri bili birin donma nɛ balabalanyi mu naxee lixi.

6 E fama sode i tan, i xa kuntigie, nun Misirakae birin xa banxie kui, alɔ wo benbae mu nu a toxi ki naxe kabi Misira fɔɛ.» Munsa to gɛ na falade, a naxa a kobe so, a mini Firawuna xɔnyi.

7 Firawuna xa kuntigie naxa a fala a bɛ, «Yi xɛmɛ won tɔɔrɔma han mun temui? I xa a xa jama bɛjin alako e xa siga e Marigi Alatala batude. Han ya i mu a kolon Misira na sɔntɔfe nɛ?»

8 Firawuna naxa Munsa nun Haruna xili, a a fala e bɛ, «Wo siga, wo sa wo Marigi Alatala batu.» A man naxa e maxɔrin, «Ndee na sigafe wo ya ma?»

9 Munsa naxa a yaabi, «Muxu birin sigama nɛ: fonikee, forie, xɛmɛ, ginɛ, muxu xa xurusee. Alatala xa sali xungbe na a ra.»

10 Firawuna naxa e yaabi, «Wo wama nɛ n xa a fala wo bɛ, <Alatala xa wo kanta.> Xa n sa a lu

wo xa siga, wo nun wo xa die, n a kolon wo fe kobi rabama ne.

¹¹ N mu tinma na ra. Xeme gbansan noma sigade Alatala batude, barima wo na nan maxorinxi.» A to ge na falade, Firawuna naxa e keru.

¹² Alatala naxa a masen Munsa be, «I belexe itala Misira boxi xun ma, katoee xa fa. E xa burexe xinde birin don balabalanyi mu naxee lixi.»

¹³ Munsa naxa a xa yisuxuwuri itala Misira boxi xun ma, Alatala fa foye ramini yanyi nun kee keren kui kelifa sogetede. Na kuye iba, na foye nu bara fa katoee ra,

¹⁴ naxee din Misira boxi birin na. Katoee gbegebe naxa lu Misira yire birin. Han ya na fe maniye mu toxi, a man mu toma sonon.

¹⁵ E naxa boxi birin makoto han a iforo. E naxa burexe xinde nun wuri bogi birin don balabalanyi mu naxan lixi. Burexe xinde yo mu lu wurie nun sansie kon na Misira boxi ma.

¹⁶ Firawuna naxa Munsa nun Haruna xili mafuren. A naxa a fala e be, «N bara yunubi soto wo Marigi Alatala ra, n bara haake soto wo fan na.

¹⁷ Wo xa dije n ma, wo xa wo Marigi Alatala maxandi alako a xa yi toore ba n ma.»

¹⁸ Munsa naxa keli Firawuna yire, a naxa Alatala maxandi.

¹⁹ Alatala naxa turunnaade foye ramini, a katoe birin tutun sogorode, a sa e rasin Xulun-yumi Baa ma. Hali katoe keren mu lu Misira.

²⁰ Na dangi xanbi Alatala naxa Firawuna xaxili raxoroxo, alako a naxa Isirayilakae bepin.

Mankanɛ solomanaani nde: dimi

²¹ Na temui Alatala naxa a fala Munsa bɛ, «I bɛlexɛ itala koore ma, dimi binye xa sin Misira bɔxi ma.»

²² Munsa to na raba, dimi binye naxa sin Misira bɔxi birin ma. Xi saxan bun ma

²³ mixi mu nɔ a boore tode, mixi mu nɔ kelide a xɔnyi. Kɔnɔ Isirayilakae nu sabatixi dennaxɛ, menni tan iyalanxi.

²⁴ Firawuna naxa Munsa xili, a a fala a bɛ, «Wo xa siga Alatala batude. Wo nɔma wo xa die nun wo xa ginɛɛ xaninde, kɔnɔ wo xa wo xa xurusee tan lu be.»

²⁵ Munsa naxa a yaabi, «I xa tin muxu xa xurusee xanin muxu naxee bama sɛrɛxɛ ra muxu Marigi Alatala bɛ.

²⁶ Muxu xa gɔɔrɛ birin xa siga. Hali keren mu luma be. Ndee bama sɛrɛxɛ nan na muxu Marigi Alatala bɛ, kɔnɔ muxu mu a kolon sinden xurusee mundun rawalima na kui, fo muxu xa so naa.»

²⁷ Na dangi xanbi Alatala naxa Firawuna xaxili raxɔrɔxɔ, a mu tin e bɛɣinde.

²⁸ Firawuna naxa a fala Munsa bɛ, «Keli n xun ma! I yetɛ ratanga tife ra n ya i sɔnɔn. Xa n i to be, n i faxama nɛ.»

²⁹ Munsa naxa a yaabi, «A xa raba alo i a fala ki naxɛ. I mu n toma sɔnɔn.»

11

Marakolonyi mankanɛ fu nde ra: di singe faxɛ

¹ Alatala naxa a masen Munsa be, «N fama kaabanako donxoe ragorode Firawuna nun Misirakae ma. Na dangi xanbi, Firawuna wo bepinma ne, wo siga kerenyi ra.

² A fala nama be e xa e doxo boore makula gbeti nun xema ra.»

³ Alatala naxa a ragiri Misirakae xa tin Isirayilakae kide. Misira nama nun Firawuna xa kuntigie naxa gaaxu Munsa ya ra.

⁴ Munsa naxa a fala, «Alatala xa masenyi nan ya, <Koe tagi n Misira boxi igirima ne,

⁵ di singe birin fa faxa kelife Firawuna xa di singe ma, a sa doxo konyi ginne xa di singe ra. Firawuna tan mangeya fima a xa di ma, konyi ginne tan taami rafalama, konon e xa di singe birin fama ne faxade. Hali Misirakae xa xurusee xa di singee faxama ne.

⁶ Na temui Misira wa xui nde mema ne, e mu naxan mooli mexi temui dangixie, e mu naxan mooli mema temui naxee sa fama.

⁷ Konon Isirayilakae xonyi, hali bare keren mu wonwonma. Na kui wo xa a kolon n tagi rasa luxi Misirakae nun Isirayilakae tagi.

⁸ Na temui i xa kuntigie birin fama ne e xinbi sinde n bun ma, e a fala n be, a n tan nun n ma nama birin xa mini e xa boxi kui. N na ge na rabade, n sigama ne.» Munsa to ge na falade, a naxa keli Firawuna xun ma, a xonoxi ki fanyi ra.

⁹ Alatala nu bara a masen Munsa be, «Firawuna mu a tuli matima wo ra. Na kui n nan n ma kaabanakoe xun masama ne Misira boxi kui.»

¹⁰ Munsa nun Haruna nu bara na kaabanakoe birin naba Firawuna ya xori, konon Alatala bara

Firawuna xaxili raxoroxo, a mu tin Isirayilakae xa mini a xa boxi kui.

12

Sayamaleke Dangi Sali

¹ Alatala naxa a masen Munsa nun Haruna be Misira boxi ma,

² «Yi kike naxan ya, yi nan findima wo be je kike singe ra.

³ Wo xa a fala Isirayila nama birin be, yi kike xi fu, denbaya yo denbaya xa yexee keren soto.

⁴ Xa denbaya nde xurun, e mu noma na ra, e xa kafu e doxo boore ndee ma alako yexee keren xa e birin nali.

⁵ Na yexee xa findi xeme ra, naxan bara je keren soto, lanyuru yo mu naxan ma. Xa na mu a ra, wo noma si fan nawalide.

⁶ Wo xa a ragata han na kike xi fu nun naani. Na loxo Isirayila denbaya birin xa e gbe kon naxaba soge dula temui.

⁷ Wo xa a wuli maso naade gbanyi nun a seetie ma, a donma banxi naxan kui.

⁸ Na sube xa gan te ra, wo xa a don na ke ra taami lebinitare nun burexe xone ra.

⁹ Wo naxa a don a gantare ra, wo naxa a jin ye ra. Wo xa a birin gan a fanyi ra beenu wo xa a ixaba. A xunyi, a sanyie, nun a furingee xa gan temui keren.

¹⁰ Na sese naxa xi han geesege. Xa nde luxi, wo xa na woli te xora.

¹¹ Wo xa a don wo tagi ixirixi, wo xa sankirie soxi wo sanyie, a nun wo xa yisuxuwuri suxuxi wo belexe ra. Wo xa a don mafuren mafuren. Alatala xa Sayamaleke Dangi Sali serexe na a ra.»

12 «Na kɔɛ ra, n Misira bɔxi isama nɛ, n di singe birin faxa mixie nun xurusee ya ma. N Misira xa alae ɲaxankatama nɛ. N tan nan Alatala ra.

13 N na na wuli tɔnxuma to wo xa naadɛɛ ma, n dangima nɛ menni xun ma. Kasarɛ yo mu wo lima, n Misira bɔxi ratɔnma tɛmɔi naxɛ.»

14 «Na lɔxɔɛ xa findi sali xungbe nan na wo bɛ Alatala xa binyɛ bun ma. Wo xa na sali raba ɲɛ yo ɲɛ Alatala xa yaamari ki ma.

15 Na sali waxati wo xa taami lɛbinitare don xi solofere bun ma. Sali folɛ lɔxɔɛ, wo xa lɛbini birin namini wo xa banxie kui. Mixi yo naxan taami lɛbini daaxi donma na xi solofere bun ma, na kanyi xa ramini Isirayila pama ya ma.

16 Na sali lɔxɔɛ singe nun na sali lɔxɔɛ solofere nde, wo xa wo malan Alatala xa binyɛ bun ma. Na lɔxɔɛ firinyie, wo naxa wali yo raba bafe donse rafalafe ra.»

17 «Wo xa yi Taami Lɛbinitare Sali raba, barima n wo xa pama ramini Misira bɔxi ra na lɔxɔɛ nɛ. N bara wo yamari wo xa yi sali raba ɲɛ yo ɲɛ abadan.

18 Kike singe, xi fu nun naani, nunmare folɔ tɛmɔi, wo naxa taami yo don bafe taami lɛbinitare ra han a xi mɔxɔɲɛn nun keren, a nunmare tɛmɔi.

19 Na xi solofere bun ma, lɛbini yo naxa to wo xɔnyi, barima xɔɲɛ nun Isirayilaka birin naxan lɛbini donma na waxati bun ma, a raminama nɛ Isirayila pama ya ma.

20 Wo naxa taami lɛbini daaxi don dɛdɛ.»

21 Munsa naxa Isirayila fori birin xili, a a fala e bɛ, «Wo xa siga xuruse nde sɔtɔde wo xa

denbayae be. Wo xa e kon naxaba Sayamaleke Dangi Sali serexe ra.

²² Wo na ge xuruse kon naxabade, wo xa a wuli maso naade gbanyi nun naade setie ma hisopi burexe ra. Mixi yo naxa mini a xa banxi kui han gesege.

²³ Alatala na Misira boxi isa di singe faxafe ra, a dangima ne banxie xun ma, wuli na naxee naade gbanyi nun a setie ma. A mu tinma kanari yo xa so wo xonyi.

²⁴ Wo nun wo xa die xa yi yaamari ratinme ne yo ne abadan.

²⁵ Wo na so boxi kui Alatala naxan laayidixi wo be, wo xa yi sali raba a ki ma.

²⁶ Wo xa die na wo maxorin, <Yi sali munse masenma won be,>

²⁷ wo xa e yaabi, <Sayamaleke Dangi Sali serexe nan a ra. Won na rabama Alatala be naxan dangi Isirayilakae xa banxie xun ma Misira, alako e xa ratanga, Misirakae tan xa faxes.>>

Isirayila pama naxa a suyidi Alatala be.

²⁸ Isirayilakae naxa na yaamari ratinme alo Alatala a masenxi Munsa nun Haruna be ki naxe.

Mankans fu nde: di singe faxe

²⁹ Koe tagi Alatala naxa di singe birin faxa Misira boxi kui, kelife Firawuna kibanyi kanyi xa di singe ma, a sa doxo geelimani xa di singe ra. A naxa xuruse xa di singe fan birin faxa.

³⁰ Na kui Firawuna naxa keli koe ra, a tan, a xa kuntigie, nun Misirakae birin, e fa e wa xui rate, barima banxi keren mu lu faxe mu ti dennaxe.

³¹ Na koe ra Firawuna naxa Munsa nun Haruna xili, a a fala e be, «Wo nun Isirayilakae,

wo mini n ma pama ya ma. Wo siga, wo sa Alatala batu, alo wo nu wama a xon ma ki naxe.

³² Wo xa wo xa xurusee xanin, alo wo a falaxi ki naxe. Wo siga! Wo xa duba n fan be.»

³³ Misirakae nu gbataxi Isirayilakae xa siga. E nu a fala, «Xa e mu sigama, won birin fama ne sontode!»

³⁴ Na nan a ra Isirayilakae naxa taami ramulanxi mafilin e xa dugie kui, beenu taami xa te. E naxa taami nun taami ramulanse doxo e xun ma, e fa siga.

³⁵ Isirayilakae naxa gbeti, xema, nun dugie makula Misirakae ma alo Munsa a fala e be ki naxe.

³⁶ Alatala naxa a ragiri Misirakae xa tin Isirayilakae waxonfe ra. Na kui Isirayilakae naxa se gbegbe soto Misirakae yi ra.

Isirayilakae minife Misira

³⁷ Isirayilakae naxa keli Ramesesi, sigafe Sukoti. Xeme wulu keme senni nu na, bafe ginne nun dimedie ra.

³⁸ Mixi gbetee fan naxa bira e foxo ra, a nun goore gbegbe mooli birin.

³⁹ E naxa taami gan, na taami lebinitare ramulanxi ra, e faxi naxan na e xun ma kelife Misira. Na taami mu nu texi, barima Misirakae to e keru, e mu no fandε rafalade.

⁴⁰ Isirayilakae nu bara je keme naani je tongo saxan naba Misira.

⁴¹ Na je keme naani je tongo saxan jon loxoε yati, Alatala xa pama birin mini Misira boxi ra na ne.

⁴² Alatala to na koe radangi Isirayila pama raminife ra Misira, a lanma Isirayilakae birin xa

na koe xungbilenyi radangi Alatala matoxofe ra je yo je.

⁴³ Alatala naxa yi seriyε so Munsa nun Haruna yi ra Sayamaleke Dangi Sali xa fe ra, «Mixi yo naxa na serεεε don naxan mu findixi Isirayilaka ra.

⁴⁴ Wo xa konyi sunnaxie noma a donde,

⁴⁵ kono wo xa walike naxee kelixi yire gbete, e naxa a don.

⁴⁶ Na serεεε xa don banxi nan kui, wo naxa a sube xanin tande, wo naxa a xori yo gira.

⁴⁷ Isirayila pama birin xa Sayamaleke Dangi Sali raba.

⁴⁸ Xa wo xa xone nde wama Sayamaleke Dangi Sali rabafe Alatala xa binye bun ma, fo a xa xeme birin sunna a xa denbaya kui. Xa a bara na raba, a noma na sali rabade alo Isirayilakae. Kono sunnataree mu noma a donde.

⁴⁹ Lasiri nun xone birin na na seriyε bun ma.»

⁵⁰ Isirayilaka birin naxa a raba, alo Alatala Munsa nun Haruna yamarixi ki naxe.

⁵¹ Na loxoe yati, Alatala naxa Isirayilakae ramini Misira boxi ra, e lanxunde ki ma.

13

Di singe seriyε

¹ Alatala naxa a masen Munsa be,

² «Wo xa di singe birin fi n ma, a findi mixi ra, a findi xuruse ra. N tan nan gbe na Isirayilakae birin xa di singee ra.»

³ Munsa naxa a fala pama be, «Wo xa ratu to loxoe ma sali ra, barima Alatala senbe nan wo

raminixi Misira boxi ma konyiya kui. Wo naxa lebini yo don na loxoε.

⁴ Wo minixi to Abibi kike nan na.

⁵ Alatala na wo raso boxi kui, a naxan laayidixi wo benbae be, Kanaankae, Xitikae, Amorikae, Hiwikae nun Yebusukae sabatixi dennaxe, xipe nun kumi xelema boxi naxan ma, wo xa Taami Lebinitare Sali raba na kike ra.

⁶ Na sali waxati wo xa taami lebinitare gbansan don xi solofere bun ma. Na xi solofere nde, wo xa sali raba Alatala xa binye bun ma.

⁷ Na xi solofere bun ma taami lebinitare nan donma. Lebini yo naxa lu Isirayilaka nde xonyi.

⁸ Na loxoε wo xa yi sali xa fe fatanfasi wo xa die be, wo fa a fala, <N yi sali rabama ne, barima Alatala bara n namini Misira boxi ra.>

⁹ Yi sali luma ne wo be alo tonxuma naxan saxi wo belexe ma, xa na mu tonxuma naxan saxi wo tigi ma, alako wo naxa nεemu Alatala xa serye ma.

¹⁰ Wo xa yi sali raba a waxati je birin na.»

¹¹ «Alatala na wo raso Kanaankae xa boxi ma, a a fi wo ma alo a laayidixi wo tan nun wo benbae be ki naxe,

¹² wo xa wo xa di xeme singe birin fi Alatala ma, a nun wo xa xurusee xa di xeme singe. Wo xa di xemema singe birin findixi Alatala nan gbe ra.

¹³ Wo noma yexee xa na mu a ra si fide wo xa sofale xa di singe joxoe ra, xa na mu a ra wo xa a kobe gira, a xa faxa. Wo xa wo xa di singe fan xun sara yexee ra.

¹⁴ Xa a sa li wo xa di nde wo maxorinma a wo yi fe rabama fe naxan ma, wo xa a yaabi, <Alatala

senbe nan won naminixi konyiya kui Misirakae yi ra.

¹⁵ Firawuna to tondi muxu bepinde muxu xa siga, Alatala naxa Misira di singe birin faxa mixie nun xurusee ya ma. Na nan a ra won xurusee xa di singe birin fima Alatala ma serexe ra, a nun won ma di xeme singe birin xun sarama ne yexee ra.»

¹⁶ Na luma ne wo be alo tonxuma naxan saxi wo belexe ma, xa na mu tonxuma naxan saxi wo tigi ma, barima Alatala senbe nan wo raminixi Misira boxi ma konyiya kui.»

Kelifa Misira

¹⁷ Firawuna to Isirayila nama bepin, Alatala mu e xun ti Filisita boxi kira ra, hali na kira nan to soneya, barima a a fala ne, «Xa nama gere lima kira xon ma, e nate masarama ne, e fa gbilen Misira.»

¹⁸ Na kui Alatala naxa nama ya rafindi gbengberenyi kira ma Xulunyumi Baa mabiri. Isirayilakae naxa mini Misira e xa geresosee ra e yi ra.

¹⁹ Munsa naxa Yusufu xorie fan xanin, barima Yusufu nu bara Isirayila xa die rakali na fe ma, a falafe ra, «N a kolon, Alatala fama ne wo malide. Na temui wo xa n xorie xanin wo xun ma yire gbete.»

²⁰ Isirayilakae naxa keli Sukoti, e sa yonkin Etama gbengberenyi foloxi dennaxe.

²¹ Alatala nan nu tixi e ya ra. Yanyi ra a naxa e rapere nuxui ra, koe ra a naxa e rapere te dexa ra koore ma, naxan nu kuye iyalanma e be. Na ki e nu noma perede koe nun yanyi ra.

²² Lɔxɔ yo lɔxɔ na nuxui nu tixi e ya ra yanyi ra, na tɛ fan nu tixi e ya ra kɔe ra.

14

Misirakae Isirayilakae sagatafe

¹ Alatala naxa a masen Munsɔ be,

² «A fala Isirayilakae be e xa gbilen, e xa fa yonkin Pi Haxirɔti mabiri ra, Migidoli nun baa tagi. E xa lu baa de ra Baali Sefon ya ra.

³ Firawuna a maɔɔxunma ne, a Isirayilakae bara lɔe gbengberenyi mabiri.

⁴ N Firawuna xaxili raxɔɔxɔma ne, alako a xa bira wo fɔxɔ ra. Na kui n fama matɔxɔe sɔtɔde Firawuna nun a xa sɔɔrie saabui ra. Misirakae fama ne a kolonde a n tan nan na Alatala ra.» Isirayilakae a raba na ki ne.

⁵ Misira mange nun a xa kuntigie to a kolon, a Isirayilakae bara siga, e naxa nate masara, a falafe ra, «Won munse rabaxi yi ki? Won to Isirayilakae beɔnɔxi, e mu walima won be sɔnɔn!»

⁶ Firawuna naxa yaamari fi soe xa xiri sɔɔri ragisee ra, sɔɔrie xa malan yire keren.

⁷ A naxa sɔɔri ragise fanyi keme senni sugandi, sɔɔri ragise naxan birin na Misira e fa bira e fɔxɔ ra. Sɔɔri kuntigi nu bakixi e birin kui.

⁸ Alatala naxa Misira mange Firawuna xaxili raxɔɔxɔ, a fa bira Isirayilakae fɔxɔ ra, naxee nu sigafe xun nakeli kui.

⁹ Firawuna nun a xa sɔɔri birin naxa bira Isirayilakae fɔxɔ ra e xa soe nun e xa sɔɔri ragisee ra. Misirakae naxa e li baa de ra, e nu

yonkinxi dennaxɛ, Pi Haxiroti mabiri ra, Baali Sefon ya ra.

¹⁰ Firawuna to makɔrɛ e ra, Isirayilakae naxa e ya rakeli, e naxa Misirakae to fa ra. E naxa gaaxu ki fanyi ra, e fa e mawa Alatala bɛ.

¹¹ E naxa a fala Munsa bɛ, «I won naminixi Misira bɔxi ra munfe ra? Yakɔsi won faxama nɛ gbengberen yire. A mu nu fisa won xa faxa Misira?»

¹² Won nu na Misira bɔxi ma temui naxɛ, muxu a fala nɛ i bɛ, «Muxu walife Misirakae bɛ, na fisa muxu bɛ dinɛ faxafe ra gbengberenyi ma.»

¹³ Munsa naxa nama yaabi, «Wo naxa gaaxu, wo xa limaniya. To wo fama Alatala xa kisi tode. Misirakae naxee yi ki, wo mu e toma sɔnɔn.

¹⁴ Alatala nan gere soma wo bɛ. Wo sabari.»

¹⁵ Alatala naxa a masen Munsa bɛ, «I mawafe n bɛ munfe ra? A fala Isirayilakae bɛ, e xa ti kira xɔn ma.

¹⁶ I xa yisuxuwuri rate, a itala baa xun ma, alako baa xa rabi, Isirayilakae xa igiri bɔxi xaraxi ra.

¹⁷ N Misirakae xaxili raxɔrɔxɔma nɛ, alako e xa bira wo fɔxɔ ra. Na kui n matɔxɔɛ sɔtɔma Firawuna, a xa sɔɔrie, a xa sɔɔri ragisee, nun a xa soe ragimae saabui ra.

¹⁸ N na gɛ matɔxɔɛ sɔtɔde Firawuna, a xa sɔɔri ragisee, nun a xa soe ragimae saabui ra, Misirakae a kolonma nɛ a n tan nan na Alatala ra.»

¹⁹ Ala xa malekɛ naxan nu na sigafe Isirayila nama ya ra, a naxa gbilen e xanbi ra. Nuxui fan naxa keli e ya ra, a fa ti e xanbi ra

²⁰ Misirakae nun Isirayilakae tagi. Na nuxui naxa a niya Misirakae xa lu dimi kui, Isirayilakae tan xa lu naiyalanyi kui. E mu nō e makōrede e boore ra na kōe ra.

²¹ Munsa to a bēlēxe itala baa xun ma, Alatala naxa baa tutun kōe birin na foye xungbe ra kelife sogetede. A naxa kira xaraxi ramini baa tagi.

²² Isirayilakae dangima dennaxe, baa yee naxa malan e yirefanyi ma nun e kōola ma.

²³ Misirakae naxa e sagata. Firawuna xa soe, a xa sōori ragisee, nun a xa soe ragimae birin naxa bira e fōxō ra baa tagi.

²⁴ Subaxe ma, Alatala naxa a ya rasiga Misira xa sōorie ma kelife koore ma, tē nun nuxui na dennaxe, a fa e ifu.

²⁵ A naxa a ragiri sōorie ragisee sanyie xa ba na, e xa jere xa xōrōxō. Na kui, Misirakae naxa a fala, «Won xa won gi Isirayilakae ma, barima Alatala nan na e xa gere sofe.»

²⁶ Alatala naxa a masen Munsa bē, «I bēlēxe itala baa xun ma, ye xa radin Misirakae, e xa sōori ragisee, nun e xa soe ragimae xun na.»

²⁷ Munsa to na raba subaxe ma, baa naxa gbilen a yire. Misirakae nu na e gife temui naxe, Alatala naxa ye dusu e birin xun na.

²⁸ Ye naxa Firawuna xa sōorie, a xa ragisee, soe ragimae, nun a xa sōori birin makoto. Naxee nu biraxi Isirayilakae fōxō ra baa kui, nee birin naxa lōe.

²⁹ Kōnō Isirayilakae naxa baa igiri kira xaraxi xōn ma. Ye nu malanxi e yirefanyi ma nun e kōola ma.

³⁰ Na loxœ Alatala naxa Isirayilakae ratanga Misirakae ma. Isirayilakae naxa Misirakae furee to baa de ra.

³¹ Isirayilakae to Alatala senbe to a naxan nawalixi Misirakae xili ma, e naxa gaaxu Alatala ya ra, e fa e taxu Alatala nun a xa xœera Munsa ra.

15

Isirayilakae xa beeti

¹ Na dangi xanbi Munsa nun Isirayilakae naxa yi beeti ba Alatala be.

«N xa yi beeti ba Alatala be,
naxan xili gbo.

A bara soe nun a ragima madula baa ma.

² N senbe na Alatala nan na.

N a matoxoma beeti ra.

A bara findi n Nakisima nun n Marigi ra.

N tantui rasigama n benbae Marigi ma.

³ Senbema nan Ala ra.

A xili ne Alatala.

⁴ A naxa Firawuna xa soorie nun e ragisee rasin
baa ma.

Firawuna xa kuntigie naxa madula Xulunyumi
Baa ma.

⁵ Moronyie naxa e makoto,
e naxa goro a botini ma alo gemœ.

⁶ Alatala, i senbe magaaxu.

I bara no i yaxuie ra,

i bara no i matandimae ra.

⁷ I xa mangeya senbe magaaxu.

I boje na te, e ganma ne

alo sexe te soxi naxan na.

⁸ I xa foye naxa Xulunyumi baa rabi,

kira xaraxi naxa lu a tagi.

Moronyie naxa te alo banxi xale.

Ye naxa ti, a xoroxo.

⁹ Isirayila yaxui a fala ne,

<N birama ne e foxo ra, han n e li,

n e harige tongoma ne, han n wasa.

N e sontoma ne n ma santidegema ra.>

¹⁰ Kono i tan naxa foye ramini,

baa naxa e radula.

E naxa goro ye xora alo yoxui.

¹¹ Alatala, i maniyе mu na adama xa alae ya ma.

I xa seniyenyi fiixe,

i xa nore gbo,

i xa kaabanakoe wuya.

I maniyе na minden?

¹² I to i senbe ramini,

boxi naxa e gerun.

¹³ I xa pama naxan xun saraxi,

i fama e xun tide i xa xanunteya ra,

naxan mu jonma abadan.

I fama e xun tide i xa lingira seniyenxi yire i
senbe ra.

¹⁴ Namane gbete na na me,

e gaaxuma ne.

Filisitakae bope minima ne.

¹⁵ Edon yareratie ifuma ne,

Mowaba mangee serenma ne.

Limaniya birin bama ne Kanaan pamane yi ra.

¹⁶ Alatala, gaaxui nun kontofili e suxuma ne,

e de balanma ne i senbe ra,

han i xa pama dangi,

i naxan xun saraxi.

¹⁷ I fama ne i xa pama rasabatide i xa geya fari,

i dennaxe sugandixi i xa lingira seniyenxi ra.

18 Alatala xa mangeya buma abadan.»

19 Firawuna xa soe, a xa soori ragisee, nun a xa soe ragimae to goro baa ma, Alatala naxa baa radin e xun ma, kono Isirayilakae naxa dangi kira xaraxi ra baa tagi.

20 Haruna maagine Mariyama, naxan findixi namiponme gine ra, a naxa boote maxa. Gine gbete naxa fare boron.

21 Mariyama naxa yi beeti ba,
«Wo beeti ba Alatala be,
barima a xili gbo.

A bara soe nun e ragimae radula baa ma.»

22 Munsa naxa Isirayilakae xun ti Suru gbengberenyi rakelife Xulunyumi Baa de ra. E naxa e jere xi saxan gbengberenyi ma, e mu ye soto.

23 E naxa Mara li, kono e mu no Mara ye minde barima na ye nu xono. «Mara» wama «xone» nan falafe.

24 Nama naxa sonxo Munsa ma, «Won ye soto ma minden?»

25 Munsa naxa a de rawa Alatala xon ma. Alatala naxa wuri mooli nde masen Munsa be, a fa na woli ye xora, ye xone naxa ba. Alatala to ge e xaxili matode menni, a naxa yi saate tongo e be,

26 «Xa wo wo tuli mati n xui ra a fanyi ra, xa wo bira n ma tinxinyi foxo ra, xa wo n ma yaamari birin suxu, wo n ma seriye birin binya, n tan, wo Marigi Alatala, n mu fure jaaxi yo ragoroma wo ma, alo n naxan nagoro Misirakae ma. N tan nan Alatala ra, naxan wo rayalanma.»

27 E to dulonyi fu nun firin nun tugi bili tongo solofere li Elimi, e naxa yonkin menni.

16

Isirayilakae xa sɔnxɔe

¹ Isirayila nama birin naxa keli Elimi, sigafe ra Sini gbengberenyi ma, naxan na Elimi nun Turusinina tagi. E biyaasi naxan naba keli Misira han Sini gbengberenyi ma, na naxa bu kike firin a nun xi fu nun suuli.

² Menni Isirayila nama naxa sɔnxɔ Munsanun Haruna ma,

³ a falafe ra, «Munfe ra Alatala mu a ragirixi won xa faxa Misira bɔxi ma? Menni sube nun taami nu na won yi ra naxan won lugama, kɔnɔ be yi gbengberen yire, won fama faxade kaame nan na.»

⁴ Alatala naxa a masen Munsanun be, «N fama taami ragorode wo be kelife koore ma. Nama xa mini, e xa a matongo geesege e naxan donma lɔxɔe keren kui. N fama e xaxili matode, xa e jere ma yaamari nan ma.

⁵ A xi senni nde, e xa xi firin daaxi matongo.»

⁶ Munsanun Haruna naxa a fala Isirayila nama be, «To nunmare wo a kolonma ne, a Alatala nan wo raminixi Misira bɔxi ra.

⁷ Tina geesege, wo fama Alatala xa kaabanako tode. A bara wo xa sɔnxɔe me. Munfe ra wo wama sɔnxɔfe muxu tan ma?

⁸ To nunmare Alatala wo kima sube ra, geesege a wo kima taami ra, han wo luga. Wo mu sɔnxɔxi muxu tan xa ma de. Wo sɔnxɔxi Alatala nan ma, naxan bara wo xui birin me.»

⁹ Munsanun naxa a fala Haruna be, «A fala Isirayila nama be, e xa e yete masen Alatala be, barima a bara e xa sɔnxɔe me.»

10 Haruna nu woyenfe Isirayila nama be temui naxe, e naxa e ya rafindi gbengberenyi ma, e fa Alatala xa nore to mini ra nuxui kui.

11 Alatala naxa a masen Munsa be,

12 «N bara Isirayilakae xa sonxoe me. A fala e be, <Nunmare wo sube donma, geesege wo lugama taami ra. Na kui wo a kolonma ne, a n tan nan na wo Marigi Alatala ra.>»

13 Nunmare yati xonie naxee xili konkolee naxa radin e yonkinde birin ma. Na kuye iba xini naxa lu e yonkinde rabilinyi ma.

14 Na xini to ba na, se nde naxa lu boxi fari alo balabalanyi.

15 Isirayilakae to na to, e naxa e boore maxorin, «Munse ya?» E mu a kolon se yo na ki. Munsa naxa a fala e be, «Taami nan a ra, Alatala naxan fixi wo ma baloe ra.»

16 Alatala xa yaamari nan ya, «Wo xa sigaati ya solofere tongo mixi birin be naxan na wo xonyi.»

17 Isirayilakae a raba na ki ne.

18 E to a maniya, naxee gbe nu gboxi, a mu dangi ye, naxee fan gbe nu xurunxi, a e ralixi ne. Kankan naxa baloe xasabi soto naxan a ralima.

19 Munsa naxa a fala e be, «Yi baloe naxa raxi han geesege.»

20 Konondee mu Munsa xui suxu, e naxa a ragata han geesege. Kulie naxa bira a i, a xiri naaxi naxa mini. Munsa naxa xonon na kanyie ma.

21 Geesege yo geesege, kankan nu fa a gbe donse matongo, konon soge na te, a donxoe naxan luxi, na xunu a i.

²² A xi senni nde, e naxa xi firin daaxi matongo, sigaati ya fu nun naani mixi keren be. Yareratie naxa na dentegɛ sa Munsa be.

²³ Munsa naxa a fala e be, «Alatala naxe a tina malabui lɔxɔe nan a ra, lɔxɔe seniyenxi Alatala be. Wo xa nde gan, wo xa nde satun. A donxɔe naxan na lu, wo xa na ragata han tina gɛɛɛɛɛɛ.»

²⁴ E to nde ragata han gɛɛɛɛɛɛ, alɔ Munsa a yamari e be ki naxe, e naxa a to kuli mu biraxi a i, a man mu bɔrɔ.

²⁵ Munsa naxa a fala e be, «Wo xa a don to, barima to nan malabui lɔxɔe ra Alatala xa binyɛ bun ma. Na donse mu goroma bɔxi ma to.

²⁶ Wo xa a matongo xi senni bun ma, kɔnɔ a xi solofere nde, wo mu sese toma, barima malabui lɔxɔe na a ra.»

²⁷ A xi solofere nde, mixi ndee mini ne na donse matongode, kɔnɔ e mu sese to.

²⁸ Na kui Alatala naxa a masen Munsa be, «Wo n ma yaamari nun n ma seriye matandima han mun temui?

²⁹ Wo xa a kolon, n tan Alatala nan malabui lɔxɔe seriye masenxi wo be. Na nan a ra, xi senni nde wo donse xi firin daaxi sotoma. A solofere nde wo naxa siga dede, wo birin xa lu wo xɔnyie, malabui lɔxɔe nan a ra.»

³⁰ Na kui pama naxa e malabu na lɔxɔe solofere nde ma.

³¹ Isirayilakae naxa na donse xili fala «mana,» naxan nu wama a falafe, «Munse a ra?» A maniya funden xɔri ra, a fiixe, a jɔxun alɔ digiyanyi.

³² Munsa naxa a fala, «Alatala xa yaamari nan yi ki, «Wo xa yi mana sigaati ya solofere ragata,

alako wo bɔnsɔe naxee fama baride e xa donse to n naxan nagoroxi wo ma gbengberenyi ma, n to wo ramini Misira boxi ra.»»

³³ Na kui Munsa naxa a fala Haruna be, «I xa mana sigaati ya solofere sa sesase kui, i xa a doxo hɔrɔmɔlingira yire, alako a xa findi tonxuma ra wo bɔnsɔee be naxee fama baride.»

³⁴ Haruna naxa na sesase doxo Alatala xa hɔrɔmɔlingira yire saate kankira ya ra, alako a xa ragata alo Alatala a masenxi Munsa be ki naxe.

³⁵ Isirayilakae mana don ne ne tongo naani bun ma, han e sa so Kanaan boxi ma, si gbete sabatixi dennaxe.

³⁶ Na sigaati ya solofere naxan nu rawalima na mana maniyafe ra, a doxo fu findixi busali keren nan na.

17

Turusinina fanye

¹ Isirayila jama birin naxa keli Sini gbengberenyi ma, e fa biyaasi raba alo Alatala nu luma e yamari ra ki naxe. E to Refidimi li, e naxa yonkin naa, kono e mu ye min daaxi soto.

² Nama naxa ti Munsa kanke, e a fala a be, «Ye so muxu yi ra.» Munsa naxa woyen e be, «Wo tima n kanke munfe ra? Wo na Alatala matofe munfe ra?»

³ Ye xoli nu bara gbaa jama ra, e nu fa a fala Munsa be, «Munfe ra i muxu raminixi Misira boxi ra? I wama ne muxu xa denbaya nun muxu xa xurusee xa faxe ye xoli ra gbengberenyi ma?»

⁴ Munsa naxa a de rawa Alatala xon ma, a falafe ra, «N noma munse rabade yi pama ra? A gbe mu luxi e xa n faxa.»

⁵ Alatala naxa Munsa yaabi, «I xa dangi pama ya ra, a nun Isirayila fori ndee. I xa i xa yisuxuwuri tongo, i Nili xure garin naxan na, i ti e ya ra.

⁶ N tima i ya ra, fanye seeti ma, naxan na Xorebe geya yire. I xa na fanye garin. Na kui ye minima ne pama naxan minma.» Munsa naxa a raba na ki Isirayila forie ya xori.

⁷ A naxa na yire xili sa Masa nun Meriba, na nan na ki «matoe nun sonxoe,» barima Isirayilakae sonxo ne Munsa ma menni, e man naxa Alatala mato na a falafe ra, «Alatala na won tagi ba, ka a mu won tagi?»

⁸ Amalekikae naxa fa Isirayila gere de Refidimi.

⁹ Munsa naxa a fala Yosuwe be, «Xeme ndee mayegeti, wo fa mini Amalekikae gere de. Tina, n tima ne geya fari Ala xa yisuxuwuri ra n yi.»

¹⁰ Yosuwe naxa Amalekikae gere alo Munsa a yamarixi ki naxe. Munsa, Haruna, nun Xuru naxa te geya fari.

¹¹ Munsa to a belexe itema, Isirayila senbe nu gboma, konɔ a to a belexe igoroma, Amalekikae senbe tan nu gboma.

¹² Munsa belexe to binya a ra, e naxa geme nde tongo a doxoma naxan fari. Haruna nun Xuru naxa lu Munsa seeti ma, a koola nun a yirefanyi ma, a belexe ratefe ra han soge dula temui.

¹³ Na kui Yosuwe naxa no Amaleki nun a xa soorie ra santidegema xepienxie ra.

¹⁴ Alatala naxa a masen Munsa be, «Yi taruxui sebe alako jama xa ratu a ma. I man xa a fala Yosuwe be, «N fama ne Amalekikae xa fe jonde yi dunija ma.»»

¹⁵ Munsa naxa yire nde rafala serexebade ra, a naxa na yire xili sa, «Alatala nan xun nakeli fima n ma,»

¹⁶ barima a nu bara a xaxili ti Alatala xa mangeya ra. Munsa naxa a a fala, «Alatala Amalekikae gerema ne abadan.»

18

Yetiro sigafe Munsa yire

¹ Munsa bitanyi Yetiro, naxan findixi Madiyan serexedube ra, a naxa a me Alatala naxan nabaxi Munsa nun a xa jama Isirayila be, e raminife ra Misira boxi kui.

² Munsa nu bara a xa gine Sipora nun a xa di firinyi xee Yetiro xonyi.

³ Munsa xa di singe nu xili Gerisomi, barima na xili nu wama a falafe e gbe xui, «Xone nan n na yi boxi ma.»

⁴ Boore nu xili Eliyeseri, barima na xili nu wama a falafe e gbe xui, «N baba Marigi bara n mali, a bara n natanga Firawuna xa santidagama ma.»

⁵ Munsa bitanyi Yetiro naxa Munsa xa gine nun na xa die xanin Munsa yire gbengberenyi ma, a nu yonkinxi dennaxe, Ala xa geya mabiri.

⁶ Yetiro nu bara xera xee Munsa xon a falafe ra, «N tan, i bitanyi Yetiro, n na fafe i xa gine nun a xa di firinyie ra.»

⁷ Munsá naxa mini a bitanyi ralande. A naxa a xinbi sin a ya ra, a man fa a sunbu. E to e boore xɛɛbu, e naxa so Munsá xɔnyi.

⁸ Munsá naxa fee ya ba a bitanyi bɛ, Alatala naxan birin naba Firawuna nun Misirakae ra Isirayila xa fe ra. A naxa Isirayila xa ɲaxankatɛ birin fala a bɛ, a nun Alatala e rakisixi ki naxɛ.

⁹ Yetiro naxa sɛɛwa Alatala xa hinne ra a naxan masenxi Isirayila bɛ, a e bafe ra Misirakae yi ra.

¹⁰ Yetiro naxa a fala, «Tantui na Alatala bɛ, naxan wo ba Misirakae nun Firawuna yi ra, naxan Isirayila ɲama raminixi e xa nɔɛ bun ma!

¹¹ N bara a kolon Alatala senbɛ gbo dangi adamadie xa alae mɔɔli birin na, barima a bara ɲama igoro naxan nu bara a yete rafisa Isirayilakae bɛ.»

¹² Na temui Munsá bitanyi Yetiro naxa sɛɛɛɛ gan daaxi nun sɛɛɛɛ gbɛtɛɛ ba Alatala bɛ. Haruna nun Isirayila fori birin naxa na sɛɛɛɛ don Munsá bitanyi yire Alatala xa hɔɔmɔlingira kui.

¹³ Na kuye iba, Munsá naxa a magoro, a xa kiiti sa Isirayilakae tagi. Nama naxa lu a yire kelifɛ gɛɛɛɛɛɛ han nunmare.

¹⁴ A bitanyi to a to Munsá naxan birin nabama ɲama bɛ, a naxa a fala a bɛ, «I na munse rabafe yi ɲama bɛ? Munfe ra kiiti wali birin dɔxɔxi i keren nan xun ma kelifɛ gɛɛɛɛɛɛ han nunmare?»

¹⁵ Munsá naxa a bitanyi yaabi, «Nama faxi n yire Alatala xa kiiti nan fende.

¹⁶ Galanbui na lu mixie tagi e fama n yire n xa kiiti sa Alatala xa yaamarie nun a xa sɛriye ra.»

¹⁷ Munsa bitanyi naxa a fala a bɛ, «A mu lanma i xa a raba na ki.»

¹⁸ I nun i xa mixie, wo taganma nɛ. I keren mu nɔma yi kote xaninde.

¹⁹ I xa i tuli mati n ma marasi ra. Ala xa i mali. I tan xa findi pama xui madangima ra Alatala bɛ.

²⁰ I lan nɛ i xa e xaran Alatala xa sɛriye nun a xa yaamarie ra. I xa Ala xa kira masen e bɛ, e birama naxan fɔxɔ ra.

²¹ Mixi kɛndɛɛ sugandi pama ya ma, nɔndi fale naxee gaaxuma Alatala ya ra, naxee riba xɔnxi. I xa nee findi yareratie ra pama xun ma xunlande ki ma. Nde xa lu mixi wulu keren xun ma, boore mixi kɛmɛ xun ma, boore mixi tongo suuli xun ma, boore mixi fu xun ma.

²² Nee xa kiiti birin sa mixie tagi, fo kiiti nde naxee xɔrɔxɔ. E xa na kiiti xɔrɔxɔɛ masen i tan bɛ. Na ki, kote mu dɔxɔma i keren xun.

²³ Xa i Ala xui suxuma, na rabafe nɔma findide sɔɔneya ra wo birin bɛ, bɔɔnesa fa lu pama bɛ e xɔnyi.

²⁴ Munsa naxa a bitanyi xui suxu, a birin naxa raba alɔ a falaxi ki naxɛ.

²⁵ Munsa naxa mixi kɛndɛɛ sugandi Isirayilakae ya ma, a fa e dɔxɔ pama xun na xunlande ki ma, mixi wulu keren xun ma, mixi kɛmɛ xun ma, mixi tongo suuli xun ma, nun mixi fu xun ma.

²⁶ E nu kiitisa wali raba temui birin, fo kiiti xɔrɔxɔɛ e nee nan masenma Munsa bɛ.

²⁷ Na temui Munsa naxa a bitanyi bɛpin. Yetiro naxa gbilen a xa bɔxi ma.

Isirayila jama sofe Turusinina

¹ Kike saxan yati to dangi, kelife e mini Misira bɔxi ra temui naxe, Isirayilakae naxa so Turusinina gbengberenyi ma.

² E to keli Refidimi, e naxa so Turusinina gbengberenyi ma, e yonkin geya ya tagi.

³ Munsa naxa te geya fari sigafe Alatala yire. Alatala naxa a xili geya fari, a a masen a be, «I xa a fala Isirayilakae Yaxuba bɔnsɔɛ be,

⁴ <Wo bara a to, n fe naxan nabaxi Misirakae ra. Wo bara a kolon n faxi wo ra n yire ki naxe. A luxi alɔ wo bakixi xɔni nan fari.

⁵ Xa wo n xui suxu n ma saate rakamalife ra, wo fama ne findide n ma jama sugandixi ra si birin ya ma. N gbe nan duniɲa birin na,

⁶ kɔnɔ wo tan findima n ma si seniyeɲxi nan na, naxan serexedube wali rabama.> I xa na masenyi ti Isirayilakae be.»

⁷ Munsa naxa goro, a fori birin xili, a fa Alatala xa masenyi birin dentege e be.

⁸ Nama birin naxa a fala, «Muxu Alatala xui birin suxuma ne.»

Munsa naxa jama xa yaabi dentege Alatala be.

⁹ Alatala naxa a masen Munsa be, «N fama woyende i be nuxui kui jama ya xɔri, alako e xa lanlanteya sa i ma temui birin.»

Munsa naxa jama xa masenyi dentege Alatala be.

¹⁰ Alatala naxa a masen Munsa be, «A fala jama be, e xa e yete raseniyeɲ to nun tina. E xa e xa dugie fan xa.

11 E xa rædi tina bora ya ra, barima n fama ne gorode nama birin ya tode ra na loxoε Turusinina geya fari.

12 I xa naaninyi sa geya rabilinyi birin ma, i fa a fala nama be, <Mixi yo naxa te geya fari, mixi yo naxa a makore a ra, barima naxan yo din a ra, na kanyi faxama ne.>

13 Wo naxa wo belexe din na kanyi ra, wo a magono geme ra han a faxa. Xa na mu, wo xa a masoxo xalie ra. A findi daalise ra, a findi mixi ra, a lanma a xa faxa. Mixi mu lanma a xa te geya fari, fo sara xui na mini mixi sugandixi ndee fa te.»

14 Munsa to goro geya ma nama yire, a naxa marasenyenyi fe fala e be, e xa e yete nun e xa dugie rasenyen.

15 A naxa a fala nama be, «Wo xa wo yete yailan tina bora ya ra. Sade fe naxa lu wo tan nun wo xa ginεe tagi.»

16 A xi saxan loxoε, galanyi nun seyamakonyi naxa bira boxi ma geesege, nuxui ifooroxi naxa to geya ma. Sara xui naxa mini senbe ra. Nama birin naxa gaaxu.

17 Munsa naxa nama mati geya lanbanyi Ala xui ramede.

18 Tuuri nu na Turusinina geya ma, barima Alatala nu bara goro te tagi. Na tuuri nu tema ne, alo fili na gan. Geya nu serenma senbe ra.

19 Sara xui nu sigama gbo ra. Na temui Munsa naxa woyen, Ala naxa a yaabi.

20 Alatala naxa goro Turusinina geya fari, a fa Munsa xili. Munsa to te naa,

²¹ Alatala naxa a masen a bɛ, «I xa goro, i xa a fala pama bɛ, e naxa wuruntun n tofe ra de, xa na mu a ra, a gbegbe faxama nɛ.

²² Hali serɛxɛdubɛ naxee e makɔrɛma n na, e xa e yetɛ raseniyɛn, alako n naxa fa e faxa.»

²³ Munsa naxa a fala Alatala bɛ, «Nana mu nɔma tide Turusinina geya fari, barima i jan bara muxu yamari naaninyie xa sa geya rabilinyi ma, pama xa lu e xati ma.»

²⁴ Alatala naxa a masen a bɛ, «I xa goro sinden Haruna fɔxɔ ra. Na tɛmui wo firin xa te. Serɛxɛdubɛɛ nun pama naxa te de, xa na mu a ra, e faxama nɛ.»

²⁵ Munsa naxa goro pama yire, a fa na masenyi ti e bɛ.

20

Ala xa seriyɛ fu

¹ Na tɛmui Alatala naxa yi masenyi ti:

² «N tan Alatala nan wo Marigi Ala ra, naxan wo ramini Misira konyiya kui.»

³ «Wo naxa ala gbɛtɛɛ batu bafe n tan na.»

⁴ «Wo naxa kuye yo yailan naxan misaalixi se nde ra, naxan toma koore nun bɔxi ma, xa na mu naxan luma ye nun bɔxi bun ma.

⁵ Wo naxa wo mafelen na se mɔɔlie bɛ, wo naxa e batu, barima n tan wo Marigi Alatala, n mu wama n firin nde xɔn. Naxee n xɔnma, n nee bɔnsɔɛ ratɔnma nɛ han e tolontolonyie, xa na mu a ra e tolobitɛɛ xa die.

⁶ Kɔnɔ mixi naxee n xanuma, e bira n ma seriyɛ fɔxɔ ra, n hinnɛma e ra xanunteya kui abadan.»

7 «Wo naxa n xili yelefufu, barima n tan Alatala mu dijema mixie ma, naxee na fe mooli rabama.»

8 «Wo xa ratu malabui loxoε ma, wo xa a binya.

9 Wo noMa wali birin nabade xi senni bun ma,

10 koKo na xi solofere nde findima malabui loxoε ra wo Marigi Alatala xa binye bun ma. Wo naxa wali yo raba na loxoε, wo tan, wo xa die, wo xa konyie, wo xa xurusee, nun wo xa xoεe.

11 Alatala dunjina nun se birin daa xi senni nan bun ma. A to γε na ra a naxa a malabu a xi solofere nde. Na nan a xeεxi, Alatala naxa barake sa na malabui loxoε ma, a findi loxoε seniye nxi ra.»

12 «Wo xa wo baba nun wo nga binya. Na kui wo xa simaya xo n kuyama ne boxi ma, wo Marigi Alatala naxan fima wo ma.»

13 «Wo naxa mixi faxa.»

14 «Wo naxa ye ne raba.»

15 «Wo naxa mu ne ti.»

16 «Wo naxa wo boore toεεεε.»

17 «Wo naxa mila wo boore xa harige ma, alo a xa banxi, a xa gine, a xa konyie, a xa ninge, xa na mu a xa sofale.»

18 Nama to na galanyi, seyamakonyi, nun tuuri to geya fari, e fa sara xui me, e naxa seren gaaxui ra. E naxa makuya menni ra,

19 e fa a fala Munsa be, «I tan xa wo yen muxu ra, Alatala xui won faxama ne.»

20 Munsa naxa a fala nama be, «Hali wo mu gaaxu. Ala na wo matofe, alako wo xa gaaxu a ya ra, wo xa yunubi lu na.»

²¹ Nama naxa lu yire makuye, kɔnɔ Munsa tan naxa siga na nuxui fɔɔrɔxi yire Alatala nu na dennaxe.

²² Alatala naxa a masen Munsa bɛ, «I xa yi masenyi ti Isirayilakae bɛ, <Wo bara a to, n bara wɔyɛn wo ra kelife koore ma.

²³ Wo naxa kuye yo yailan gbeti nun xɛɛma ra naxan luma n sɛɛti ma.

²⁴ Wo xa sɛrɛxɛbade yailan n bɛ bɛndɛ ra. Wo xa xurusee ba sɛrɛxɛ gan daaxi nun xanunteya sɛrɛxɛ ra. Wo na n xili binya, n barake sama nɛ wo ma.

²⁵ Xa wo sa sɛrɛxɛbade tima n bɛ gɛmɛ ra, wo naxa a ti gɛmɛ masolixie ra, barima na a niyama nɛ a xa findi se sɛniyɛntare ra.

²⁶ Wo naxa n ma sɛrɛxɛbade ite, xa na mu a ra sɛrɛxɛdube xa donma kuye bunyi mabama nɛ.»

21

Konyiya sɛriyɛ

a nun faxɛ nun maxɔnɛ jɔxɔɛ

¹ I xa yi yaamarie masen Isirayilakae bɛ.

² Xa wo konyi sara naxan findi Isirayilaka ra, a xa wali wo bɛ jɛ senni, kɔnɔ a solofere nde wo xa a bɛjin barima a xunsare bara jɔn.

³ Xa a sa li wo nu bara na konyi nun a xa ginɛ sara, wo xa e firin birin bɛjin jɛ solofere nde.

⁴ Xa konyi kanyi nan ginɛ so a xa konyi yi ra, a fa di bari, na ginɛ nun a xa die luma konyi kanyi yi ra. Xɛmɛ gbansan nan bɛjinma.

⁵ Xa na konyi fa a fala, «N marigi, n ma ginɛ, nun n ma die rafan n ma, n mu wama xɔrɛyafe.»

6 a marigi xa a dentegε Ala be. Na temui a xa a tuli tunba sɔxome ra naade wuri ma. Na nan a masenma na konyi bara lu a marigi xa yaamari bun ma a xa dunijeigiri birin kui.

7 Xeme na a xa di gine mati konyi ra, gine xoreya ki mu luma alo xeme xoreya ki.

8 Xa na gine mu rafan a marigi ma, naxan nu wama a findife a xa gine ra, a lanma a xa lu a xun xa sara. A mu daxa a xa a mati mixi gbete ma, barima a bara mee a ra.

9 Xa a wama a fife a xa di ma gine ra, a lanma a xa a suxu alo a xa di gine yati.

10 Xa a sa gine gbete tongo, a naxa sese ba a xa gine singe xa donse, a xa sosee, nun a xa sole ra.

11 Xa a mu na fe saxanyie rakamali a be, gine noma kelide a xon ma, a mu sese fi.

12 Naxan na mixi bonbo han a naxa faxesa, na kanyi lan a fan xa faxesa.

13 Konon xa a mu a faxafe janigexi, Ala nan tun a ragirixi, a xa a xun taxu yire nde n dennaxe masenma wo be.

14 Konon xa a nu a faxafe janigexi ne koota nde ra, na kanyi mu noma a xun taxude n ma serexebade ra. Wo xa a faxesa.

15 Naxan na a nga, xa na mu a baba bonbo, na lan ne a xa faxesa.

16 Naxan na adamadi suxu, a xa a mati, na kanyi xa faxesa hali a mu gexi na adamadi matide.

17 Naxan na a nga, xa na mu a baba dankan, na kanyi lan ne a xa faxesa.

18 Naxan na mixi maxonon gere kui, na kanyi mu suxuma xa mixi maxononxi mu faxaxi,

¹⁹ xa a nōma kelide a xa sade ma, a jere a xa yisuxuwuri ra. Kōnō maxōne ti tan lanma a xa kōbiri ba na mixi maxōnōxi be han a gema yalande temui naxe.

²⁰ Naxan na a xa konyi faxa bōnbō wuri ra, a lanma ne na kanyi xa naxankata.

²¹ Kōnō xa na konyi sa yalan beenu xi firin, a mu lanma konyi kanyi xa naxankata, barima na konyi findixi a gbe nan na.

²² Mixi naxee bōnbōma furi gine nde ra, e xa gere kui, na fa a niya gine xa di bari a waxati mu a lixi, kōnō a mu fe kana a ma, na geresoee xa kōbiri nde ba gine be. Gine xa mōri nun kiitisa xa nate tongo kōbiri xasabi naxan bama.

²³ Kōnō xa a sa findi gbaloe ra, nii jōxōe na nii nan na,

²⁴ ya jōxōe na ya nan na, jinyi jōxōe na jinyi nan na, belexe jōxōe na belexe nan na, sanyi jōxōe na sanyi nan na,

²⁵ ganyi jōxōe na ganyi nan na, xabe jōxōe na xabe nan na, maxōne jōxōe na maxōne nan na.

²⁶ Naxan na a xa konyi bōnbō han a ya naxa kana, a lanma a xa a xa konyi xōreya a xa ya kane jōxōe ra.

²⁷ Naxan na a xa konyi jinyi gira, na kanyi lanma a xa a xa konyi xōreya a xa jinyi gire jōxōe ra.

²⁸ Tuura naxan na mixi faxa, a lanma na tuura xa magōnō han a faxa. A sube naxa don. Tuura kanyi mu naxankate yo sōtōma na kui.

²⁹ Kōnō xa na tuura darixi na mōoli raba ra, a kanyi a kolon kōnō a mu a xirima a fanyi ra, na

kanyi yo, a xa tuura yo, e birin xa magɔnɔ han e xa faxa.

³⁰ Kiitisa nɔma nate tongode na tuura kanyi xun sarama naxan na.

³¹ Na seriyɛ keren nan nawalima hali tuura sa dimedi nan faxa.

³² Xa a sa li tuura fa mixi gbete xa konyi nde faxa, gbete kole tongo saxan nan fima na konyi marigi ma. Na tuura xa magɔnɔ han a faxa.

³³ Naxan na yili ge, a lu i mu a de rakotoma, xa a sa li ninge xa na mu a ra sofale nde sa sin na yili kui,

³⁴ a lanma na kanyi xa na xuruse sare fi, xuruse faxaxi xa lu a be.

³⁵ Naxan ma tuura na sa a boore gbe faxa, na tuura baloxi xa mati, na sare nun na tuura faxaxi xa itaxun e boore tagi.

³⁶ Kɔnɔ xa a sa a li, na tuura darixi na mooli raba ra, a kanyi a kolon kɔnɔ a mu a xirima a fanyi ra, a lanma tuura baloxi kanyi xa a gbe fi tuura faxaxi kanyi ma, tuura faxaxi xa lu a tan be.

³⁷ Naxan na tuura xa na mu a ra yexee muɔa, a sa a mati, xa na mu a ra, a faxa, a lanma na kanyi xa tuura suuli ragbilen na tuura keren ɲɔxɔe ra, xa na mu, yexee naani na yexee keren ɲɔxɔe ra.

22

Muɔa se ɲɔxɔe

nun yaamari gbeteɛ

¹ Xa wo mixi suxu a muɔe tife kɔe ra, a fa faxa wo yi bɔnbɔe ra, faxe kote mu dɔxɔma wo xun ma.

² Kōnō xa wo na mooli raba yanyi ra, faxe kote dōxōma nē wo xun ma. Mupeti lanma a xa se mupaxie sare ragbilen, kōnō xa a mu nōma na ra, a gundi xa mati konyi ra alako mupē se sare xa fi.

³ Xa a sa li, na se mupaxi na a yi alō ninge, sofale, yexēē, xa na mu a ra, a dijē ra, a e jōndon firin nan fima a jōxōe ra.

⁴ Naxan na a xa xurusee bējin, a sa a boore xa xē kana, na kanyi lanma a xa a sare fi a xa xē bogi fanyi nan na.

⁵ Naxan na tē sa joooge ganfe ra, kōnō tē fa mixi nde xa sansi malanxi gan, xa na mu a xa xē, na kanyi lanma a xa na se birin sare fi.

⁶ Xa mixi harige nde taxu a dōxōboore ra, kōnō mixi fa na mupa, na mupeti xa na se sare firin nagbilen a jōxōe ra.

⁷ Kōnō xa na mupeti mu to, se taxuxi naxan na, na xa a kali Ala xili ra kiitisamae yire, alako e xa a kolon a tan xa mu na harige tongoxi.

⁸ Xa se nde sa lu mixi yi ra alō ninge, sofale, yexēē, dugi, xa na mu a ra se gbete, kōnō mixi gbete fa a fala a tan nan gbe na a ra, e lanma e xa siga kiitisae yire. Kiiti kanama naxan na, a xa na se sare dōxō firin nagbilen a boore ma.

⁹ Xa mixi nde xuruse taxu a boore ra, alō sofale, ninge, xa na mu yexēē, na xuruse fa faxa, xa na mu a salonse nde fa gira, xa na mu mixi fa a mupa,

¹⁰ a boore xa a kali Alatala ra a mu a yi. Se kanyi xa la na ra, a xa dijē na se lōexi ma.

¹¹ Kōnō xa na xuruse mupaxi na a xonyi nē, a jōxōe fima nē.

12 Xa wulai sube nde nan fa a faxa, a taxu naxan na, na xa a binbi masen xuruse kanyi be seederocoya ra. Na temui, a mu na joxoe fima.

13 Xa mixi xuruse yefu a boore ma, xuruse fa a yete maxono, xa na mu a ra a faxa xuruse kanyi xanbi, a yefuma xa a joxoe fi.

14 Kono xa fe nde na xuruse soto a kanyi ya xori, a yefuma mu a joxoe fima. Xa a sa li, a herixi nan a ra, heri masundi nan findima a joxoe ra.

15 Naxan na gine dimedi futi kana naxan xa kote mu docoxi sinden, a lanma a xa a xa kote doco alako a xa findi a xa gine ra.

16 Xa na gine baba mu tin a fide a ma, na futikanε kabiri nan fima naxan lanma gine dimedi xa kote ma.

17 Mandurula gine lanma ne a xa faxa.

18 Naxan yo yene raba xuruse ra, a lanma a xa faxa.

19 Naxan yo na serexe ba ala gbete be, bafe Alatala ra, na kanyi lan ne a xa faxa.

20 Wo naxa xone toro naxan fatan si gbete ra a sabati wo xonyi, barima wo fan nu na xoneya ne Misira boxi ma.

21 Wo naxa fu kaape gine nun kiridi ma.

22 Wo na fu nee ma, n e wa xui mema ne.

23 N ma xone tema ne wo xili ma, n wo faxa santidegema ra. Wo xa ginee findima ne kaape ginee ra, wo xa die fan findima ne kiridie ra.

24 Xa wo sa kabiri doni toromixi nde be n ma nama ya ma, wo naxa geeni yo fen a xun na alo doniti paaxi ndee.

25 Wo na wo boore xa dugi dɔxo seɛke ra, wo xa a ragbilen a ma beenun soqe xa dula,

26 barima na keren peti nan a yi ra, a na nan felenma a ma. A na n xili, n a xui suxuma ne, barima kinikininte nan n na.

27 Wo naxa n tan Ala bexu. Wo naxa wo xa nama mangɛ danka.

28 Wo naxa dugundi n kide wo xa xe bogie ra. Wo xa wo xa di singe birin fi n ma.

29 Wo xa wo xa xurusee xa di singee fi n ma. Wo xa e lu e nga foxo ra xi solofere. A xi solomasaxan nde, wo fa e fi n ma.

30 Wo xa findi n ma nama seniyenxi ra. Wo naxa wulai sube don, sube gbete naxan faxaxi. Wo xa na mooli fi baree ma.

23

Tinxinyi seriye

nun Isirayila xa salie

1 Wo naxa mixi toɔnege, wo naxa wule seede ba mixi jaaxi be.

2 Wo naxa bira nama waxɔnfe jaaxi foxo ra, wo naxa wule seede ba nama xa fe ra. Na mooli tinxinyi kanama ne.

3 Wo naxa mixi rafisa a boore be kiiti kui, hali a findi misikiine ra.

4 Wo na wo yaxui xa ninge loxi to, xa na mu a xa sofale, wo xa a xanin a xon ma.

5 Wo na wo yaxui xa sofale to, a biraxi kote xungbe bun ma, wo naxa a lu naa. Wo xa a mali.

6 Wo naxa seriye matandi tooromixi makiitima temui naxe.

⁷ Wo naxa mixi tɔɔɔɛɛ. Wo naxa a niya mixi tɔɔɔɛɛxi xa faxa, barima n mu dijɛma na mixi mɔɔli ma.

⁸ Wo naxa tinxinyi kana kɔbiri ra, barima na a niyama nɛ seede xa dundu, tinxintɔe xa wɔyenyi xa mafindi.

⁹ Wo naxa xɔɔe tɔɔɔ naxan fatan si gbete ra. Wo tan yati bara na tɔɔɔe mɔɔli kolon wo nu na Misira bɔxi ma temui naxe.

¹⁰ Wo xa sansi si, wo xa a xaba jɛ senni bun ma,

¹¹ kɔɔɔ a jɛ solofere nde, wo xa bɔxi lu na, a xa a malabu. Na temui sansi naxan fama bulade a yete ma, na nɔma findide Isirayila tɔɔɔmixie xa baloe ra. Burunyi subee fan xa balo na dɔɔɔɔe ra. Wo xa na raba wo xa weni nun wo xa oliwi bilie fan na.

¹² Wo xa wali birin naba xi senni bun ma, kɔɔɔ a xi solofere nde wo naxa wali yo raba alako wo xa ninge, wo xa sofale, wo xa konyi, nun si gbete mixi naxee na wo xɔnyi, e birin xa e malabu.

¹³ Wo xa wo jɔɔɔ sa n ma yaamari birin xɔn ma. Wo naxa ala gbeteɛe batu, e xili jan naxa mini wo de i.

¹⁴ Nɛ yo jɛ wo xa sali saxan naba n ma binye bun ma.

¹⁵ Wo xa Taami Lɛbinitare Sali raba yi ki. Xi solofere naxee sugandixi Abibi kike kui, wo xa taami lɛbinitare gbansan don, alo n wo yamarixi ki naxe. Wo xa a raba na temui nɛ barima wo mini Misira bɔxi kui na kike nan na. Wo naxa n kuma na salie kui.

¹⁶ Xe Xabe Sali, wo xa a raba wo xa sansi bogi singee ra. Sansi Bogi Ba Sali, wo xa a raba jɛ rapɔnyi, wo na sansi bogi se raso temui naxe.

17 Xeme birin xa na sali saxan naba e Marigi Alatala xa binye bun ma je birin kui.

18 Wo na xuruse ba serexe ra n be temui naxe, wo naxa taami lebini daaxi ba serexe ra a seeti ma de. Wo naxa n ma sali serexe sube ture ragata han gesege.

19 Wo xa sansi bogi fisamante ba wo xa sansi bogi singee ya ma n tan wo Marigi Alatala be, wo e xanin n ma hromolingira kui. Wo naxa si jin a nga xije ye ra.

20 N maleke tima ne wo ya ra, naxan wo makantama kira ra sigafe ra boxi ma n dennaxe yailanxi wo be.

21 Wo xa wo tuli mati a ra, wo xa a xui suxu. Wo naxa a matandi. A mu dijema wo xa matandi ma, barima n xili na a xun ma.

22 Kono xa wo wo tuli mati a ra, xa wo a xui birin suxu, n findima ne wo yaxuie yaxui ra, wo gerefae gerema ra.

23 N ma maleke wo matima Amorikae, Xitikae, Perisikae, Kanaankae, Hiwikae, nun Yebusukae xonyi. N fama ne e birin sontode.

24 Wo naxa suyidi e xa alae be, wo naxa e batu, wo naxa bira e foxo ra. Wo xa e xa kuyee kana, wo xa e xa geme masolixie magira.

25 Wo xa wo Marigi Alatala batu. A barake sama ne wo xa taami nun wo xa ye ma. A wo xa fure yalanma ne.

26 Gine furi mu kanama wo xa boxi ma, gine di baritare fan mu toma wo ya ma. N simaya kamalixi fima ne wo ma.

27 N sie ragaaxuma ne wo ya ra n senbe ra. N e ifuma ne alako e xa e gi wo ya ra.

²⁸ N jurie rasanbama ne wo ya ra naxan Hiwikaе, Kanaankae, nun Xitikaе kerima.

²⁹ Kono n mu na rabama je keren kui, alako boxi naxa fa kana, wulai subee naxa fa wuya wo xili ma.

³⁰ N nee kerima a xuri xuri nan na wo ya ra, han wo wuya, wo fa noe soto boxi birin ma.

³¹ N wo xa naaninyi igboma ne keli Xulunyumi Baa ma han Baa Xungbe, kelife Turusinina gbengberenyi ma han a sa doxo Efirati xure xungbe ra. N mennikaе sama ne wo sago, alako wo xa e kerі.

³² Wo naxa saate yo tongo mennikaе nun e xa alae be.

³³ Wo naxa lu e xa sabati wo xa boxi ma, xa na mu a ra e a niyama ne wo xa gbilen n foxo ra. E xa alae findima gantanyi nan na wo be.

24

Ala nun Isirayilakae xa saate

¹ Alatala naxa a masen Munsa be, «Te n yire be geya fari, i tan, Haruna, Nadabo, Abihu, nun Isirayila forie mixi tongo solofere. Wo xa suyidi yire naxan makuya n na.

² Munsa, i gbansan xa makore n na, booree xa lu yire makuye. Nama fan naxa te i tan Munsa foxo ra.»

³ Munsa naxa Alatala xa masenyi nun a xa yaamari birin nadangi nama ma. Nama birin naxa a yaabi xui keren na, «Muxu Alatala xui birin suxuma ne.»

⁴ Munsa naxa Alatala xa masenyi birin sebe. Na kuye iba, Munsa naxa serexebade ti geya

bunyi, a naxa gẽme tundenyi fu nun firin ti menni, naxee Isirayila bõnsœ fu nun firinyi misaalixi.

⁵ A naxa Isirayila fonike ndee xœ e xa serexe gan daaxie ba. E man xa tuuræ ba Ala be xanunteya serexe ra.

⁶ Munsa naxa na wuli tagi sa feje die kui, a naxa na donxœ kasan serexebade ma.

⁷ A naxa saate kitaabui tongo, a a xaran jama birin be. E naxa a yaabi, «Muxu Alatala xui birin suxuma ne. Muxu a ratinmema ne.»

⁸ Munsa naxa na wuli tongo, a a kasan jama ma. A naxa a masen, «Saate wuli nan ya. Alatala yi saate nan tongoxi wo be a xa masenyi fari.»

⁹ Munsa naxa te, a tan nun Haruna, Nadabo, Abihu, nun Isirayila forie, mixi tongo solofere.

¹⁰ E naxa Isirayila Marigi Ala to. A nu tixi gẽme noroxi fari.

¹¹ Na Isirayila kuntigie naxa Ala to, konõ a mu e paxankata na ma. E birin naxa e dege, e naxa e min.

¹² Alatala naxa a masen Munsa be, «Te geya fari n yire, i xa fa lu be sinden. N xa gẽme walaxœ so i yi ra, n nan n ma seriye nun n ma yaamarie sebexi naxee ma. I xa Isirayilakæ xaran nee ra.»

¹³ Munsa nun a malima Yosuwe naxa te Ala xa geya ma.

¹⁴ Munsa naxa a fala forie be, «Wo xa muxu membe be. Muxu fafe. Haruna nun Xuru xa lu wo fe ma be. Xa fe nde bira a i wo tagi, wo xa a masen e be.»

¹⁵ Munsa to te geya fari, nuxui naxa dusu a xun na.

¹⁶ Alatala xa nɔrɛ naxa lu Turusinina geya xun na. Nuxui naxa geya makoto xi senni. A xi solofere nde, Alatala naxa Munsa xili na nuxui kui.

¹⁷ Alatala xa nɔrɛ nu luxi nɛ Isirayilakae bɛ, alɔ tɛ xungbe geya fari.

¹⁸ Munsa to nu tema, a naxa so na nuxui kui, a naxa lu geya fari xi tongo naani kɔɛ nun yanyi.

25

Hɔrɔmɔlingira sɛrɛxɛbade,

a teebili, nun a lanpui

¹ Alatala naxa a masen Munsa bɛ,

² «A fala Isirayilakae bɛ, foniserelae xa yi see mɔoli ba hadiya ra:

³ xɛɛma, gbeti, wure gbeeli,

⁴ gɛsɛ gɛrɛ daaxi, gɛsɛ bulu daaxi, gɛsɛ gbeeli, suwa dugi, dugi naxan sɔxɔxi si xabe ra,

⁵ yɛxɛɛ kontonyi kiri naxee soxi a gbeeli ra, peremui kirie, kasiya wuri,

⁶ ture naxan sama lanpui kui, labundɛ naxan sama ture sɛniyenxi nun surayi xun ma,

⁷ a nun gɛmɛ tofanyi naxee findi sɛrɛxɛdubɛ xa donma kuye nun donma kanke raxunma se ra.

⁸ Isirayilakae xa hɔrɔmɔlingira ti n bɛ, alako n xa sabati e ya ma.

⁹ Wo xa na lingira nun a xa yirabase birin yailan alɔ n na masenma i bɛ ki naxɛ.»

¹⁰ «E xa saatɛ kankira yailan kasiya wuri ra. Na kankira xa kuya nɔngɔn firin nun a tagi, a xa

igbo nongon keren nun a tagi, a xa ite nongon keren nun a tagi.

¹¹ I xa a kui nun a fari maso xεema ra. A de kiri fan xa yailan xεema ra.

¹² I xa a suxude digilinxi naani rafala xεema ra a tunxun naanie ma, firin na seeti, firin na boore seeti ma.»

¹³ «I xa kasiya wuri kuye firin masoli, e maso xεema ra.

¹⁴ I xa e raso kankira suxude digilinxie kui, na kankira xaninma e tan nan ma.

¹⁵ E naxa ramini na abadan.»

¹⁶ «N na saate tonxuma so i yi ra, i xa a sa na kankira kui.

¹⁷ I xa a derakote yailan xεema fanyi ra, naxan findima xunsare yire ra. A xa kuya nongon firin nun a tagi, a xa igbo nongon keren nun a tagi.

¹⁸ Maleke sawure firin xa yailan xεema xabuxi ra kankira derakote fari.

¹⁹ Malekee sawure nun kankira derakote xa findi keren na.

²⁰ Na maleke sawure firinyie xa ti e boore ya i, e gabutenyie italaxi, e xun sinxi xunsare yire.»

²¹ «I xa na kankira derakote sa a ma, naxan findixi xunsare yire ra. N na saate tonxuma so i yi ra, i xa a sa na kankira kui.

²² N nan n yete masenma i be menni ne, na saate kankira derakote fari, maleke sawure firinyie tagi. N yaamari birin soma i yi ra menni ne katarabi Isirayilakae ma.»

²³ «I xa teebili nde yailan kasiya wuri ra, naxan kuya nongon firin, a igbo nongon keren, a ite nongon keren nun a tagi.

²⁴ I xa xεema fanyi maso a ma, a nun a de kiri ma.

²⁵ Xebenyi nde xa sa na de kiri bun ma naxan igbo suxui keren a nun a tagi. Xεema xa sa na fan de kiri ma.

²⁶ I xa a suxude digilinxi naani rafala xεema ra a tunxun naanie ma, naxee ilanma a sanyie ra

²⁷ na xebenyi bun ma. Wuri kuyee xa so nee kui teebili xaninfe ra.

²⁸ Na wuri kuyee xa masoli kasiya wuri ra, xεema xa maso e ma. Nee nan findima teebili tongose ra.

²⁹ Piletie, tɔnbilie, pɔɔtie, nun paani naxee sama na teebili ma, naxee rawalima serexe yeerama daaxi xa fe ra, nee birin xa yailan xεema fanyi nan na.

³⁰ Taami fan xa sa na teebili ma temui birin, naxan findixi serexe ra n be.»

³¹ «I xa lanpui doxoɔse nde yailan xεema fanyi xabuxi ra. A sanyi, a bili, a salonyie, nun lanpui doxoɔde naxee maniya sansi fugee ra, na birin xa findi keren na.

³² Salon senni xa mini lanpui doxoɔse bili ma, saxan seeti keren, saxan boore seeti.

³³ Tɔnbili saxan xa lu na salon senni birin xun ma. E xa maniya sansi bogi ra naxan doxoɔxi a burexee nun a fugee tagi.

³⁴ Tɔnbili naani gbete xa lu lanpui bili ma. E fan xa maniya sansi bogi ra naxan doxoɔxi a burexee nun a fugee tagi.

³⁵ Na salon firin firin doxoɔ saxanyie bun ma naxee kelixi a bili ma, a sama ne menni fan ma.

³⁶ Na tɔnbilie nun lanpui salonyie xa findi keren na, e xa yailan xεema fanyi xabuxi ra.»

37 «I xa lanpui solofere yailan, i xa e doxo e doxodee ma alako e dexε xa yare iyalan.

38 I xa wuki xabase nun xube sase yailan xeema fanyi ra.

39 Xeema naxan nawalima lanpui doxoε nun lanpui yirabase yailanfe ra, na xa findi xeema kilo tongo saxan nun naani nan na.

40 I xa na birin naba alo n a masenxi i be ki naxe geya fari.»

26

Horomolingira tife

1 «I xa Ala xa horomolingira yailan suwa dugi fu ra, naxee raxunmaxi gese mooli saxan na, gese gere daaxi, gese bulu daaxi, nun gese gbeeli. Na gese xa malekee sawure ramini dugie ma. A xa tofan ki fanyi.

2 Dugi birin xa kuya nongon moxonen nun solomasaxan, a xa igbo nongon naani. E kuye nun e igboya xa lan.

3 Dugi suuli xa degε e boore ra, dugi suuli gbete fan xa degε e boore ra. Na kui na dugi fu bara findi dugi firin na.

4 I xa gese gere daaxi degε na dugi singe de kiri ma, a nun na dugi firin nde de kiri ma.

5 I xa gese tongo suuli degε na firinyi de kiri ma alako e birin xa lan e boore ma.

6 Na dangi xanbi i xa suxuse tongo suuli yailan xeema ra, i fa na dugi firinyie ralan e boore ra na suxusee ra. Na nan a niyama horomolingira xa findi dugi keren na.»

⁷ «I xa dugi fu nun keren sɔxɔ si xabe ra, naxee Ala xa hɔrɔmɔlingira makotoma.

⁸ Dugi keren xa kuya nɔngɔn tongo saxan, a xa igbo nɔngɔn naani. Na dugi fu nun kerenyi birin xa lan.

⁹ I xa dugi suuli dɛgɛ e boore ra, e xa findi dugi keren na. Na dugi senni naxee luxi, i xa e fan dɛgɛ e boore ra. Na dugi senni nde singanma banxi yatagi nan xun ma.

¹⁰ I xa gɛsɛ tongo suuli dɛgɛ na dugi singe ra, a nun na dugi firin nde ra.

¹¹ Na dangi xanbi i xa suxuse tongo suuli yailan wure gbeeli ra, i fa na dugi firinyie ralan e boore ra na suxusee ra. Na nan a niyama na birin xa findi dugi keren na naxan Ala xa hɔrɔmɔlingira makotoma.

¹² Na dugi xa mayigboe keɲa ma dɔnxɔe tagi singanma hɔrɔmɔlingira nan xanbi ra.

¹³ Na dugi xa kuyɛ keɲa na ki naxɛ, nɔngɔn keren nan luma na sɛeti firinyie ma, alako hɔrɔmɔlingira xa makoto.»

¹⁴ «Na dangi xanbi i xa makotose gbete yailan yɛxɛɛ kontonyi kiri ra, naxan soxi a gbeeli ra. I man xa makotose gbete yailan peremui kiri ra.»

¹⁵ «I xa kasiya wuri xaba xebenyie ra hɔrɔmɔlingira tima naxee ma.

¹⁶ Kankan xa kuya nɔngɔn fu, a xa igbo nɔngɔn keren nun a tagi.

¹⁷ Suxuse firin xa lu hɔrɔmɔlingira xebenyi birin ma e kafuma e boore ma naxee ra.

¹⁸ Xebenyi mɔxɔɲɛn nan tima hɔrɔmɔlingira yirefanyi ma.

¹⁹ Sanbunyi gbeti daaxi tongo naani nan sama na xebenyi mɔxɔɔɛn bun ma, xebenyi keren, sanbunyi firin. E xa lu xebenyi suxusee fe ma.

²⁰ Xebenyi mɔxɔɔɛn nan tima hɔrɔmɔlingira kɔɔla fan ma,

²¹ a nun e sanbunyi gbeti daaxi tongo naani, xebenyi keren, sanbunyi firin.

²² Xebenyi senni nan tima hɔrɔmɔlingira xanbi ra sogorode mabiri.

²³ I xa xebenyi firin yailan tuxuie be hɔrɔmɔlingira xanbi ra,

²⁴ naxee fuge nun lanbanyi lanma e boore ma, e xiri fuge ra se digilixi ra. Na tuxui firinyi xa yailan na ki.

²⁵ Na birin lanma xebenyi solomasaxan nan ma, a nun e sanbunyi gbeti daaxi fu nun senni, xebenyi keren, sanbunyi firin.»

²⁶ «I xa wuri suuli yailan kasiya wuri ra, hɔrɔmɔlingira xebenyie tima naxee ma. Suuli rawali seeti keren ma,

²⁷ suuli rawali boore seeti ma, suuli rawalima hɔrɔmɔlingira xanbi ra sogorode mabiri.

²⁸ Wuri naxan luma a tagi, na dangima xebenyie nan xun ma, a keli seeti singe a sa dɔxɔ boore ra.

²⁹ Na xebenyie, nun na wurie, nun se digilixie wuri soma naxee kui, i xa xeema maso na birin ma.

³⁰ I xa na hɔrɔmɔlingira ti alo n i yamarixi ki naxe geya fari.»

³¹ «I xa suwa dugi yailan gese gbeeli nun gese bulu daaxi ra. Maleke sawuree xa dege na ma, a xa tofan ki fanyi.

³² I xa a gbaku kasiya wuri naani ra xεεma masoxi naxee ma, e tixi gbeti sanbunyie ma. Suxuse naxee dugi xirima wurie ma, xεεma xa maso nee fan ma.

³³ I na γε dugi gbakude na suxusee ra, i xa saatε kankira dɔxɔ a xanbi ra. Na ki, na dugi luma na yire firin tagi ra, naxan xili yire seniyeŋxi a nun naxan xili yire seniyeŋxi fisamante.

³⁴ I xa saatε kankira de rakoto a derakote ra yire seniyeŋxi fisamante kui. Na derakote se findixi xunsare yire nan na.

³⁵ I xa teebili tan dɔxɔ hɔrɔmɔlingira kɔɔla ma, lanpui dɔxɔse xa lu a ya ra yirefanyi ma.»

³⁶ «I xa suwa dugi gbete yailan geεε gere daaxi, geεε bulu daaxi, nun geεε gbeeli ra hɔrɔmɔlingira sode. I xa a masɔxɔ a fanyi ra, a xa tofan.

³⁷ I xa a gbaku wuri suuli ma naxee yailanxi kasiya wuri ra, xεεma masoxi naxee ma, e tixi gbeti sanbunyie ma. Suxuse naxee dugi xirima wurie ma, nee yailanxi wure gbeeli ra.»

27

Sεrexeβade, hɔrɔmɔlingira tεtε

nun hɔrɔmɔlingira lanpui ture

¹ «I xa sεrexeβade yailan kasiya wuri ra, naxan kuya nɔngɔn suuli, a igbo nɔngɔn suuli, a ite nɔngɔn saxon.

² I xa feri naani yailan a tuxui birin ma, naxee findixi se keren na sεrexeβade ra. I xa wure gbeeli maso na birin ma.

³ I xa a yirabase birin yailan wure gbeeli ra, alo xube sasee, pelie, pootie, sube soxosee, nun tundee te sama naxee kui.

⁴ I xa se nde yailan wure gbeeli ra naxan sama te xun ma, sube sama naxan fari. I xa suxuse digilinxie wure gbeeli daaxi sa a tuxui ma,

⁵ alako a xa gbaku serexebade kui a tagi.

⁶ I xa wuri kuyee yailan kasiya wuri ra wure gbeeli masoxi e ma.

⁷ E rasoma suxuse digilixi naanie nan kui serexebade seeti firinyie ma a xanife ra.

⁸ I xa na serexebade yailan xebenyie nan na. Sese naxa lu a kui. I xa a yailan alo n i yamarixi ki naxe geya fari.»

⁹ «I xa hɔrɔmɔlingira tete yailan yi ki ne: Tete xa kuya nɔngɔn keme yirefanyi mabiri ra. I xa gere suwa dugi gbaku na

¹⁰ wuri mɔxɔɔn ma, naxee tixi sanbunyi wure gbeeli daaxie ma. Na dugi suxusee xa yailan gbeti ra.

¹¹ Tete xa kuya nɔngɔn keme koola fan mabiri ra. I xa gere dugi gbaku na wuri mɔxɔɔn ma, naxee tixi sanbunyi wure gbeeli daaxie ma. Na dugi suxusee xa yailan gbeti ra.

¹² Tete xa igbo nɔngɔn tongo suuli sogegorode mabiri ra. I xa gere dugi gbaku na wuri fu ma, naxee tixi sanbunyi wure gbeeli daaxie ma.

¹³ Tete xa igbo nɔngɔn tongo suuli sogetede fan mabiri ra.

¹⁴ Gere dugi xa gbaku seeti ma wuri saxan ma, naxee tixi sanbunyi ma. Na xa kuya nɔngɔn fu nun suuli.

15 Gere dugi gbete xa gbaku boore seeti ma wuri saxan ma, naxee tixi sanbunyi ma. Na fan xa kuya nongon fu nun suuli.

16 Tete sode de xa yailan suwa dugi ra naxan masoxoxi gese gere daaxi nun gese bulu daaxi nun gese gbeeli ra. Na dugi xa nongon xa moxonen soto. Na xa gbaku wuri naani ma, naxee tixi sanbunyi ma.

17 Wuri naxee tixi tete ma, e tixi e sanbunyi wure gbeeli daaxie ma. Dugi suxusee fan na e ma naxee yailanxi gbeti ra.

18 Na hromolingira tete kuyeya lanma nongon keme nan ma, a igboya nongon tongo suuli. Suwa dugi naxee gbakuxi na, e ite nongon suuli. Tete wuri sanbunyi,

19 hromolingira yirabase birin, nun tete luuti xirima se naxee ma, na birin yailanma wure gbeeli nan na.»

20 «I xa Isirayilakae yaamari, e xa fa oliwi ture fanyi ra i xon ma, alako hromolingira lanpuie xa dexexemui birin.

21 Haruna nun a xa die xa na lanpuie radexe, naxee na hromolingira kui, n i lima dennaxe, yire seniyanxi fisamante ya ra, dugi gbakuxi dennaxe saate kankira ya ra. Na lanpuie xa yanba Alatala ya xori kelife ke han geesege. Seriyen nan na ki Isirayila bonsoe birin be naxan mu kanama abadan.»

28

¹ «I xa i taara Haruna tongo Isirayilakae ya ma, a nun a xa die Nadabo, Abihu, Eleyasari, nun Itamari, e xa serexedube wali raba n be.

² I xa sose seniyenxie degge i taara Haruna be, naxee a xa kuntigiya nun a binye masenma.

³ I xa na wali so mixie yi ra n naxee kixi xaxili fanyi ra, naxan a niyama e xa fata. E xa Haruna xa serexedube sosee degge, alako a xa ti n ma serexedube wali ra.

⁴ Sosee nan yi ki e naxee degema: donma kanke raxunmase, donma kuye, tunki raxunmase, donma kuye bun magoroe masoxoxi, xunmase naxan doxoma e xunyi ma, nun beleti. E xa na sose seniyenxie yailan i taara Haruna nun a xa die be, alako e xa serexedube wali raba n be.»

⁵ «Donma degemae xa gese gere daaxi, gese bulu daaxi, gese gbeeli, gese xema daaxi, nun suwa dugi malan.

⁶ E xa donma kuye degge gese gere daaxi, gese bulu daaxi, gese gbeeli, gese xema daaxi, nun suwa dugi ra. A xa findi wali tofanyi ra.

⁷ E xa tunki raxunmase firin yailan, e xa e degge donma kuye ma.

⁸ Beleti fan xa yailan gese gere daaxi, gese bulu daaxi, gese gbeeli, gese xema daaxi, nun suwa dugi ra alo donma kuye.

⁹ I xa onixi geme firin tongo, i fa Yaxuba xa die xilie masoli e ma

¹⁰ e bari ki ma. Xili senni masoli geme keren ma, xili senni masoli geme boore fan ma.

¹¹ Na geme masolixi firinyie findima wali tofanyi ra, alo sebeli masolima xurunde ma ki

naxe. I xa xεema sa e rabilinyi ma,

¹² i fa nee dege tunki raxunmasee ma, e xa findi naxo rasiga see ra Isirayila die xa fe ma. Na ki Haruna fama e xilie ra n ya i, a xa findi dube ra.

¹³ I na xεema sa e rabilinyi ma,

¹⁴ i xa luuti die yailan xεema ra naxee gbakuma e rabilinyi ma.»

¹⁵ «I xa serexedube donma kanke raxunmase yailan a tofanyi ki ma. A findima kiiti se nan na. I xa a yailan gese gere daaxi, gese bulu daaxi, gese gbeeli, nun suwa dugi ra alo donma kuye yailanxi ki naxe.

¹⁶ A xa kuye nun a xa igboya xa findi suxui keren na. A xa findi dugi firin na, alako a xa findi yuba ra.

¹⁷ A xa raxunma geme tofanyie safe naani ra. Safe singe findima gemεe nan na, naxee xili sariduwani, topasi, nun emerode.

¹⁸ Safe firin nde, esikaribukulu, safiri, nun diyaman.

¹⁹ Safe saxan nde, opale, agati, nun ametisite.

²⁰ Safe naani nde, kirosolite, onixi, nun yasipe. I xa xεema sa nee birin rabilinyi ma.

²¹ Isirayila xa die xilie xa masoli na geme fu nun firin ma, alo sebeli masolima xurunde ma ki naxe. Kankan xili xa masoli geme nde ma. E findima Isirayila bonsoe fu nun firinyi matonxuma se nan na.

²² I xa luuti die dege na donma kanke raxunmase ma, naxee yailanxi xεema ra.

²³ I xa xurunde firin yailan xεema ra, i xa e dege donma kanke raxunmase ma a de kiri firinyie ma a fuge ra.

²⁴ Na luuti xεema daaxie xa xiri na xurunde firinyie ma, naxee degexi donma kanke raxunmase de kiri ma.

²⁵ I man xa na luuti firinyie xiri donma kuye tunki raxunmasee ma.»

²⁶ «I xa xurunde firin gbete yailan xεema ra, i naxee degema donma kanke raxunmase de kirie ma a labe ra. I xa nee degε donma kuye sεeti ma.

²⁷ I xa xurunde firin gbete yailan xεema ra, i naxee degema tunki raxunmasee lanbanyi ma, dennaxe ilanma beleti ra.

²⁸ Donma kanke raxunmase xa xiri donma kuye ma luuti gere daaxi ra naxan nasoma xurundeε kui naxee degexi donma kanke raxunmase nun donma kuye ma.»

²⁹ «Haruna na so hōromolingira kui, Isirayila bōnsōε xili birin sebexi a xa donma kanke raxunmase ma, naxan saxi a kanke fari sondonyi yailanyi, a findima dube ra Alatala be Isirayila xa fe ra temui birin.

³⁰ I xa geme firin sa na donma kanke raxunmasee kui, naxan saxi Haruna kanke fari sondonyi mabiri. Nee findixi Ala waxōnfe masen se nan na. Haruna na so Alatala yire, a nōma Alatala waxōnfe kolonde Isirayilakae xa fe ra nee saabui ra.»

³¹ «I xa serexedube xa donma kuye bun magoroe sōxō gese gere daaxi ra.

³² I xa a xunyi rasode xaba a tagi, i xa na sode de masōxō, alako bōode yo naxa lu a ma.

³³ I xa a raxunma pirinti gere daaxi, bulu daaxi, nun gbeeli ra naxee misaalixi wuri bogi ra a rabilinyi birin ma. I xa tolōnyi xεema daaxie degε na pirintie tagi,

³⁴ alako tolɔnyi nde xa lu wuri bogi birin tagi na donma kuye bun magoroe sanbunyi birin ma.

³⁵ Haruna na a ragoro a ma a so temui nun a mini temui Alatala xa hɔrɔmɔlingira kui, na nan a ratangama faxe ma.»

³⁶ «I xa xεema yailan, a seβε a ma, <Alatala gbe>,

³⁷ i fa a xiri xunmase fari luuti gere daaxi ra,

³⁸ alako a xa gbaku a tigi ra. Xa a sa li serexe mu nu baxi seriye ki ma, na kote luma Haruna nan ma, kɔnɔ na sebeli naxan gbakuxi a tigi ra a niyama ne Alatala xa na serexe suxu.»

³⁹ «I xa donma kuye bun magoroe gbete dege Haruna be suwa dugi ra, a nun xunmase naxan sama a xun ma. I xa a xa beleti masɔxɔ a tofanyi ra.

⁴⁰ I xa donma kuye bun magoroe, beletie, nun xunmasee dege Haruna xa die fan be, naxee e xa binye nun e xa kuntigiya masenma.

⁴¹ I xa i taara Haruna nun a xa die maxiri na ki, beenun i xa e ti n ma serexedube wali rabade. I xa ture maso e xunyi ma, i fa e masen jama be e bara findi serexedube ra.

⁴² I xa wantanyi dege suwa dugi ra naxan kelima e tagi han e tabe alako e xa sutura.

⁴³ Haruna nun a xa die xa na mɔoli so e ma e makɔrema serexebade ra temui naxe, xa na mu a ra e na hɔrɔmɔbanxi kui li temui naxe, n i lima dennaxe. Na nan a niyama e mu yunubi sotoma, e tangama ne faxe ma. Seriyε na a ra naxan mu kanama abadan Haruna nun a bɔnsɔε birin be.»

*Mixi tife serexedube ra**nun serexee bafe*

¹ «I na wa mixi tife n ma serexedube wali rabafe ra, i xa tuura nun yexee kontonyi firin tongo, lanyuru yo mu na naxee ma,

² a nun taami lebinitare, taami lebinitare ture masunbuxi naxan na, nun taami lebinitare xunxuri ture masoxi naxan ma. I xa na birin naba sansi xori luxutaxi ra.

³ I xa na taami birin sa debe kui, i a xanin hõrõmõlingira yire, a nun tuura, nun yexee kontonyi firin.

⁴ I xa Haruna nun a xa die ti serexedube wali ra hõrõmõlingira sode, n e lima dennaxe. I na ge e maxade ye ra e raseniyenfe ra,

⁵ i xa Haruna xa serexedube sosee ragoro a ma, a xa donma bun magoroe, a xa donma kuye bun magoroe, a xa donma kuye, a xa donma kanke raxunmase ra, nun a xa beleti donma kanke raxunmase xirima naxan na.

⁶ I xa xunmase dõxõ a xunyi ma, i fa na tõnxuma xema daaxi xiri na ra.

⁷ I xa ture seniyenxi surusuru a xunyi ma a tife serexedube ra.

⁸ I na ge na ra, i xa serexedube donma kuye bun magoroe ragoro Haruna xa die fan ma.

⁹ I xa Haruna nun a xa die tagi ixiri beleti ra, i xa xunmase dõxõ e xunyi ma. I Haruna nun a xa die tima serexedubee ra na ki ne. Na xa findi seriye ra naxan mu kanama abadan.»

¹⁰ «I xa tuura nde xanin hõrõmõlingira sode de ra, n i lima dennaxe. Haruna nun a xa die na e belexe sa a xunyi,

11 i xa na tuura kon naxaba Alatala ya xori hōromolingira sode de ra, n i lima dennaxe.

12 I xa na tuura wuli tongo, i nde sa serexebade feri naani ma i belexesole ra. Wuli naxan luxi, i xa na ifili serexebade sanbunyi ma.

13 I na ge na ra, i xa na tuura ture tongo naxan na a furinge ma, a laare naxan a boje makotoxi, a gunguie nun ture naxan na e ma, i xa na birin gan serexe ra serexebade fari.

14 Konō a sube, a kiri, nun a xa jaje, i xa nee gan taa fari ma, barima yunubi xafari serexe na a ra.»

15 «I na ge na ra, i xa yexee kontonyi keren tongo. Haruna nun a xa die e xa e belexe sa a xunyi,

16 i fa a kon naxaba. I xa a wuli tongo, i a ifili serexebade rabilinyi ma.

17 I xa na yexee kontonyi bolon a xuntunyi ra. I xa a furinge nun a sanyie maxa, i fa e malan a sube nun a xunyi fari,

18 i na birin gan serexebade fari. Serexe gan daaxi nan na ki Alatala be, naxan nafan Alatala ma.»

19 «I na ge na singe ra, i xa na yexee kontonyi firin nde tongo. Haruna nun a xa die na e belexe sa a xunyi ma,

20 i xa a kon naxaba. I xa na wuli tongo, i nde sa Haruna nun a xa die yirefanyi tuli kirie ma, e yirefanyi belexe, nun sankurae ma. Wuli naxan luxi, i xa na ifili serexebade rabilinyi.

21 I xa wuli nde tongo serexebade fari, a nun ture nde naxan nawalixi mixi tife serexedube ra, i xa nee kasan Haruna, a xa die, nun e xa

dugie ma. Na kui Haruna nun a xa die bara ti serexedubee ra, e xa dugie fan bara findi serexedube dugie ra.»

²² «I xa yexee kontonyi ture tongo, a nun a xuli, a ture naxan na a furinge ma, a laare naxan a boje makotoxi, a gunguie nun ture naxan e makotoxi, a nun a yirefanyi tabe, barima serexe na a ra naxan a niyama mixi xa ti serexedube wali ra.

²³ I xa na debe tongo taami lebinitare na naxan kui naxan fixi Alatala ma. Na kui i xa taami digilinxi keren tongo, a nun taami lebinitare ture masunbuxi naxan na, nun taami lebinitare xunxuri nde,

²⁴ i xa nee sa Haruna nun a xa die belexe, i nee lintan Alatala ya i serexe ra.

²⁵ Na dangi xanbi, i xa e ba e belexe, i e sa serexe gan daaxi fari serexebade. Serexe ganxi na a ra naxan nafan Alatala ma.»

²⁶ «I xa yexee kontonyi kanke tongo, naxan baxi Haruna be, i a lintan Alatala ya i serexe ra, a xa findi i gbe ra.

²⁷ Na kanke nun na tabe i naxan lintanxi Alatala ya i serexe ra serexedubee tife xa fe ra,

²⁸ nee bara findi Haruna nun a xa die gbe ra. Seriyē nan na ki Isirayilakae be naxan mu kanama abadan. E lan ne e xa na mooli ba e xa xanunteya serexe birin ma, e a fi Alatala ma.»

²⁹ «Haruna na faxa, a xa serexedube sose radangima a xa die nan ma. E ti temui na wali ra, e xa e ragoro e ma.

³⁰ Haruna xa di naxan findima a joxoe ra na nan fama na dugie ragorode a ma xi solofere bun ma, beenun a xa so yire seniye nxi horomolingira

kui, n i lima dennaxe, serexedube wali rabafe ra.»

³¹ «Yexee kontonyi naxan baxi serexe ra, Haruna findixi serexedube ra temui naxe, i xa na sube jin yire nde naxan seniyeñxi.

³² Na sube nun na taami naxan na debe kui, Haruna nun a xa die xa na don hōromōlingira sode de ra, n i lima dennaxe.

³³ E keren xa na yunubi xafari serexe don, serexe naxan ba e be e ti loxo serexedubee ra. A mu lanma mixi gbete xa na don, barima se seniyeñxi nan a ra.

³⁴ Xa na serexe sube nun taami nde sa lu han geesege, i xa a gan te xora. A mu donma, barima se seniyeñxi nan a ra.»

³⁵ «I xa n ma yaamarie rabatu Haruna nun a xa die xa fe ra na xi solofere bun ma e tima serexedubee ra temui naxe.

³⁶ I xa tuura keren ba loxo yo loxo yunubi xafari serexe ra. Na nan a toma serexebade fan seniyeñma. Na xanbi i xa ture ifili serexebade fari, alako a xa findi yire sugandixi ra.

³⁷ I xa na wali raba xi solofere bun ma, alako serexebade xa seniyeñ, a man xa mixi raseniyeñ naxan dinma a ra.»

³⁸ «Loxo yo loxo a lanma i xa yexee firin ba serexe ra serexebade fari, naxee bara je keren soto. Na xa raba kudei.

³⁹ A singe xa ba geesege, boore xa ba koe so temui.

⁴⁰ I na na yexee singe ba, i xa farin konkoronyi suuli, oliwi ture litiri keren, nun weni litiri keren sa na fari.

⁴¹ I na na yexee firin nde ba koe so temui, i xa sansi bogi nde nun weni sa a fari alo geesege

daaxi. I xa nee ba serexe gan daaxi ra, naxan nafan Alatala ma.

⁴² Serexe gan daaxi mooli nan a ra, i bonsæ lanma a xa naxan ba n tan Alatala be abadan. A bama horomolingira sode de nan na n tan Alatala ya xori, n wo lima dennaxe, n woyenma wo be dennaxe.»

⁴³ «N nan n yete masenma Isirayilakæ be menni n ma nore kui, naxan menni raseniyenma.

⁴⁴ N nan n ma horomolingira nun n ma serexebade raseniyenma ne, n i lima dennaxe. N Haruna nun a xa die raseniyenma ne, alako e xa n ma serexedube wali raba.

⁴⁵ N sabatima ne Isirayilakæ tagi, n man findima ne e Marigi Ala ra.

⁴⁶ Na kui e a kolonma ne n tan nan Alatala ra, e Marigi Ala, naxan e ramini Misira boxi ra, alako n xa sabati e tagi. Alatala nan n tan na, e Marigi Ala.»

30

Surayi serexebade, Isirayilakæ xunsare,

Horomolingira ye, ture, nun labunde

¹ «I xa surayi serexebade yailan kasiya wuri ra.

² A xa kuya nongon keren, a igbo nongon keren, a ite nongon firin. Feri naani xa lu a tuxuie ra, e nun serexebade findixi se keren nan na.

³ I xa na serexebade birin maso xesema xinde ra, a fari, a ssetie, a ferie, nun a de kiri.

⁴ I xa suxuse digilinxi firin yailan xesema ra serexebade sseti firinyie ma a de kiri labe ra, wuri kuyee soma naxee kui a xaninfe ra.

⁵ I xa na wurie yailan kasiya wuri ra, i fa xεεma maso e ma.

⁶ Na surayi serεxebade xa dɔxo dugi ya ra naxan na saate kankira ya ra, yunubi xunsare yire dɔxoxi naxan fari, n mixi lima dennaxe.

⁷ Haruna xa surayi xiri jɔxunme gan menni gεεsege birin, a fentenma lanpuie ma temui naxe.

⁸ A man xa na mɔoli raba kɔe so temui. Surayi nan a ra, naxan lanma a xa gan waxati birin Alatala ya xɔri. Seriyε na a ra wo bɔnsɔe be naxan mu kanama abadan.

⁹ Wo naxa sese ba na serεxebade fari bafe surayi seniyenxi ra. Wo naxa surayi seniyentare ba, wo naxa serεxe gan daaxi ba, wo naxa sansi serεxe ba, wo naxa weni xa na mu a ra ture ba menni.

¹⁰ Ne yo ne Haruna xa yunubi xafari serεxe wuli nde tongo, a a maso surayi serεxebade ferie ma, alako e fan xa seniyen. Seriyε nan a ra i bɔnsɔe lanma a xa naxan naba abadan. Na serεxebade findixi se seniyenxi nan na Alatala be.»

¹¹ Alatala naxa yi masenyi ti Munsu be:

¹² «I na Isirayilakae konti loxoε naxe, birin xa a xunsare fi Alatala ma. Na nan a ra, mankanε yo mu e lima na konti tife xa fe ra.

¹³ Mixi naxan birin kontima, e xa gbeti giramu senni fi Alatala ma. Na xa maniya horomolingira seriyε ki ma.

¹⁴ Mixi naxan birin simaya bara ne mɔxɔnen li, a xa a xunsare fi Alatala ma.

¹⁵ Banna mu se sama na giramu senni xun ma, misikiine fan mu nde bama na giramu senni ra.

Birin xa na fi Alatala ma e xunsare ra.

¹⁶ Isirayilakae na na gbeti so i yi ra, i xa a rawali hōrōmōlingira yailanfe ra, n i lima dennaxe, alako n xa ratu a ma Isirayilakae naxan fixi e xunsare ra.»

¹⁷ Na dangi xanbi Alatala naxa yi masenyi ti Munsa be.

¹⁸ «I xa hōrōmōlingira ye sase xungbe yailan wure gbeeli ra, a nun a dōxose. I xa na dōxo hōrōmōlingira nun serexebade tagi, i fa marasenyen ye sa a kui,

¹⁹ Haruna nun a xa die naxan nawalima e belexee nun e sanyie maxafe ra.

²⁰ Beenun e xa so hōrōmōlingira kui, n wo lima dennaxe, a lanma e xa e belexee nun e sanyie maxa na ye ra, alako e naxa faxa. Beenun e xa e makore serexebade ra serexe gan daaxi bafe Alatala be,

²¹ a lanma e xa e belexee nun e sanyie maxa na ye ra, alako e naxa faxa. Seriyē nan na ra e bōnsōe birin be naxan mu kanama abadan.»

²² Alatala naxa a masen Munsa be,

²³ «I xa se xiri jōxunme fanyie tongo, alo wuri wa ye naxan xili miri kilo suuli, wuri fuji naxan xili sinamon kilo firin nun a tagi, kale nde kilo firin nun a tagi naxan xiri jōxun,

²⁴ kasiya wuri fuji kilo suuli, nun oliwi ture litiri senni.

²⁵ I xa na birin yailan ture seniyenxi ra naxan nawalima serexedube tife ra. Na wali xa raba a fanyi ra a raba ki ma.»

²⁶ «I man xa na ture rawali hōrōmōlingira nun saate kankira rasenyenfe ra, n wo lima dennaxe,

²⁷ a nun hɔrɔmɔlingira teebili, a yirabasee, lanpui dɔxɔse, a yirabasee, surayi sɛrɛxɛbade,

²⁸ sɛrɛxɛbade xungbe, a yirabasee, hɔrɔmɔlingira ye sase xungbe, nun a dɔxɔse.

²⁹ I xa na ture sɛniyenxi rawali na birin nasɛniyenfe ra. Mixi naxee dinma nee ra, e sɛniyenma nɛ.

³⁰ I xa na ture sɛniyenxi rawali Haruna nun a xa die tife n ma sɛrɛxɛdubɛɛ ra.»

³¹ «I xa a fala Isirayilakae bɛ a na ture findixi ture sɛniyenxi nan na wo bɔnsɔɛ bɛ abadan.

³² Wo naxa a sa mixi fate ma, wo naxa na ture mɔoli yailan wali gbɛtɛ xa fe ra. Ture sɛniyenxi nan a ra wo bɛ.

³³ Mixi yo naxan na na ture mɔoli rafala, a a sa mixi sɛniyantare ma, na kanyi bama nɛ jama ya ma.»

³⁴ Alatala naxa a masen Munsa bɛ, «I xa se xiri jɔxunmɛɛ tongo, alo sitakite, onixi, nun galibanon. I xa e masunbu surayi fanyi ra, e xasabi birin xa lan.

³⁵ Na findima surayi ra naxan xiri jɔxun ki fanyi ra. Fɔxɛ di xa sa a ma. Surayi sɛniyenxi nan a ra.

³⁶ I xa na surayi findi fupɪ ra i naxan sama saate kankira ya ra hɔrɔmɔlingira kui n i lima dennaxɛ. Se sɛniyenxi na a ra wo bɛ.

³⁷ Wo naxa yi surayi mɔoli rafala wo yetɛ bɛ. Se sɛniyenxi na a ra, wo naxan nawalima Alatala gbansan bɛ.

³⁸ Mixi yo naxan na na mɔoli rafalama a yetɛ bɛ a xa na xiri rame, na kanyi kerima nɛ a xa jama ya ma.»

31

Hərəmölöngira walikəe

nun malabui ləxəe binyafe

¹ Alatala naxa a masen Munsa bə,

² «I xa a kolon n bara Uri xa di Besaleli sugandi, Xuru xa mamadi, naxan fatanxi Yuda bənsəe ra.

³ N bara xaxili fanyi fi a ma naxan fatanxi n tan na, alako a xa wali birin naba ki kolon lənni fanyi ra,

⁴ a xa nə wali tode a xaxili kui beenun a xa raba, a xa nə xəema, gbeti, nun wure gbeeli rawalide,

⁵ a xa nə gəmə fanyi masolide a fa a rabilinyi yailan, a xa nə kamudərija nun wali gbətəe rabade.»

⁶ «N bara Oholiyabu Axisamaki xa di so a yi ra, naxan fatanxi Dana bənsəe ra, a xa a mali. N bara xaxili fanyi fi mixie ma, naxee fata walide, alako e xa nə n ma yaamari birin nabade,

⁷ alə hərəmölöngira n adamadi lima dənnaxə, saate kankira, a dərakote naxan findixi xunsare yire ra, nun hərəmölöngira yirabase birin,

⁸ teebili, teebili yirabasee, lanpui dəxəse xəema daaxi, lanpui yirabasee, surayi sərəxəbade,

⁹ sərəxəbade xungbe nun a xa yirabasee, ye sase xungbe nun a dəxəse,

¹⁰ sərəxədubə sose seniyeñxie Haruna nun a xa die bə,

¹¹ ture seniyeñxi, nun surayi naxan ganma hərəmölöngira kui. E xa a birin yailan n ma yaamari ki ma.»

¹² Alatala naxa a masen Munsa be,

¹³ «A fala Isirayilakae be a e xa e jengi sa n ma malabui loxoee xon ma, barima nee findima tonxuma ra won tagi abadan, alako wo xa a kolon a n tan nan na Alatala ra naxan wo raseniyeema.

¹⁴ Wo xa wo jengi sa malabui loxoee xon ma, barima a seniyeen wo tan be. Xa naxan mu a binya, a lan ne na kanyi xa faxa. Mixi naxan walima malabui loxoee, na kanyi xa keru n ma nama ya ma.

¹⁵ Xi senni na wo yi ra walife ra, kono a xi solofere nde findima malabui loxoee nan na, naxan fima Alatala ma. Mixi naxan walima na loxoee, na kanyi xa faxa.

¹⁶ Isirayilakae xa e jengi sa malabui loxoee xon ma, e a rabatu waxati birin. Saate na a ra naxan mu kanama abadan.

¹⁷ A findima tonxuma nan na, n tan nun Isirayilakae tagi temui birin, barima n tan Alatala, n koore nun boxi daaxi xi senni nan bun ma, kono a xi solofere nde, n naxa wali dan, n nan n malabu.»

¹⁸ Alatala to ge masenyi tide Munsa be Turusina geya fari, a naxa geme walaxe firin so a yi ra seede ra, a xa yaamarie nu sebexi naxee ma a belexe sole ra.

32

Ninge kuye xema daaxi

¹ Isirayilakae to a to, Munsa bara bu geya fari, nama naxa e malan Haruna yire, e fa a fala a be, «I xa kuye yailan naxan tima muxu ya ra. Munsa

naxan muxu raminixi Misira boxi ra, muxu mu a kolon fe naxan a sotoxi geya fari.»

² Haruna naxa e yaabi, «Langa xεema daaxi naxan birin na wo xa ginεe nun wo xa die tulie ra, wo fa e birin na n xon ma.»

³ Isirayila jama birin naxa e xa langa xεema daaxie ba e tulie ra, e fa e so Haruna yi ra.

⁴ Haruna naxa na xεema raxunu, a ninge kuye daaxi yailan a ra. A to ge na ra, e naxa a fala e xui itexi ra, «Isirayilakae, won ma ala nan ya naxan won naminixi Misira boxi kui.»

⁵ Haruna to na to, a naxa sεrεxεbade yailan na ninge kuye daaxi ya ra, a fa a fala a xui itexi ra, «Tina, xulunyi tima nε Alatala bε.»

⁶ Na kuye iba, e naxa keli subaxε ma, e sεrεxε gan daaxi nun xanunteya sεrεxε ba. Mixie naxa e dεge, e minsee min, e fa e waxonfe raba.

⁷ Na temui Alatala naxa a masen Munsa bε, «I xa goro jama yire, barima i naxee namini Misira boxi kui, e bara fe kana a jaaxi ra.

⁸ E bara n ma kira bejin yi ikorexi ra, e bara ninge kuye daaxi yailan wure raxunuxi ra, e na batu, e sεrεxεe ba a bε, e a fala, «Isirayilakae, won ma ala nan ya naxan won naminixi Misira boxi kui.»

⁹ N tan Alatala n xa a masen i bε, yi jama, jama xurutare na a ra.

¹⁰ Won naxan nabama, a lu n xa e sonto n ma xone kui, kono i tan, i xa makuya e ra, n xa i findi si xungbe ra.»

¹¹ Na kui Munsa naxa Alatala maxandi, «Alatala, munfe ra i wama xonofe i xa jama ma, i senbe naxan naminixi Misira boxi ra?»

¹² Xa i na raba, Misirakae fama a falade a i yi nama raminixi Misira boxi kui ne alako i xa e faxa geyae fari, e xa fe xa non dunina. N bara i maxandi, i boɲe magoro, n Marigi. I naxa yi nama sonto.

¹³ I ratu i xa konyie Iburahima, Isiyaga, nun Isirayila ma, i kalixi naxee ra, a falafe ra, «N wo bɔnsɔe rawuyama ne alo tunbui naxee na koore ma. N boxi fima wo bɔnsɔe ma ke ra naxan mu bama wo yi ra abadan.»

¹⁴ Na temui Alatala boɲe naxa goro, a mu a xa nama sonto sonon.

¹⁵ Munsa naxa goro geya fari na seede walaxe firinyie suxuxi a yi ra, sebeli tixi nee seeti firinyi ma.

¹⁶ Ala nan na walaxee yailan, a sebeli masoli e ma.

¹⁷ Yosuwe to nama xui itexi me, a naxa a fala Munsa be, «N xui nde mema nama yire naxan luxi alo gere so xui.»

¹⁸ Munsa naxa a yaabi, «Gere geenife xui mu ya, gere loosife xui fan mu a ra. N xulunyi xui nan mema.»

¹⁹ E to makore nama ra, Munsa naxa mixie to fare boron na kuye yire. A boɲe naxa te han a fa walaxee woli boxi ma geya sanbunyi, e naxa kana.

²⁰ A naxa e xa ninge kuye daaxi woli te xora, a gan han a findi xube ra. A naxa na te xube sa ye xora, a na fi Isirayilakae ma, e xa a min.

²¹ A naxa fa Haruna maxarin, «Yi nama munse rabaxi i ra, naxan a niyaxi i xa e ti yi yunubi xungbe ra?»

²² Haruna naxa a yaabi, «N marigi, i naxa xono n ma! I a kolon yi pama birama fe kobi foxo ra ki naxe.

²³ E tan nan a falaxi n be, «I xa kuye yailan naxan tima muxu ya ra. Munsa naxan muxu raminixi Misira boxi ra, muxu mu a kolon fe naxan a sotoxi geya fari.»

²⁴ N naxa a fala e be, «Wo xa fa wo xa xema ra.» E to fa na xema ra, n naxa a woli te xora, yi ninge kuye daaxi fa mini.»

²⁵ Munsa naxa a kolon Haruna pama luxi ne e xa e waxonfe raba. Na nu wama findife yaagi ra Isirayilakae be e yaxuie mabiri.

²⁶ Munsa naxa sa ti e xa yonkinde sode de ra, a fa a fala a xui itexi ra, «Naxee na Alatala be, wo xa fa n yire.» Lewi bonsoe birin naxa e malan Munsa xanbi ra.

²⁷ A naxa a fala e be, «Isirayila Marigi Alatala bara wo yamari wo birin xa wo xa santidegema tongo, wo fa wo ngaxakerenyi birin faxa, a nun wo booree nun wo doxo booree naxee bara lu yi fe kui.»

²⁸ Na loxo Lewi bonsoe naxa Munsa xa yaamari suxu, e fa Isirayilaka mixi wulu saxan faxa.

²⁹ Munsa naxa a fala e be, «To wo bara Alatala waxonfe raba wo ngaxakerenyie faxafe. Ala xa baraka sa wo xa fe ma.»

³⁰ Na kuye iba, Munsa naxa a fala pama be, «Wo bara yunubi xungbe raba. N xa ghilen Alatala yire geya fari, alako n xa a mayandi wo xa yunubi xafarife ra.»

³¹ Munsa naxa siga Alatala yire, a a fala a be, «Alatala, n bara i maxandi yi pama be. E bara yunubi xungbe raba kuye yailanfe xema ra.

³² N bara i maxandi, i xa diɲe e ma. Yandi, xa na mu a ra, i xa n xili ba e ɲɔxɔɛ ra kisi kitaabui kui, i naxan seɓexi.»

³³ Alatala naxa a yaabi, «Ade, n mixie nan xili bama n ma kisi kitaabui kui naxee yunubi rabaxi n na.

³⁴ Yakosi, siga, i xa ɲama xanin n dennaxe masenxi i be. N ma maleke tima i ya ra sinden, kɔnɔ kiiti lɔxɔɛ na fa, e e xa yunubie sare fima ne.»

³⁵ Alatala Isirayilakae raton ne, barima e a fala ne Haruna be, a xa ninge kuye daaxi yailan e be xeema ra.

33

Ala lufe Isirayilakae tagi

¹ Alatala naxa a masen Munsa be, «Wo nun ɲama i naxan naminixi Misira bɔxi kui, wo xa siga n dennaxe laayidixi Iburahima, Isiyaga, nun Yaxuba be kali ra, a falafe ra n na fima e bɔnsɔɛɛ ma.

² N maleke tima ne wo ya ra. N Kanaankae, Amorikae, Xitikae, Perisikae, Hiwikae, nun Yebusukae kerima ne

³ na bɔxi ma, xiɲe nun kumi xeɛma dennaxe. Kɔnɔ n tan mu sigama naa wo fɔxɔ ra, xa na mu a ra n wo sontɔma ne kira xɔn ma, barima ɲama xurutare nan wo ra.»

⁴ Nama to na masenyi xɔrɔxɔɛ me, e naxa sunnun. Mixi yo mu a raxunmasee so a ma.

⁵ Alatala naxa a masen Munsa be, «I xa a fala Isirayilakae be, <Xurutaree nan wo ra. Xa n bira wo fɔxɔ ra, n wo sontɔma ne. Wo xa wo fate raxunmase birin ba wo ma, n xa a mato n wo xa fe suxuma ki naxe.>»

⁶ Na kui e to keli Xorebe geya yire, e naxa e xa xunmasee ba e ma.

⁷ Munsa nu kiri banxi tongoma, a nu a ti Isirayilakae xa yonkinde fari ma. A naxa na xili sa Ala Maxandi yire. Menni mixi nu noma maxorinyi tide Alatala ma.

⁸ Munsa to nu minima sigafe ra na banxi kui, jama birin nu kelima ne, e ti e xa naade ra, e ya ti Munsa ra han a so na kui.

⁹ Munsa na ge sode na banxi kui, nuxui nu goroma na naade ra, Alatala fa sumun a be.

¹⁰ Isirayilakae to nu na nuxui toma na banxi sode de ma, e nu luma e mafelen na boxi ma e xonyi naade ra.

¹¹ Alatala nu woyenma Munsa be e boore ya i, alo mixi woyenma a boore be ki naxe. Sumunyi dangi xanbi, Munsa nu gbilenma jama yire, konɔ a malima Yosuwe, Nun xa di, na tan mu nu kelima na banxi kui.

¹² Munsa naxa a masen Alatala be, «N Marigi i bara n yamari n xa ti yi jama ya ra, konɔ i mu a masenxi n be i naxan xema muxu matife ra. I bara a fala n be, <N tan nan i sugandixi, i bara n kenɛn.>

¹³ N bara i maxandi, xa n i kenɛnxi, i xa i waxonfe masen n be, alako n xa i kolon yati, n man xa i xa hinne soto. I xa a kolon, yi si findixi i xa jama nan na.»

¹⁴ Alatala naxa a yaabi, «N tan yati wo matima ne, n xa bonesa fi wo ma.»

¹⁵ Munsa naxa a masen a be, «Xa i tan yati mu muxu matima naa, i naxa a lu muxu xa keli be.

¹⁶ Munse noma a masende dunija be a muxu bara i kenɛn, xa i mu na muxu foxo ra? Na kui

xa i na muxu foxo ra, e noma a kolonde i bara n tan nun i xa pama sugandi dunija si birin ya ma.»

¹⁷ Alatala naxa Munsa yaabi, «I naxan falaxi, n a rabama ne, barima i bara n kenan. N tan nan i sugandixi yati.»

¹⁸ Na dangi xanbi Munsa naxa Ala maxandi, «I xa i xa nore masen n be.»

¹⁹ Alatala naxa a yaabi, «N fama n ma fanyi birin masende i be. N tan Alatala, n man fama n xili yati falade i be. N hinnema mixi ra, n wama hinnefe naxan na. N kinikinima mixi ma, n wama kinikinife naxan ma.

²⁰ Kono i mu noma n yatagi tan tode, barima adamadi yo mu noma n yatagi tode, a mu faxa.»

²¹ Alatala naxa a masen a be, «Fanye nde nan be n fe ma. I xa ti naa.

²² N ne dangima n ma nore kui, n i noxunma fonme kui, n fa i ya makoto n belexe ra han n gema dangide temui naxe.

²³ Na temui n fama n belexe bade i ya ma, alako i xa no n kobe tode fa, kono i mu noma n yatagi tan tode.»

34

Seriye walaxe neene

¹ Alatala naxa a masen Munsa be, «Walaxe firin masoli gema ra, naxee maniya na singee ra i naxee kana. N xa sebeli ti e ma, alo sebeli naxan nu tixi na booree ma.

² I xa kurun tina geesege tefe ra Turusinina geya fari i n lima dennaxe.

³ I naxa fa mixi yo ra, mixi yo naxa te geya ma. Hali xurusee naxa e demadon menni.»

⁴ Munsa naxa gɛmɛ walaxɛ firin masoli alɔ a singee. Subaxɛ a naxa te Turusinina geya ma na walaxɛ ra, alɔ Alatala a yamari ki naxɛ.

⁵ Alatala to goro nuxui kui Munsa yire a xili masende a bɛ,

⁶ a naxa dangi Munsa ya ra, a fa a yita a bɛ,
«N tan nan na Alatala ra.
Alatala naxan kinikinima,
naxan xa hinne gbo,
naxan dijɛma ibunadama ma.
Duguteɛɛɛna kanyi nan n na,
n mu yanfanteya kolon.

⁷ N ma duguteɛɛɛna buma abadan.
N dijɛma mixi xa tantanyi ma,
n mu ratuma e xa matandi ma,
n e xa yunubi xafarima.

Kɔnɔ n mu nɛɛmuma tinxintareya ma.
N tinxintaree sare ragbilenma nɛ e bɔnsɔɛ ma
han e tolontolonyie xa waxati.»

⁸ Munsa naxa a felen bɔxi ma,

⁹ a fa a fala, «N Marigi, n bara i maxandi, xa n i kɛnɛn, i xa jɛrɛ muxu ya ma, barima xurutare nan muxu ra. I xa dijɛ muxu xa matandi ma, i xa muxu xa yunubie xafari, alako muxu xa findi i xa jama yati nan na.»

¹⁰ Alatala naxa a yaabi, «N xa saate tongo wo bɛ. N fama nɛ kaabanakoe rabade wo ya ma, naxee singe mu nu raba dunija kui. Si birin kaabama nɛ Alatala xa wali magaaxuxie ma, n naxee rabama i tan saabui ra.

¹¹ Wo jɛngi sa n ma yaamari xɔn ma n naxan falama wo bɛ to. N fama nɛ Amorikae,

Kanaankae, Xitikae, Perisikae, Hiwikae, nun Yebusukae keride wo ya ra.

¹² Wo na so na, wo nun e tan naxa saate yo xiri, xa na mu a ra e findima gantanyi nan na wo be.

¹³ A lanma wo xa e xa serexebadee rabira, wo xa e xa geme tonxumae kana, wo xa e xa kuyee masolixie masege.

¹⁴ Wo naxa wo magoro ala gbete bun ma, barima n tan naxan xili Alatala, n mu wama n firin nde xon.

¹⁵ Wo naxa saate xiri wo nun na boxikae ra, alako wo naxa n yanfa, wo fa e xa alae xa serexee don e wo xilima lande naxee ma.

¹⁶ Wo naxa menni ginse fen wo xa die be, alako e naxa a niya wo xa die xa e xa alae batu.

¹⁷ Wo naxa ala gbete yailan wure raxunuxi ra.»

¹⁸ «Wo xa Taami Lebinitare Sali raba. Xi solofere bun ma Abiba kike ra, wo xa taami lebinitare gbansan don, alo n wo yamarixi ki naxe. Wo xa ratu a ma a n wo raminixi Misira boxi kui na kike nan na.»

¹⁹ «N gbe nan di xeme singe birin na, a findi mixi ra, a findi xuruse ra wo xa goore kui alo ninge, yexee, xa na mu a ra si.

²⁰ Wo xa sofale xa di singe xun sara yexee xa na mu a ra si ra. Xa wo mu tin na ra, wo xa na sofale konyi gira. Wo xa di xeme singe birin xun sara. Wo naxa wo makore n na wo belexe igeli ra.»

²¹ «Wo xa wali xi senni loxunyi kui, konon a xi solofere nde, wo xa wo malabu. Hali a findi xe buxa nun xe xaba temui nan na, wo xa na seriye suxu.»

22 «Wo xa Loxunyie Sali raba Ala tantufe ra wo mengi singe xabama temui naxe, a nun wo xe xabama temui naxe ne jonyi.

23 Ne keren kui, xeme birin xa fa sali raba ra Isirayila Marigi Alatala ya xori sanya saxan.

24 Na waxati saxanyi kui, n mu tinma si yo xa fa wo xa boxi ba wo yi ra. N a niyama ne wo xa no e ra, wo fa nde sa wo xa boxi xa gboe xun ma.»

25 «Wo naxa fa xuruse serexe ra n xon ma, taami lebini daaxi biraxi a foxo ra. Wo na ge Sayamaleke Dangi Sali serexe donde, wo naxa na sube donxoe raxi ye i.

26 Wo xa wo xa sansi bogi fisamante singee ba serexe ra wo Marigi Alatala xa horomolingira kui. Wo naxa si yore jin a nga xije ye ra.»

27 Alatala naxa a masen Munsa be, «I xa yi yaamarie sebe, barima nee findixi saate nan na n nun Isirayila jama tagi.»

28 Munsa naxa lu Alatala yire xi tongo naani. Koe nun yanyi a mu sese don, a mu sese min. Na waxati Alatala naxa na seriyee fu sebe geme walaxee ma, naxee findixi saate masenyi ra.

29 Munsa naxa goro Turusinina geya fari, walaxe firin suxuxi a yi ra, naxee findixi saate masenyi ra. Munsa mu nu a kolon a yatagi nu bara noro a tan nun Ala xa sumunyi saabui ra.

30 Haruna nun Isirayilakae to nore to Munsa yatagi ma, e mu suusa e makorede a ra.

31 Munsa naxa Haruna nun jama kuntigie xili, e fa lu yire keren.

³² E to ge woyende, Isirayila nama birin naxa fa e tuli matide Alatala xa yaamari ra, a naxan masenxi Munsa be Turusinina geya fari.

³³ Munsa to ge na falade, a naxa mafelenyi dusu a yatagi xun na.

³⁴ A nu so kiri banxi kui maxorinyi tide Alatala ma, a nu mafelenyi bama a yatagi ma. A na mini temui naxe, a Ala xa yaamari radangi Isirayila nama ma.

³⁵ Isirayilakae nu a toma Munsa yatagi nu noroxi ki naxe. A na ge na masenyi ra, a man a xa mafelenyi dusu a xun na, han a gbilen temui Alatala yire.

35

Ala xa yaamarie hɔrɔmɔlingira tife xa fe ra

¹ Munsa naxa Isirayila nama birin malan, a a fala e be, «Alatala xa yaamarie nan ya:

² Wo xa wali xi senni loxunyi kui, kono a xi solofere nde wo xa wo malabu. Loxoe sugandixi na a ra Alatala be. Mixi yo naxan wali suxuma na loxoe, a lanma na kanyi xa faha.

³ Wo naxa te yo radexe wo xa banxi kui malabui loxoe.»

⁴ Munsa man naxa a masen Isirayila nama birin be, «Alatala xa yaamarie nan ya:

⁵ Wo xa hadiya ba Alatala be. Mixi naxan na a janige a xa hadiya ba, alo xema, gbeti, nun wure gbeeli,

⁶ gese gere daaxi, bulu daaxi, nun a gbeeli, suwa dugi, nun gese naxan yailanxi si xabe ra,

7 yexee kontonyi kiri naxee soxi a gbeeli ra,
peremui kirie, nun kasiya wuri,

8 lanpui ture, labunde naxan masunbuma ture
ra, surayi xiri joxunme naxan ganma,

9 onixi geme, nun geme tofanyi naxee sama
serexedube xa donma kuye nun a xa donma
kanke raxunmase ma.»

10 «Wali kolonyie naxee na wo ya ma, e xa fa
yi see yailande alo Alatala a yamarixi ki naxe:

11 Hoxomolingira dugie,

a xun makoto see,

a suxusee,

a xebenyie,

a wurie nun e sanbunye,

12 a nun saatε kankira,

a wuri kuyee,

a derakote,

a nun dugi naxan gbakuma a ya ra,

13 hoxomolingira teebili,

a wuri kuyee,

a yirabase,

nun taami naxee bama Alatala be serexe ra,

14 hoxomolingira lanpui doxose,

a yirabasee,

a lanpuie,

nun ture naxan sama a kui,

15 surayi serexebade,

a wuri kuyee,

nun ture seniyenxi,

labunde gan daaxi,

a nun dugi naxan gbakuma hoxomolingira sode

de ra,

16 serexebade xungbe,

a sube ganse wure gbeeli daaxi,
 a wuri kuyee,
 a yirabase,
 nun hɔrɔmɔlingira ye sase xungbe
 nun a dɔxɔse,
¹⁷ hɔrɔmɔlingira tɛtɛ xa dugie,
 a wurie,
 nun e sanbunye,
 a nun dugi naxan gbakuma tɛtɛ sode dɛ ra,
¹⁸ hɔrɔmɔlingira maxirisee,
 tɛtɛ maxirisee,
 nun e xa luutie,
¹⁹ a nun sɛrɛxɛdubɛ sosee Haruna nun a xa die
 bɛ.»

²⁰ Isirayila nama naxa keli Munsa xun ma.

²¹ Mixi naxee a janige, nee naxa fa e xa
 hadiya ra Alatala bɛ a xa hɔrɔmɔlingira tife ra,
 Ala e lima dennaxe, a nun sɛrɛxɛdubɛ sosee
 seniyɛnxie yailanfe ra.

²² Xɛmɛɛ nun ginɛ naxee a janigexi, e naxa
 fa xunmase xɛɛma daaxie ra, alo tulirasoe,
 xurundɛɛ, kɔnyi magorosee, bɛlɛxɛrasoeɛ, a nun
 xunmase gbɛtɛ naxee yailanxi xɛɛma ra. E naxa
 na birin fi Alatala ma sɛrɛxɛ ra.

²³ Gɛsɛ gɛrɛ daaxi, bulu daaxi, nun a gbeeli,
 suwa dugie, gɛsɛ naxan yailanxi si xabe ra, yɛxɛɛ
 kontonyi kiri naxee soxi a gbeeli ra, nun peremui
 kirie nu na naxee yi ra, nee naxa fa e ra.

²⁴ Mixi naxee nu a janigexi, nee naxa fa gbeti
 nun wure gbeeli hadiya ra Alatala bɛ. Kasiya
 wuri kanyie naxa fa na wuri ra hɔrɔmɔlingira
 wali xa fe ra.

²⁵ Ginɛ naxan birin fata dugi sɔxɔde, e naxa
 dugie sɔxɔ e bɛlɛxɛ ra, e fa nee ra: dugi gɛrɛ

daaxi, bulu daaxi, nun a gbeeli. E naxa fa suwa dugi ra.

²⁶ Gine naxan birin fata, e a janige, e naxa gese yailan si xabe ra.

²⁷ Nama kuntigie naxa fa onixi gemee nun gemee tofanyi gbete ra, naxee sama serexedube xa donma kuye nun a xa donma kanke raxun-mase ra.

²⁸ E naxa fa labunde nun ture ra hɔrɔmɔlingira lanpui be, a nun ture seniyenxi nun labunde gan daaxi gbete.

²⁹ Isirayilaka birin naxee a janigexi e boje kui, xeme nun ginee, nee naxa fa hadiya ra Alatala xon ma, alako Munsa xa wali raba Alatala a yamarixi naxan na.

³⁰ Munsa naxa a masen Isirayilakae be, «Wo a kolon, Alatala bara Besaleli Uri xa di sugandi, Xuru xa mamadi naxan fatanxi Yuda bonsoe ra.

³¹ Alatala bara xaxili fanyi fi a ma, alako a xa wali birin naba ki kolon lonni fanyi ra,

³² a xa no wali tode a xaxili kui beenun a xa raba, a xa no xema, gbeti, nun wure gbeeli rawalide,

³³ a xa no gemee fanyi masolide a fa a rabilinyi yailan, a xa no kamuderija nun wali gbete rabade.

³⁴ Ala bara a niya Besaleli xa no mixi gbete matinkande a xa wali ra. Ala bara na niya Oholiyabu Axisamaki xa di fan be, naxan fatanxi Dana bonsoe ra.

³⁵ Ala bara e mali alako e xa fata wali birin na, alo gemee nun wuri masolife, pirinti rabafe, suwa dugi soxofe gese gere daaxi, bulu daaxi, nun a

gbeeli ra, a nun wali birin e naxan toma e xaxili kui.»

36

Besaleli nun Oholiyabu xa wali

¹ Besaleli, Oholiyabu, nun wali fanyi rabae, Alatala bara xaxili fanyi fi naxee ma, alako e xa hɔrɔmɔlingira wali birin naba ki kolon lonni fanyi ra, nee wali suxu ne alɔ Alatala a yamari ki naxe.

² Munsa naxa Besaleli, Oholiyabu, nun wali fanyi rabae xili, Alatala bara xaxili fanyi fi naxee ma, naxee nu bara a janige e xa na wali raba.

³ Munsa naxa hadiya birin so e yi ra, Isir-ayilakae naxee baxi sɛrɛɛɛ janigexi ra e xa hɔrɔmɔlingira tife xa fe ra. Gɛɛsɛɛ yo gɛɛsɛɛ, e nu hadiya gbete sɔtɔma.

⁴ Na wali fanyi rabae naxa keli e xa walie dɛ i, alako e xa hɔrɔmɔlingira wali gbansan naba.

⁵ E naxa a fala Munsa bɛ, «Nama fama hadiya naxee ra, a gbo wali bɛ, Alatala naxan yamarixi.»

⁶ Na kui Munsa naxa yaamaru fi, yi xibaaru xa rayensen yonkinde kui, «Mixi naxa wali sɔnɔn hadiya xa fe ra, naxan bama hɔrɔmɔlingira tife ra.» Nama naxa na xui rabatu, e mu fa na hadiya mɔoli ra sɔnɔn.

⁷ Se naxee nu bara ba, nee nu nɔma wali rapɔnde a fanyi ra.

⁸ Wali fanyi rabae naxa hɔrɔmɔlingira ti suwa dugi fu ra, a gɛrɛ daaxi, a bulu daaxi, nun a gbeeli. E malekɛɛ sawurɛ masɔxɔ a ma a tofan ki ma.

9 Dugi birin kuya nɔngɔn mɔxɔɔnɛn nun solo-masaxan, e igbo nɔngɔn naani. E kuyɛ nun e igboya lan.

10 E dugi suuli dɛgɛ e boore ra, e dugi suuli gbɛtɛ fan dɛgɛ e boore ra. Na kui na dugi fu bara findi dugi firin na.

11 E gɛsɛ gɛrɛ daaxi dɛgɛ na dugi singe dɛ kiri ma, a nun na dugi firin nde dɛ kiri ma.

12 E gɛsɛ tongo suuli dɛgɛ na firinyi dɛ kiri ma alako e birin xa lan e boore ma.

13 E suxuse tongo suuli yailan xɛɛma ra, na dugi firinyie ralan e boore ra na suxusee ra. Na nan a niya hɔrɔmɔlingira findi dugi keren na.

14 E dugi fu nun keren sɔxɔ si xabe ra, naxee Ala xa hɔrɔmɔlingira makotoma.

15 Dugi keren kuya nɔngɔn tongo saxan, a igbo nɔngɔn naani. Na dugi fu nun kerenyi birin lan nɛ.

16 E dugi suuli dɛgɛ e boore ra, e findi dugi keren na. Na dugi senni naxee luxi, e fan dɛgɛ e boore ra.

17 E gɛsɛ tongo suuli dɛgɛ na dugi singe ra, a nun na dugi firin nde ra.

18 E suxuse tongo suuli yailan wure gbeeli ra, na dugi firinyie ralan e boore ra na suxusee ra. Na nan a niya na birin findi dugi keren na naxan Ala xa hɔrɔmɔlingira makotoma.

19 E makotose gbɛtɛ yailan yɛxɛɛ kontonyi kiri ra, naxan soxi a gbeeli ra. E makotose gbɛtɛ yailan peremui kiri ra.

20 E kasiya wuri xaba xebenyie ra hɔrɔmɔlingira tima naxee ra.

21 Kankan kuya nongon fu, a igbo nongon keren nun a tagi.

22 Suxuse firin lu horomolingira xebenyi birin ma e kafuma e boore ma naxee ra.

23 Xebenyi moxonen nan ti horomolingira yirefanyi ma.

24 Sanbunyi gbeti daaxi tongo naani nan sa na xebenyi moxonen bun ma, xebenyi keren, sanbunyi firin. E lu xebenyi suxusee fe ma.

25 Xebenyi moxonen nan ti horomolingira koola fan ma,

26 a nun e sanbunyi gbeti daaxi tongo naani, xebenyi keren, sanbunyi firin.

27 Xebenyi senni nan ti horomolingira xanbi ra sogeorode mabiri.

28 E xebenyi firin yailan tuxuie be horomolingira xanbi ra,

29 naxee fuge nun labe lanma e boore ma, e xiri fuge ra se digilixi ra. Na tuxui firinyi yailan na ki ne.

30 Na birin lanxi xebenyi solomasaxan nan ma, a nun e sanbunyi gbeti daaxi fu nun senni, xebenyi keren, sanbunyi firin.

31 E wuri suuli yailan kasiya wuri ra, horomolingira xebenyie tima naxee ma. Suuli rawali seeti ma,

32 suuli rawali boore seeti ma, suuli rawali horomolingira xanbi ra sogeorode mabiri.

33 Wuri naxan lu a tagi, na dangi xebenyie nan xun ma, a keli seeti singe a sa dexo boore ra.

34 Na xebenyie, nun na wurie, nun se digilixie wuri so naxee kui, na birin maso xema nan na.

³⁵ E suwa dugi yailan gɛsɛ gɛrɛ daaxi, bulu daaxi, nun a gbeeli ra. Malekɛ sawurɛɛ dɛgɛ na ma, a tofan ki ma.

³⁶ A gbaku kasiya wuri naani ma naxee masoxi xɛɛma ra, e tixi gbeti sanbunyiɛ ma. Suxuse naxee dugi xirima wurie ma, nee fan maso xɛɛma ra.

³⁷ E suwa dugi gbɛtɛ yailan gɛsɛ gɛrɛ daaxi, bulu daaxi, nun a gbeeli ra hɔrɔmɔlingira sode dɛ ra. E a masɔxɔ a fanyi ra, a xa tofan.

³⁸ E a gbaku wuri suuli ma naxee yailanxi kasiya wuri ra, e masoxi xɛɛma ra, e tixi gbeti sanbunyiɛ ma. Suxuse naxee dugi xirima wurie ma, nee yailanxi wure gbeeli ra.

37

Saate kankira, hɔrɔmɔlingira teebili,

hɔrɔmɔlingira lanpui, surayi sɛrɛxɛbade

¹ Besaleli naxa kankira yailan kasiya wuri ra. A kuya nɔngɔn firin nun a tagi, a igbo nɔngɔn keren nun a tagi, a ite nɔngɔn keren nun a tagi.

² A naxa a kui nun a fari maso xɛɛma ra, a naxa a dɛ kiri fan yailan xɛɛma ra.

³ A naxa a suxude digilinxi naani rafala xɛɛma ra a tunxun naanie ma, firin na sɛɛti, firin na boore sɛɛti ma.

⁴ A naxa kasiya wuri firin masoli a bɛ, a fa e maso xɛɛma ra.

⁵ A naxa e raso na kankira suxude digilinxie kui, nee findi kankira tongose ra.

⁶ A naxa na kankira dɛrakote yailan xɛɛma fanyi ra, a findi xunsare yire ra. A kuya nɔngɔn firin nun a tagi, a igbo nɔngɔn keren nun a tagi.

⁷ A naxa maleke sawure firin yailan xεema xabuxi ra kankira derakote fari na sεeti firinyie ma.

⁸ Na maleke sawureε nun na kankira derakote findi keren na.

⁹ Na maleke sawureε firinyie naxa ti e boore ya i, e gabutenyie italaxi, e xun sinxi xunsare yire.

¹⁰ A naxa teebili yailan kasiya wuri ra, naxan kuya nongon firin, a igbo nongon keren, a ite nongon keren nun a tagi.

¹¹ A naxa xεema fanyi maso a ma, a nun a de kirie ma.

¹² A naxa xebenyi nde sa na de kirie bun ma, naxan igbo suxui keren a nun a tagi. A naxa xεema sa na fan de kirie ma.

¹³ A naxa a suxude digilinxi naani rafala xεema ra a tunxun naanie ma, naxee ilanma a sanyie ra.

¹⁴ E nu na na xebenyi bun ma. Wuri kuyee nu soma nee kui teebili xaninfe ra.

¹⁵ A naxa wuri kuyee masoli kasiya wuri ra, a e maso xεema ra. Nee findi teebili tongose ra.

¹⁶ Piletie, tonbilie, potie, nun paani naxee sama na teebili ma, naxee rawalima serexe yeerama daaxi xa fe ra, a naxa e birin yailan xεema fanyi ra.

¹⁷ A naxa lanpui doxoεe nde yailan xεema fanyi xabuxi ra. A sanyi, a bili, a salonyie, nun lanpui doxoεe naxee maniya sansi fugee ra, na birin findi keren na.

¹⁸ Salon senni nan mini lanpui doxoεe bili ma, saxan sεeti keren, saxan boore sεeti.

¹⁹ Tonbili saxan nan lu na salon senni birin xun ma. E maniya sansi bogi ra naxan doxoεi a burexεee nun a fugee tagi.

²⁰ Tɔnbili naani gbete nan lu lanpui dɔxɔse bili ma. E fan maniya sansi bogi ra naxan dɔxɔxi a burexee nun a fugee tagi.

²¹ Na salon firin firin dɔxɔ saxanyie bun ma naxee kelixi a bili ma, a sa ne menni fan ma.

²² Na tɔnbilie nun lanpui salonyie findi keren na, e yailan xεema fanyi xabuxi ra.

²³ A naxa lanpui solofere yailan, a e dɔxɔ e dɔxɔdee ma alako e dexe xa yare iyalan.

²⁴ Xεema naxan nawalixi lanpui dɔxɔse nun lanpui yirabase yailanfe ra, na findi xεema kilo tongo saxan nun naani nan na.

²⁵ A naxa surayi serexebade yailan kasiya wuri ra. A kuya nɔngɔn keren, a igbo nɔngɔn keren, a seeti naani birin lan, a ite nɔngɔn firin. Ferie naxa lu a tuxuie ra, e nun serexebade findi se keren na.

²⁶ A naxa na serexebade birin maso xεema xinde ra, a fari, a seetie, a ferie, nun a de kiri.

²⁷ A naxa suxuse digilinxi firin yailan xεema ra serexebade seeti firinyie ma, a de kiri labe ra, wuri kuyee soma naxee kui a xaninfe ra.

²⁸ A naxa na wurie yailan kasiya wuri ra, a naxa xεema maso e ma.

²⁹ A naxa ture seniyenxi nun surayi xiri fanyi yailan naxan nawalima serexedube tife ra. Na wali xa raba a fanyi ra alɔ labunde rafale a rafalama ki naxe.

38

Serexebade, ye sase xungbe, nun tete

¹ A naxa serexe gan daaxi serexebade yailan kasiya wuri ra, naxan kuya nɔngɔn suuli, a igbo

nongon suuli, a seeti birin lan, a ite nongon saxon.

² A naxa feri naani yailan a tuxui birin ma, naxee findixi se keren na serexebade ra. A naxa wure gbeeli maso na birin ma.

³ A naxa serexebade yirabase birin yailan wure gbeeli ra, alo xube sasee, pelie, pootie, sube soxosee, nun tundee te sama naxee kui.

⁴ A naxa se nde yailan wure gbeeli ra naxan sama te xun ma, sube sama naxan fari. A naxa suxuse digilinxie wure gbeeli daaxi sa a tuxui ma,

⁵ alako a xa gbaku serexebade kui a tagi.

⁶ A naxa wuri kuyee yailan kasiya wuri ra wure gbeeli masoxi e ma.

⁷ A naxa e raso suxuse digilinxie naanie kui serexebade seeti firinyie ma a xaninfe ra.

⁸ A naxa horomolingira ye sase xungbe nun a doxose yailan wure gbeeli ra, a naxan soto ginnee ra naxee nu malanma horomolingira sode de ra.

⁹ A naxa tete yailan suwa dugi ra. Tete kuya nongon keme yirefanyi mabiri ra.

¹⁰ A naxa gere dugi gbaku na wuri moxonen ma, naxee tixi sanbunyi wure gbeeli daaxie ma. Na dugi suxusee naxa yailan gbeti ra.

¹¹ Tete kuya nongon keme kola fan mabiri ra. A naxa gere dugi gbaku na wuri moxonen ma, naxee tixi sanbunyi wure gbeeli daaxie ma. Na dugi suxusee xa yailan gbeti ra.

¹² Tete igbo nongon tongo suuli sogegode mabiri ra. A naxa gere dugi gbaku na wuri fu ma, naxee tixi sanbunyi wure gbeeli daaxie ma.

13 Tete igbo nongon tongo suuli sogetede fan mabiri ra.

14 A naxa gere dugi gbaku seeti ma wuri saxan ma, naxee tixi sanbunyi ma. Na kuye nongon fu nun suuli.

15 A naxa gere dugi gbete gbaku boore seeti ma wuri saxan ma, naxee tixi sanbunyi ma. Na fan kuye nongon fu nun suuli.

16 Tete naxa yailan suwa dugi ra.

17 Wuri naxee tixi tete ma, e tixi e sanbunyi wure gbeeli daaxie ma. Dugi suxusee fan na e ma naxee yailanxi gbeti ra.

18 Tete sode de naxa yailan suwa dugi ra naxan masoxoxi gese gere daaxi, bulu daaxi, nun a gbeeli ra. Na dugi kuya nongon moxoren, a ite nongon suuli, alo tete dugi birin xa maite.

19 A naxa na gbaku wuri naani ma, naxee tixi e sanbunyi wure gbeeli daaxie ma. Na dugi suxusee nun na wuri xunyie yailanxi gbeti ra.

20 Horomolingira nun tete luuti xirima se naxee ma, nee birin yailan wure gbeeli nan na.

21 Horomolingira, seede walaxe na naxan kui, a wali dentege nan yi ki. Lewi bonsoe na wali raba Munsa xa yaamari nan bun ma. Haruna xa di, Itamari nan findi na wali yarerati ra.

22 Besaleli, Uri xa di, Xuru xa mamadi, Yuda bonsoe, naxa Alatala xa yaamari birin naba, a naxan masen Munsa be.

23 Oholiyabu, Axisamaki xa di, Dana bonsoe, findi Besaleli malima nan na. A nu fata se masolide nun suwa dugi masoxode gese gere daaxi, bulu daaxi, nun a gbeeli daaxi ra.

²⁴ Xeeema xasabi naxan nawalixi hōromōlingira tife ra, naxan soto hadiya ra, a lan kilo keme solomanaani kilo tongo solomanaani nan ma hōromōlingira maniyase seriye ki ma.

²⁵ Gbeti xasabi naxan soto mixi kontixie ra, na lan ne kilo wulu saxan kilo keme solomasaxan nun tongo solofere nun suuli nan ma hōromōlingira maniyase seriye ki ma.

²⁶ Mixi wulu keme senni mixi wulu saxan keme suuli tongo suuli, naxee nu bara ne mōxōnen soto nun na xanbi, naxee kontixi Isirayilakae tagi, kankan naxa gbeti giramu senni fi hōromōlingira maniyase seriye ki ma.

²⁷ E naxa gbeti kilo wulu saxan kilo keme naani raxunu wuri sanbunyi keme yailanfe ra hōromōlingira nun tete be. Wuri sanbun keren findi gbeti kilo tongo saxan nun naani nan na.

²⁸ Na kilo mōxōnen naxan lu, na naxa yailan dugi nun wuri suxusee nun wuri xunyiye ra.

²⁹ Wure gbeeli xasabi naxan soto Isirayila xa hadiya ra, a lan kilo wulu firin kilo keme naani nun solofere.

³⁰ E naxa a findi hōromōlingira sode de wuri sanbunyiye ra, nun serexebade wure gbeeli daaxi, nun na xa yirabase birin,

³¹ nun tete wuri sanbunyiye, nun a sode de xa wuri sanbunyiye, nun tete maxirisee ra.

39

Serexedube sosee

¹ E naxa sose seniye xie dege Haruna nun serexedubee be naxee walima hōromōlingira kui. Na sose yailanxi gese gere daaxi, bulu daaxi,

a gbeeli, nun suwa dugi ra, alo Alatala a yamari Munsa be ki naxe.

² E donma kuye yailan ne xεema gese ra, gese gere daaxi, bulu daaxi, a gbeeli, nun suwa dugi ra.

³ E naxa xεema kebela itala, e a ixaba e a yailan waya ra. E naxa gese gere daaxi, bulu daaxi, a gbeeli, nun suwa dugi masoxo na waya ra. A findi wali tofanyi nan na.

⁴ E naxa tunki raxunmase firin yailan naxee xirima donma kuye ra.

⁵ Beleti fan yailan na ki ne gese gere daaxi, bulu daaxi, a gbeeli, nun suwa dugi ra. Na beleti nun donma findi keren na. Na birin yailanxi alo Alatala Munsa yamari ki naxe.

⁶ E naxa onixi gemε rawali, e naxa e rabilinyi findi xεema ra. E naxa Isirayila xa die xili masoli e ma, alo e sebeli masolima xurunde ma ki naxe.

⁷ E naxa e sa tunki raxunmasee ma, e xa findi tonxuma see ra Isirayila xa die xa fe ma, alo Alatala Munsa yamari ki naxe.

⁸ E donma kanke raxunmase yailan ne a fanyi ra alo donma kuye. E na suwa dugi soxo xεema gese, gese gere daaxi, bulu daaxi, nun a gbeeli ra.

⁹ A xa kuye nun a xa igboya lan ne suxui keren ma, a findi dugi firin na.

¹⁰ Gemε tofanyie safe naani nu na a ma. Safe singe findi gemε nan na, naxee xili sariduwani, topasi, nun emerode.

¹¹ Safe firin nde, esikaribukulu, safiri, nun diyaman.

¹² Safe saxan nde, opale, agati, nun ametisite.

13 Safe naani nde, kirosolite, onixi, nun yasipe. Xεema nu na na gεme birin rabilinyi ma.

14 Isirayila xa die xilie masoli na gεme fu nun firin ma, alɔ sεbeli masolima xurunde ma ki naxe. Kankan xili masoli gεme nde ma. E findi Isirayila bɔnsɔe fu nun firinyi matɔnxuma se nan na.

15 E luuti die dεge ne na donma kanke raxunmase ma, naxee yailanxi xεema ra.

16 E xurunde firin yailan xεema ra, e e dεge donma kanke raxunmase ma a dε kiri firinyie ma a fuge ra.

17 E na luuti xεema daaxie xiri na xurunde firinyie ma, naxee dεgexi donma kanke raxunmase dε kiri ma.

18 E man na luuti firinyie xiri donma kuye tunki raxunmasee ma.

19 E xurunde firin gbete yailan xεema ra, naxee dεgema donma kanke raxunmase dε kirie ma a labe ra. E nee dεge donma kuye sεeti ma.

20 E man naxa xurunde firin gbete yailan xεema ra, naxee dεgema tunki raxunmasee labe ra, dennaxe ilanma beleti ra.

21 Donma kanke raxunmase naxa xiri donma kuye ma luuti gere daaxi ra naxan nasoma xurundεe kui naxee dεgexi donma kanke raxunmase nun donma kuye ma, alɔ Alatala a yamari Munsa be ki naxe.

22 E naxa sεrεxεdube xa donma kuye bun magoroe sɔxɔ gεse gere daaxi ra.

23 E naxa a xunyi rasode xaba a tagi, e na sode dε masɔxɔ, alako bɔɔde yo naxa lu a ma.

24 E naxa a raxunma pirinti gere daaxi, bulu daaxi, nun a gbeeli ra naxee misaalixi wuri bogi

ra a rabilinyi birin ma.

²⁵ E naxa tolonyi xεema daaxie dεge na pirintie tagi, alako tolonyi nde xa lu wuri bogi birin tagi na donma kuye bun magoroe sanbunyi birin ma.

²⁶ Tolonyi nde lu wuri bogi birin tagi na donma kuye bun magoroe sanbunyi birin ma, alako serexedube xa wali raba alo Alatala a yamari Munsa be ki naxe.

²⁷ E naxa donma kuye bun magoroe gbete dεge suwa dugi ra, naxan soxoxi a fanyi ra, Haruna nun a xa di xeme be.

²⁸ Xunmasee naxa yailan suwa dugi ra. E naxa wantan bun soe fan dεge suwa dugi ra.

²⁹ E naxa beleti yailan suwa dugi ra, naxan masoxoxi a gere daaxi, a bulu daaxi, nun a gbeeli ra, alo Alatala a yamari Munsa be ki naxe.

³⁰ E naxa walaxe lanmadi yailan xεema ra, a findi tonxuma seniye nxi ra. E naxa sebeli masoli a ma, alo e sebeli masolima xurunde ma ki naxe, a masenfe ra, «Mixi seniye nxi Alatala be.»

³¹ E naxa a xiri gese gere daaxi nun gese bulu daaxi ra xunmase ma a tigi ra, alo Alatala Munsa yamari ki naxe.

Horomolingira xa see

³² Horomolingira xa wali rapon na ki ne, Ala mixi lima dennaxe. Isirayilakae a birin naba ne alo Alatala Munsa yamari ki naxe.

³³ E naxa horomolingira xanin Munsa xon ma nun a se birin:
tete nun a see,
suxusee,
xebenyie,
wuri kuyee mooli firin,

wuri sanbunye,
³⁴ hɔrɔmɔlingira makotosee,
 naxan yailanxi yexɛɛ kontonyi kiri gbeeli ra,
 a nun naxan yailanxi peremui kiri ra,
 dugi naxan gbakuxi yire seniyenxi fisamante
 sode de ra,
³⁵ saate kankira nun a xa wuri kuyee,
 seede kankira derakote,
³⁶ teebili,
 teebili xa yirabase birin,
 taami naxan sama teebili fari serexe ra,
³⁷ lanpui doxoɔse xɛɛma daaxi,
 lanpuie nun e yirabase birin,
 lanpui ture,
³⁸ Surayi serexɛbade xɛɛma daaxi,
 ture seniyenxi,
 surayi,
 dugi naxan gbakuxi tete sode de ra,
³⁹ serexɛbade wure gbeeli daaxi,
 a xa wuri kuyee,
 wuree sube sama naxee fari,
 a xa yirabase birin,
 ye sase xungbe nun a doxoɔse,
⁴⁰ tete dugie,
 wurie dugie gbakuma naxee ma
 nee sanbunye,
 dugi naxan gbakuxi hɔrɔmɔlingira sode de ra,
 luutie,
 wurie luutie xirima naxee ra,
 a nun hɔrɔmɔlingira xa yirabase birin, Ala
 maxandi yire,
⁴¹ serexɛdubɛe xa sose naxee rawalima yire
 seniyenxi kui,

Haruna nun a xa die xa sose seniyeŋxie naxee rawalima e xa serexedube wali kui.

⁴² Isirayilakae naxa na wali birin naba, alo Alatala a yamari Munsa be ki naxe.

⁴³ Munsa to na wali birin to a rabaxi alo Alatala a yamari ki naxe, a naxa duba Isirayilakae be.

40

Ala xa yaamarie rakamalife

hɔrɔmɔlingira xa fe ra

¹ Alatala naxa a masen Munsa be,

² «Kike singe xi singe, i xa hɔrɔmɔlingira ti, Ala wo lima dennaxe.

³ I xa saate kankira doxo na kui dugi xanbi ra.

⁴ I xa teebili yailan menni, i fa see doxo a ma a raba ki ma. I xa lanpui doxose ti naa, i fa lanpuie doxo a fari.

⁵ I xa surayi serexebade xema daaxi doxo saate kankira ya ra, i fa dugi gbaku hɔrɔmɔlingira sode de ra Ala maxandi yire.

⁶ I xa serexebade doxo hɔrɔmɔlingira sode ya ra, Ala wo lima dennaxe.

⁷ I xa ye sase xungbe doxo hɔrɔmɔlingira nun serexebade tagi, i fa ye sa a kui.

⁸ I xa hɔrɔmɔlingira tete ti, i fa dugi gbaku tete sode de ra.»

⁹ «I na ge na ra, i xa ture seniyeŋxi tongo, i fa a sa hɔrɔmɔlingira nun a kui se birin ma, e xa seniyeŋ Alatala be.

¹⁰ I man xa na raba serexebade nun a yirabase birin ma. E xa seniyeŋ Alatala be.

¹¹ I man xa na raba ye sase xungbe nun a doxose ma, e xa seniyeŋ Alatala be.»

¹² «I xa Haruna nun a xa die malan hōromōlingira sode de ra, i fa e maxa ye ra.

¹³ I xa serexedube sose seniyenxie ragoro Haruna ma, i fa ture seniyenxi sa a ma alako a xa findi n ma serexedube ra.

¹⁴ I xa serexedube sose seniyenxie ragoro a xa die fan ma,

¹⁵ i fa ture seniyenxi sa e ma alo i naxan nabaxi e baba ra, alako e fan xa findi n ma serexedubee ra. Na wali luma e yi ra, a nun naxee fama e xanbi ra abadan.»

¹⁶ Na temui Munsa naxa Alatala xa yaamari birin naba alo a fala a be ki naxe.

¹⁷ Kelife e mini Misira boxi kui temui naxe, je firin nde, kike singe, tengē singe loxo, a naxa hōromōlingira ti.

¹⁸ Munsa naxa hōromōlingira sanbunye sa, a a wuri birin ti,

¹⁹ a fa dugie itala hōromōlingira xun ma, a nun a makotosee alo Alatala a yamarixi ki naxe.

²⁰ Munsa naxa saate walaxe firinyie sa saate kankira kui, a fa kankira wurie raso kankira suxuse digilinxie kui, a kankira derakote sa a de ra naxan findixi xunsare yire ra.

²¹ A to ge na rabade, a naxa saate kankira xanin hōromōlingira kui, a a doxo yire seniyenxi fisamante kui. A naxa dugi gbaku na ya ra, alako mixi yo naxa a to alo Alatala a yamarixi ki naxe.

²² A naxa hōromōlingira teebili doxo dugi ya ra a koola mabiri,

²³ a fa taamie sa a fari a safe ki ma Alatala ya xori alo Alatala a yamarixi ki naxe.

²⁴ A naxa lanpui doxoŋe ti hoŋomolingira kui teebili ya ra a yirefanyi mabiri,

²⁵ a fa lanpuie ti na fari Alatala ya xori alo Alatala a yamarixi ki naxe.

²⁶ A naxa surayi serexebade doxo hoŋomolingira kui dugi gbakuxi a ya ra,

²⁷ a fa surayi gan menni alo Alatala a yamarixi ki naxe.

²⁸ A naxa dugi gbaku hoŋomolingira sode de ra.

²⁹ A naxa serexebade doxo hoŋomolingira sode de ra. A naxa serexe gan daaxi ba menni nun hadiya alo Alatala a yamarixi ki naxe.

³⁰ A naxa ye sase xungbe doxo hoŋomolingira nun serexebade tagi, a ye sa a kui maraseniyenyi xa fe ra.

³¹ Munsa, Haruna, nun Haruna xa die nu luma e belexee nun e sanyie maxa ra naa,

³² e soma hoŋomolingira kui temui naxe, a nun e serexe bama temui naxe alo Alatala Munsa yamarixi ki naxe.

³³ Munsa naxa tete rabilin hoŋomolingira nun serexebade ra, a fa dugi gbaku tete sode de ra.

³⁴ Munsa to ge na birin na, nuxui naxa din hoŋomolingira xun ma, Ala e lima dennaxe. Alatala xa noŋe naxa hoŋomolingira rafe,

³⁵ han na naxa a niya Munsa mu nu noma sode na kui. Alatala xa noŋe nu bara na rafe, nuxui fan nu radinxi na birin xun ma.

³⁶ Kelife na temui e xa biyaasie kui, Isirayilakae mu jere foloma fo nuxui na keli hoŋomolingira xun ma.

³⁷ Xa nuxui mu te hoŋomolingira xun ma, Isirayilakae mu jere raminima sigafe yire gbete.

³⁸ Alatala xa nuxui nu luma hɔrɔmɔlingira xun ma yanyi nun kɔe ra. Isirayilakae nu te dexexi toma nuxui kui kɔe ra. A lu na ki ne e xa biyaasi birin kui.

Soso Kitaabuie: Tawureta, Yabura, Inyila
The Holy Bible in the Susu language of Guinea (Soso
Kitaabuie: Tawureta, Yabura, Inyila Bible)

copyright © 2015 Mission Évangélique Réformée Néerlandaise et les
Traducteurs Pionniers de la Bible

Language: Susu

Contributor: Mission Évangélique Réformée Néerlandaise

This translation is made available to you under the terms of the Creative
Commons Attribution-Noncommercial-No Derivatives license 4.0.

You may share and redistribute this Bible translation or extracts from it
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2020-11-11

PDF generated using Haiola and XeLaTeX on 18 Apr 2025 from source
files dated 29 Jan 2022

f1d08866-ea3e-5b9b-b506-e7690c5c61d2